

萬 有 文 庫

第 二 集 七 百 種

王 雲 五 主 編

衛 藏 通 志

附 校 字 記

(一)

商 務 印 書 館 發 行



THE
MUSEUM OF
ART AND
ARCHITECTURE
OF
THE
CITY OF
NEW YORK

THE
MUSEUM OF
ART AND
ARCHITECTURE
OF
THE
CITY OF
NEW YORK

THE
MUSEUM OF
ART AND
ARCHITECTURE
OF
THE
CITY OF
NEW YORK

志 通 藏 衛

記 字 校 附

(一)

書 叢 本 基 學 國

衛藏通志提要

- 一、史鑑類函及雜書所載漢唐以來故事。有關於衛藏浮圖者。博採以備參考。
- 一、舊藏志。戊申年得自成都鈔本。所載程途、風土、山川頗詳。隨筆採擇。另擇分門以紀。
- 一、衛藏圖識。所載疆域、形勝、道里、寺院、風俗、物產頗詳。亦宜採擇登記。
- 一、布達拉札什倫布及各大寺源流。俱按番冊譯出。其新建廟宇。查明登記。
- 一、達賴喇嘛、班禪額爾德尼及各瑚圖克圖呼必爾罕世紀源流。宜作爲一門紀載。
- 一、自五十三年廓藩起衅舊案。
- 一、自五十六年廓藩不靖。軍興源委。及投誠檔案。
- 一、自五十六年大將軍福康安。欽差和琳。大學士孫士毅一切奏章。及善後事宜。
- 一、自五十六年欽奉上諭。
- 一、大將軍福康安。欽差和琳。勘定邊界。設立鄂博原奏。
- 一、藏中原襲公爵台吉等源流。

- 一、噶布倫以下酌定品級俸級、各營官陞調章程。
- 一、唐碑、康熙年間碑、乾隆御製十全記碑、札什城磨盤山兩處關帝廟碑、大招紀功碑、後藏碑、勸人恤出痘碑、禁止天地葬舊習告示。
- 一、旌忠祠查明殉於行陣者、按名敘入。
- 一、設立學舍、教習廓藩漢文、唐古忒滿文。
- 一、操演番漢各兵章程。
- 一、廓爾喀王謝恩表章貢物。
- 一、達賴喇嘛、班禪額爾德尼等謝恩奏章。
- 一、附近邊界各部落沿革。
- 一、自打箭爐至藏各部落名目。
- 一、山川、地名、人名、官名、詳查番語、真切譯出。
- 一、綠營弁兵分設碉卡地方數目。
- 一、各塘營汛兵馬數目。
- 一、各糧臺文員職掌。

- 一、駐藏司員、筆帖式、糧員所辦事宜。
- 一、寶藏局鼓鑄銀錢事宜。
- 一、各部落交通貿易人等官給路票。
- 一、各臺番衆應付烏拉章程。
- 一、唐古忒頭目等所司事宜。
- 一、各部落與藏中交通貨物名目。
- 一、前後藏山川及沿途各臺所過山川名目形勢。
- 一、奉旨設立奔巴瓶籤掣呼必爾罕。
- 一、北路蒙古台吉等許遣人赴藏熬茶。
- 一、達賴喇嘛、班禪額爾德尼歲遣堪布朝貢。
- 一、行取川省應辦歲需賞號等物。
- 一、定例由川省解運餉銀紙劄等物。
- 一、唐古忒風俗及男女工作農務各部落人流寓喇嘛佛事節候儀注欽差衙門文武衙門用度章程作爲雜綴一門。

- 一、欽差衙門一切公務、分別具奏、及應行咨報理藩院戶部條款。
- 一、滇省番僧、青海蒙古及川省土司等、許遣人赴藏熬茶學經、俱給路票。
- 一、達木蒙古官兵數目。
- 一、由藏通西北兩路程途、設立防卡。

衛藏通志方輿門

考證 疆域 山川 程站

衛藏通志僧俗門

喇嘛 寺廟 番族 番官 番兵 戶口

衛藏通志鎮撫門

職掌 錢法 貿易 營伍 章程

衛藏通志紀略門

康熙 雍正 乾隆

衛藏通志外部門

達木蒙古 三十九族 四方外番

衛藏通志藝文門

御製 碑記 詩文 賦

衛藏通志經典門

經典

衛藏通志卷首

聖祖仁皇帝御製瀘定橋碑記 康熙四十年建

蜀自成都行七百餘里。至建昌道屬之化林營。化林所隸曰沈村。曰烹壩。曰子牛。皆瀘河舊渡口。而入打箭鑪所經之道。考水經注。瀘水源出曲羅。而未明指何地。按圖誌。大渡河水。卽瀘水也。大渡河水源出吐番。匯番境諸水。至魚通河而合流入內地。則瀘水所從來遠矣。打箭鑪未詳所始。蜀人傳漢諸葛武鄉侯亮鑄軍器於此。故名。元設長河西宣慰司。明因之。凡藏番入貢及市茶者。皆取道焉。自明末蜀寇亂。番人竊踞西鑪。迄本朝猶阻聲教。頃者黠番肆虐。戕害我明正土官。侵徧河東地。罪不容道。康熙三十九年。各遣發師旅三路徂征。四十年春。師入克之。土壤千里。悉入版圖。鍋莊木鴉萬二千餘戶。接踵歸附。西鑪之道遂通。顧入鑪必經瀘水。向無橋梁。巡撫能泰奏言。瀘河三渡口。高崖夾峙。一水中流。雷轟矢激。不可施舟楫。行人援索懸渡。險莫甚焉。茲偕提臣岳昇龍相度形勢。距化林營八十餘里。山址坦平。地名安樂。擬卽其處。仿鐵鎖橋規制。建橋以便行旅。朕嘉其意。詔從所請。於是鳩工構造。橋東西長三十一丈一尺。寬九尺。施索九條。索之長視橋身餘八丈而贏。覆板於上。又翼以扶欄。鎮以梁柱。皆鎔鐵以庀事。橋成。凡命

使之往來。郵傳之絡繹。軍民商賈之車徒負戴。咸得安驅疾馳。而不致病於跋涉。繪圖來上。流愜朕懷。爰賜橋名曰瀘定。任事著勞諸臣。并優詔獎敘。仍申命設兵戍守。夫事無大小。期於利民。功無難易。貴於經久。今旣肇建茲舉。俾去危而就安。繼自今歲時繕修。協力維護。皆官斯土者責也。尙永保勿壞。以爲斯民貽無窮之利。是爲記。

聖祖仁皇帝御製平定西藏碑文

昔者太宗文皇帝之崇德七年。班禪額爾德尼。達賴喇嘛。固始汗。謂東土有聖人出。特遣使自人跡不至之區。經讐敵之國。閱數年。始達盛京。至今八十載。同行善事。俱爲施主。頗極安甯。後達賴喇嘛之歿。第巴隱匿不奏者。十有六年。任意妄行。拉藏滅之。復興其法。因而允從。拉藏苦苦腦兒羣衆公同之請。中間策妄阿喇蒲坦。妄生事端。動準噶爾之衆。肆行奸詐。滅壞達賴喇嘛。並廢第五輩達賴之塔。辱鱗班禪。毀壞寺廟。殺戮喇嘛。名爲興法。而實滅之。且欲竊據圖伯特國。朕以其所爲非法。爰命皇子爲大將軍王。又遣朕子孫等調發滿洲蒙古綠旗兵各數萬。歷煙瘴之地。士馬安然而至。賊衆三次乘夜盜營。我兵奮勇擊殺。賊皆喪膽。遠遯一矢不發。平定西藏。振興法教。賜今呼必爾罕冊印。封爲第六輩達賴喇嘛。安置禪榻。撫綏圖伯特僧俗人衆。各復生業。於是文武臣工。咸謂王師西討。歷瘴癘險遠之區。曾未半載。輒建殊勳。實從古所未有。而諸蒙古部落及圖伯特酋長亦合詞奏曰。皇帝勇略神武。超越往代。天兵所臨。邪魔掃蕩。復興蒙古向所尊奉法教。坎麻藏衛等部人衆。咸得拔離湯火。樂土安居。如此盛德大業。非臣下頌揚所能宣罄。請賜御製碑文。鐫勒招地。以垂永久。朕以何功焉。而羣衆勤請不已。爰記斯文。立石西藏。俾中

外知達賴喇嘛等三朝恭順之誠。諸部落累世崇奉法教之意。朕之此舉。所以除逆撫順。綏衆興教云爾。

世宗憲皇帝御製惠遠廟碑文

我國家受天眷命。撫御寰瀛。光被四表。莫不尊親。太宗文皇帝崇德七年。班禪額爾德尼。達賴喇嘛知東土有聖人。遣使通款。路涉萬里。時經數載。始達盛京。逮世祖章皇帝時。遂親至京師朝覲。備蒙恩眷。後以策妄阿喇蒲坦肆惡逞奸。殘蹂西藏。皇考聖祖仁皇帝特遣大師。計日平定。撫綏人衆。各復生業。賜今呼必爾汗冊印封號。安置禪榻。重興黃教。用以慰番衆皈依佛法之誠。並酬班禪達賴喇嘛累世恭順之悃也。朕御極以來。加意護持。俾安淨土。因思古今之有佛教。特以勸善懲惡。濟人覺世爲本。黃教之傳。所以推廣佛經之旨也。演教之地愈多。則佛法之流布愈廣。而番夷之嚮善者益衆。西藏既有班禪額爾德尼。而近邊之番夷。離藏遙遠。皆有皈依佛法之心。因思川省打箭鑪之外。有地曰噶達。昔年達賴喇嘛曾駐錫於此。爰相度川原。創建廟宇。發帑金數十萬兩。遣官董司工役。倣西方白賴本佛廟之圖式。凡爲殿堂樓房一千餘間。又爲平房四百間。賜額曰惠遠。丹牘輝煌。器用充備。置兵以衛之。達賴喇嘛來登禪榻。率諸徒衆成就新居。諸番耆幼。踴躍欣喜。使臣奏言。彼土早寒。自造寺以來。氣候和暖。深秋未凍。則知茲寺之建。人神皆慶。山川著靈。朕所以仰體皇考厚酬達賴喇嘛累世恭順之忱。且以廣布黃教。宣講經典。使

番夷僧俗崇法慕義億萬斯年永躋仁壽之域則以佐助王化實有裨益是用紀文豐碑以昭示久遠焉

御選語錄總敘

如來正法眼藏。教外別傳。實有透三關之理。是真語者。是實語者。不妄語者。不誑語者。有志於道之人。則須勤參力究。由一而三。步步皆有著落。非可顛預函胡。自欺欺人。朕既深明此事。不惜話墮。逐一指明。夫學人初登解脫之門。乍釋業繫之苦。覺山河大地。十方虛空。並皆消殞。不爲從上古錐舌頭之所瞞。識得現在七尺之軀。不過地水火風。自然徹底清淨。不挂一絲。是則名爲初步。破參前後際斷者。破本參後。乃知山者山。河者河。大地者大地。十方虛空者十方虛空。地水火風者地水火風。乃至無明者無明。煩惱者煩惱。色聲香味觸法者色聲香味觸法。盡是本分。皆是菩提。無一物非我身。無一物是我己。境智融通。色空無礙。獲大自在。常住不動。是則名爲透重關。名爲大死大活者。透重關後。家舍卽在途中。途中不離家舍。明頭也合。暗頭也合。寂卽是照。照卽是寂。行斯住斯。體斯用斯。空斯有斯。古斯今斯。無生故長生。無滅故不滅。如斯惺惺行履。無明執著。自然消落。方能踏末後一關。雖云透三關。而實無透者。不過如來如是。我亦如是。從茲方修無修。證無證。妙覺普明。圓照法界。一爲無量。無量爲一。大中現小。小中現大。坐微塵裏。轉大法輪。於一毫端。現寶王刹。救拔衆生。利用無盡。佛佛祖祖。皆爲此一大事因緣。出現於世。達摩西

來。歷代授受。古德傳燈。無盡光中。大圓境裏。日往月來。以至於今。雖然。廣大法門。聖凡並託。華嚴香海。細
鉅同歸。得骨得髓者固多。如麻如粟者何限。去聖遙遠。魔外益繁。不達佛心。妄參祖席。金山泥封。慧日雲
蔽。約其訛謬。亦有三端。其上者。纔見根塵互引。法界相生。意識紛飛。無非幻妄。頓生歡喜。謂是真常。住去
歇去。以空爲空。不知性海無邊。化城無住。果能見性。當下無心。心既見空。卽未見性。於是形同槁木。心等
死灰。萬有到前。一空不敵。縱能立己坐脫。仍是業識精魂。況乃固執斷見。必至變作狂華。謂因果之皆空。
恣猖狂而不返。豈非一妄在心。恆沙生滅。能不造生死業。斷菩提根。又其下者。見得個昭昭靈靈。便謂是
無位真人。面門出入。揚眉瞬目。豎指擎拳。作識神之活計。張日下之孤燈。寶魚目爲明珠。覓梅檀於糞土。
噙著鐵丸。口稱玉液。到得臘盡歲除時。方知依舊是個茫茫無據。又其下者。從經教語錄中。挂取葛藤。從
諸方舉揚處。拾人涕唾。發狂亂之知見。翳於自心。立幻化之色聲。作爲實法。向真如境上。鼓動心機。於無
脫法中。自生繫縛。魔形難揜。遁歸圓相之中。解路莫通。躲向藤條之下。情塵積滯。識浪奔催。瞞己瞞人。欺
心欺佛。全是爲名爲利。卻來說妙說元。盲驢牽盲驢。沿磨盤而繞轉。癡夢證癡夢。拈漆桶爲瓣香。是則循
覺路而撲火輪。能不由善因而招惡果。如是三者。實齷有徒。宗旨不明。沉淪浩劫矣。朕膺元后。父母之任。
並非開堂秉拂之人。欲期民物之安。惟循周孔之轍。所以御極以來。十年未談禪宗。但念人天慧命。佛祖
別傳。拚雙眉拖地。以悟衆生。留無上金丹。以起枯朽。豈得任彼邪魔。瞎其正眼。鼓諸塗毒。滅盡妙心。朕實

有不得不言。不忍不言。近於幾暇。辨味淄澠。隨意所如。閱從上古錐語錄中。擇提持向上。直指真宗者。並擷其至言。手爲刪輯。曰僧肇曰永嘉曰寒山曰拾得曰滄山曰仰山曰趙州曰永明曰雲門曰雪竇曰圓悟曰玉林。十二禪師。藏外之書。曰紫陽真人。乃不數月之功。編次成集者。其他披覽未周。卽採掇未及。非曰此外無可取也。是數大善知識。實皆窮微洞本。究旨通宗。深契摩詰不二之門。曹溪一味之旨。能使未見者得無見之妙見。未聞者入不聞之妙聞。未知者徹無知之正知。未解者成無解之大解。此是人天眼目。無上宗乘。至於淨土法門。雖與禪宗似無交涉。但念佛何礙參禪。果其深達性海之禪人。淨業正可以兼修於焉。隨喜真如。圓證妙果。雲棲蓮池大師。梵行清淨。乃曾參悟有得者。閱其雲棲法彙一書。見論雖未及數善知識之洞徹。然非不具正知正見。如著相執有者之可比擬。亦採其要語。別爲一卷。以附於後。兼此淨土一門。使未了證者。建菩提道場。已了證者。爲妙覺果海途路之助。爰爲總序。弁於篇端。刊示來今。嘉惠後學。庶幾因指見月。得魚忘筌。破外道之昏蒙。奪小乘之淺弁。朕有厚望焉。

雍正癸丑四月朔日御筆

御製語錄後序

雍正十一年

朕少年喜閱內典。惟慕有爲佛事。於諸公案。總以解路推求。心輕禪宗。謂如來正教。不應如是。聖祖敕封灌頂普惠廣慈大國師章嘉呼圖克圖喇嘛。乃真再來人。實大善知識也。梵行精純。圓通無礙。西藏蒙古中外諸土之所皈依。僧俗萬衆之所欽仰。藩邸清閒。時接茶話者。十餘載。得其善權方便。因知究竟此事。壬辰春正月。延僧坐七。二十、二十一隨喜同坐兩日。共五枝香。卽洞達本來。方知唯此一事實之理。然自知未造究竟。而迦陵音乃踴躍讚歎。遂謂已徹元微。僮侗稱許。叩問章嘉。乃曰。若王所見。如鍼破紙窗。從隙窺天。雖云見天。然天體廣大。鍼隙中之見。可謂徧見乎。佛法無邊。當勉進步。朕聞斯語。深洽朕意。二月中。復結制於集雲堂。著力參求。十四日晚。經行次。出得一身透汗。桶底當下脫落。始知實有重關之理。乃復問證章嘉。章嘉國師云。王今見處。雖進一步。譬猶出在庭院中觀天矣。然天體無盡。究未悉見。法體無量。更當加勇猛精進云云。朕將章嘉示語。問之迦陵音。則茫然不解其意。但支吾云。此不過喇嘛教迴途工夫之論。更有何事。而朕諦信章嘉之垂示。而不然性音之妄可。仍勤提撕。恰至明年癸丑之正月二十

一日復堂中靜坐。無意中忽踢末後一關。方達三身四智合一之理。物我一如本空之道。慶快平生。詣章嘉所禮謝。國師望見。卽曰。王得大自在矣。朕進問更有事也。無。國師乃笑展手云。更有何事耶。復用手從外向身揮云。不過尙有恁麼之理。然易事耳。此朕平生參究因緣。章嘉呼圖克圖喇嘛實爲朕證明恩師也。其他禪侶輩。不過曾在朕藩邸往來。壬辰癸巳閒坐七時。曾與法會耳。迦陵性音之得見朕也。乃朕初欲隨喜結七。因柏林方丈年老。問及都中堂頭。僉云。只有千佛音禪師。乃命召至。旣見。問難甚久。其伎倆未能令朕發一疑情。迫窘詰屈。但云。王爺解路過於大慧果。貧納實無計奈何矣。朕笑云。汝等只管打七。余且在傍隨喜。爾時醒發因緣。已具述如左。若謂性音默用神力。能令朕五枝香了明此事。何得奔波一生。開堂數處。而不能得一人。妄付十數庸徒耶。向後性音惟勸朕研辨五家宗旨。朕問五家宗旨如何研辨。性音云。宗旨須待口傳。朕意是何言歟。口傳耳受。豈是拈花別傳之旨。堂堂丈夫。豈肯拾人涕唾。從茲棄置語錄。不復再覽者。二十年。此府中宮中人人之所盡知者。夫五家宗旨。同是曹溪一味。不過權移更換面目接人。究之皆是無義味語。所謂毒藥醜醜。攪成一器。黃金瓦礫。融作一團。用處無差。拈來有準。並皆一代之宗師。百世之模楷。柰庸流不了自心。累他塗污有分。鼓動識情。橫生法執。謬加穿鑿。取笑傍觀。明眼人前。不堪舉似。因見性音諄諄於此。是乃逐語分宗。齊文定旨也。甚輕其未能了徹。如使性音明知之。而勸朕於此打之繞。更是何心行也。則其限於見地可知矣。如達摩傳衣偈云。一花開五葉。結果自然成。

後世附會其說。以爲五葉者。五宗也。夫傳衣止於曹溪。則是從慧可而下。五世矣。因震旦信心已熟。法周沙界。衣乃爭端。不復用以表信。達摩黃梅之言具在。由可至能。豈非五葉後來萬派同源。豈非結果自然成耶。何得以五宗當之。且傳衣公案。世多圖圖吞棗。全未明白。世尊至多子塔前。命摩訶迦葉分座。令坐。以僧伽黎圍之。遂告曰。吾以正法眼藏密付於汝。汝當護持。繼又告迦葉。吾將金縷僧伽黎衣傳付於汝。轉授補處。至慈氏佛出世。勿令朽壞。世尊所分之座。究是何座。僧伽黎究竟是何物。如云卽是此金縷僧伽黎衣。從迦葉傳至六祖者。豈有自周昭王至梁武帝時。尚不朽壞。卽屬異寶。不可思議。便能常存世間。又與正法眼藏有何交涉。且自六祖以後。何以又復消泯。世尊明言至慈氏佛出世。勿令朽壞。乃未至唐時。卽已無存。豈世尊妄語誑語耶。且以僧伽黎圍迦葉者。又是何意。總之。未悟正法眼藏。從何推測。人必明取僧伽黎定。然留得到慈氏出世之故。然後可與論傳衣之事。何得支離穿鑿。妄定宗旨。更以五宗牽合附會耶。況五宗前後參差。亦非一時。卽五宗所明同是大圓覺性。宗若有五。性亦當有五矣。古人專爲勸情絕見。惟恐一門路熟。又復情見熾然。是以別出一番手眼。使人悟取衆生心。不能緣於般若之上。今乃轉以情見分別之。埋沒古人不少。朕旣深明本旨。只圖真實。以辦平生。豈肯被伊牽絆葛藤窠也。因一年之後。自清涼山回。宗教兩不拈提。迨卽位以來。十年不見一僧。未嘗涉及禪之一字。蓋此事實明者少。逐塊之流。徒勞延佇。求名之輩。更長業緣。而世閒井底蛙。又必妄生議論。朕愍諸有情無知愚陋。恐其因此

造諸謗般若大罪孽。不談之意。良非偶然。今見去聖日遠。宗風掃地。正法眼藏。垂絕如綫。又不忍當朕世而聽其滔滔日下也。乃選輯從上宗師喫緊爲人之語。刊示天下後世。使之擺脫生死根塵。掀翻輪迴。陷穿學者。當知朕今此舉。實爲佛祖慧命所繫。不惜眉毛拖地。非與十方常住行腳乘拂之徒。較論見地短長。朕此選出。莫又緝緝聚頭。妄論是何宗派。卻與朕莫交涉。在天下宗徒。能爲自己一大事。勇猛精進。如救頭然。立雪不寒。斷臂無痛。自然黑漆桶攔空撲破。玉麒麟就地勒回。那時方省得朕此一番話。墮無量慈悲。如或此心不真不誠。不苦不切。但從語言文字。放出見聞覺知。任情卜度。細意推求。此一則是臨濟宗。那一則是曹洞派。起模畫樣。滯相執緣。以此求契求證。所爲將空塞空。徒使朕與從上諸古德百千方便。亦如取聲鎖向匣中。吹網欲令氣滿耳。豈不鈍置人耶。朕在藩邸時。亦以本分事。接人不無漏逗。所有語句。並已刊入圓明居士語錄卷內。此外並無一則機緣。流布人世。況朕身居帝王之位。口宣佛祖之心。天下後世。理障深重者。必以教外別傳之旨。未經周公孔子評定。懷疑而不肯信。然此其爲害猶淺。若夫外託禪宗。心希榮利之輩。必有千般誑惑。百種聲訛。或曾在藩邸望見顏色。或曾於法侶傳述緒言。便如骨巖木陳之流。捏飾妄詞。私相紀載。以無爲有。恣意誇誇。刊刻流行。煽惑觀聽。此等之人。旣爲佛法所不容。更爲國法所宜禁。發覺之日。卽以詐爲制書律論。朕今此舉。實以教外別傳將墜於地。不得已而爲此。至於宗門能殺能活。能縱能奪之趣。皆由宗師所參不謬。所悟無垠。如千里駒。隨意舉步。便是追風逐日。

其不可及者。皆其所不自知。苟存一與奪自在。擒縱無偏之見於八識田內。則人法不空。能所交接。其與魔外有何分別。茲選之有正集、外集、前集、後集。而又諄諄提示。各序其旨於篇端者。專欲學人真參實悟。各得本分。正知正見。如象渡河。腳踏實地。便能超出三界。而一一具足六度萬行。切莫仍向此中轉求口頭滑利也。此事不由語言文字分迷悟。豈由語言文字定是非。已悟已證者。有語有句。固能爲人解黏去縛。若平生無一則機緣語句傳世者。豈得遂謂未悟未證乎。如西天四七。所垂言句甚少。東土二三。惟達摩曹溪尙傳語句。璨大師尙有信心銘一篇。其他二祖四祖。並無一語垂後。豈皆是未悟未證人也。應知何在語錄之流傳與否。乃近代宗徒。動輒拾取他人涕唾。陳爛葛藤。串合彌縫。偷作自己法語。災梨禍棗。誑惑人家男女。其口頭實能滑利者。便鳴鐘擊板。豎拂擎拳。彼建立則我掃蕩。彼掃蕩則我建立。各出妄見。爭持。大家一場懨懨。禮拜者作出身之活路。棒喝者成漂墮之黑風。如此心行。稱曰度人。佛祖門庭。豈不污辱。又如古人契證無差。每有拈代偈頌。以相印合。今則不然。不與契證處。自了自心。但於公案上。盲拈瞎頌。剽竊成語。差排牽合。爲可解不可解之語。作若通若不通之文。千七百則。皆可通融。百千萬言。無非活套。以此爲拈代偈頌。豈不塗污古人。誤累自己。有何交涉。虛費鑽研。夫講師詮解教典。何嘗不同於如來之語。而不得謂傳如來之心者。以心宗非語言文字所可傳。故曰教外別傳。今將教外別傳所有公案作文字。則是又成一教外別傳之教典矣。況文字邊事。欲其工妙。亦非聚數十年心力。不能到家。至非

得文字好。則此數十年不究本分可知。教外別傳只是本分二字。安可離卻。而爲此門庭以外事。拈代偈頌四者。頌最爲後學人於頌古切用工夫。遂漸至宗風日墜。此端一開。盡向文字邊作活計。趙州所呵枝蔓上生枝蔓。正爲此輩。至乃子孫稍得世榮。便欲將祖父言句。夤緣入藏。不思千古自有明眼人。豈得欺盡謾盡。夫本爲利益。將來流芳百世。夤緣入藏。而乃忘其貽誤後人。遺臭萬年也。何苦夤緣。自貽伊戚。平素一無所事。喫得飯飽。長連牀上。三三五五。握管伸紙。商量作一部好語錄。垂後。縱使句句如初祖所說。亦乃餽羹餽餅。與靈覺有何交涉。況此實非學問之所能及。思慮之所能到。何苦造大罪孽。同於謗佛。古人云。佛法不怕爛卻。又云。但得成佛。不愁不會說法。朕願天下宗徒。參則實參。悟則實悟。此是菩提道場。其中無求名利慮。於此尙不無污染。可見從初發心。便非真實爲生死出家也。若爲名利。何如耕農作一孝弟力田之民。不然。應試作一科舉文學之士。留此宗門。以待真正發心參學之人。免致塗污佛祖之慧命。朕閱指月錄。正法眼藏。禪宗正脈。教外別傳諸書。所選古德機緣語句。皆錯雜不倫。至於迦陵音所選宗統一絲者。尤爲乖謬。古人語句。專爲開人迷雲。後人選輯。專爲垂諸久遠。今乃挨門逐戶。拾取贖遺。或珠或璣。或金或鎗。或絲或布。或柴或草。或瓦或礫。或垢或膩。一家強收一物。入籠中。更有誇曰秉公。何庸愚之甚也。但圖人人有分。個個不遺。紛紜雜陳。撩亂錯出。科斗與神龍並游。野狐與獅子齊吼。飽參者尙或一時目迷。況初學之人。豈不觀之而愈惑。求之而愈遠。其爲毒害。奚可勝言。此選朕近日方見。未料性

音昏憤卑鄙。至於此極也。至於取本朝開堂說法之衲僧平生所有亂統。各各人編一則。錯雜不堪。謂之宗統一絲。直接西天四七。東土二三。真令人笑之齒冷。若然。則禪宗之統。實危如一絲也。其意不過取媚同門參學之徒。俾感其選錄伊祖。言句入集。以爲榮華。此何異世閒澆薄士子。彼此標榜。選刻文字。自稱名士乎。噫。可爲宗風太息流涕者矣。如朕於湧泉欣。天衣懷。韶國師等古德語句。寶之如摩尼夜光。赤刀大貝。而諸書所載極少。徧求不可復得。蓋瞿汝稷輩。自然皆是性音心行。既雜取下等語句。又畏繁多。自然將真正師範。至言轉播棄之。而不惜。歷年既久。漸以無傳。良可歎惋。因念從上古德。不肯以佛法當人情。一任香火歇絕。不妄付拂者。其與盲傳盲受。祇圖支派蕃衍之人。高下相去。天地懸隔。夫慧命絕續。正同父子。但與身體髮膚之稟受。其理相不可強同。強瓣香所承。定不容昧。但如朕所採語句中。諸禪師現在已無法嗣者。天下宗徒之祖父。豈得不從此摸著鼻孔。是則亦爲伊祖父生身之所自也。凡爲嗣續。正當飲水思源。奈何各立門庭。同於世閒種族。趙甲之家。不祀錢乙之祖。橫分畛域。各守封疆。況伊輩盲傳盲受。並未大死大活。有何法乳。所報何恩。倘從此選中諸禪師。垂示處得個入頭。是乃瓣香法乳之恩。理宜酬答者也。如或未能。則姑如先聖先賢列祀學宮之例。使人人致敬。要亦未爲不可。天下叢林古刹衲子。除各自供養伊本支祖父外。應將從來拔萃古德。一一設位於堂。朝夕供養禮拜。使其香火絕而復續。徧滿震旦。不但爲後世真參實學者勸。亦報本酬源之正舉。再者從上祖師設呵佛罵祖之路。蓋爲學

人聖見不除。則觸途成礙。苟不向腳跟下。如斬一握絲。一斬一齊斷。則見相橫前。仍泐此岸。夫如來直指靈鑑心體。不得破根塵相對之妄。亦乃破離妄絕對之真。真妄兩途。皆衆生無始以來之見病。大善知識。透天透地。泯妄泯真。是以掃空生佛之虛華。蕩盡妄真之閒說。喫緊爲人。無奈立此呵佛罵祖之說。所謂以慈悲之故。而有落草之談也。其實水月道場。空花萬行中。此等語言。何處安著。如德山鑑平生語句。都無可取。一味狂見恣肆。乃性音選宗。統一絲。採其二條。內一條。截去前後語言。專錄其辱罵佛祖不堪之詞。如市井無賴小人。詬誶實令人驚訝。不解其是何心行。將以此開示學人耶。是何爲耶。近世宗徒。未踏門庭。先決隄岸。一腔私意。唯恐若不呵佛罵祖。則非宗門。強作解事。學人饒舌。狐行象跡。鴉學鳳音。是何言歟。是何言歟。釋子旣以佛祖爲祖父。豈得信口譏訶。譬如家之逆子。國之逆臣。豈有不人神共嫉。天地不容者。閻羅面前。刀山劍樹。專爲此輩而設。極宜猛省。如南泉願牧水牯牛公案。最爲下品。因南泉願頗有本分之語。是以朕未加訶斥。而性音則於其他語句。槩置不錄。所錄二條。其一卽是此條。具此凡眼。有何聖見可除。輒敢見人呵佛罵祖。便生歡喜採輯。鴟鼠嗜糞。斯之謂矣。又如大慧杲云。今時宗師爲人。入室三五徧。辨白不出。卻教他說悟處。若恁麼地。如何爲人等語。此論大誤。從來如永嘉一宿覺之類。祇因當時但知教乘。初闡禪宗。所以一言半語。漏逗本分。皆胸襟流出。便可印合。自唐季以後。古德垂示。流布海內。人人拮據攘竊。預備應機。若不入室細扣。知其是何心行。朕亦頗能爲人。然實不能不令入室三五

徧而卽悉其底蘊。開堂說法。臨機問答。固不可無。若止憑一二語以定虛實。此盲傳盲受之根。大慧杲誤人謬論。叢林當爲炯戒。況大慧杲旣具如此眼目。所談奇妙法何耶。所得英俊才誰耶。朕實深嘗上乘圓頓甘露之味。非依牆摸壁率意之亂統。旣知之無疑。豈能不報佛祖深恩。因不辭話墮。竭力爲宗門一番整頓。所冀天下禪僧。改往修來。英靈輩出。如朕所選中諸禪師者。唱導十方。使如來正教有振興之象。是則朕之深願。如爾等僧徒。仍執迷不悟。將朕一片慈悲。全不領受。仍以無明縑素人我心會取。如世尊所說三藏十二分。一例束之高閣。則宗風之衰。朕亦無如之何矣。造輯旣竣。書此以爲後序。

雍正十一年癸丑九月朔日御筆

御製楞嚴經序

三藏十二部皆出自天竺。流通震旦。其自西達東。爲中途承接者。則實烏斯藏天竺。卽所謂厄訥特克烏斯藏。卽所謂圖伯特也。故今所譯之漢經。藏地無不有。而獨無楞嚴。其故以藏地有所謂浪達爾瑪罕者。毀滅佛教。焚燹經典。時是經已散失不全。其後雖高僧輩補苴編葺。以無正本。莫敢妄增。獨補敦祖師會授記。是經當於後五百年。仍自中國譯至藏地。此語乃章嘉呼圖克圖所誦梵典炳炳可據。朕於幾政之暇。每愛以國語繙譯經書。如易書詩及四子書。無不藏事。因思皇祖時。曾以四體繙譯心經。皇考時。曾錄而行之。是楞嚴亦可從其義例也。諮之章嘉呼圖克圖國師。則如上所陳。且曰。心經本藏地所有。而楞嚴則藏地所無。若得由漢而譯清。由清而譯蒙古。由蒙古而譯圖伯特。則適合補敦祖師所授記也。雖無似也。而實不敢不勉焉。因命莊親王董其事。集章嘉國師及傅熊諸人。悉心編校。逐卷進呈。朕必親加詳閱。更正有疑。則質之章嘉國師。蓋始事則乾隆壬申。而譯成於癸未。莊親王等請敘而行之。朕惟楞嚴者。能仁直指心性之宗旨。一落言詮。失之遠矣。而況譯其語。且復序其譯哉。然思今之譯。乃直譯佛語。非若宋明諸僧義疏會解。曉曉辯論不已之爲。譬諸飢者與之食。渴者與之飲。而非揀其烹調。引導其好嗜也。則

或者不失能仁徵心辨見妙諦。俾觀者不致五色之迷目。於以闡明象教。嘉惠後學。庶乎少合皇祖皇考宣揚心經之義例乎。

乾隆二十八年十月十八日。

御製清文繙譯大藏經序

爲事在人。成事在天。天而不佑。事何能成。人而不爲。天何從佑。然而爲事又在循理。爲不循理之事。天不佑也。予所舉之大事多矣。皆賴昊乾默佑。以致有成。則予之所以感賦奉行之忱。固不能以言語形容。而方寸自審。實不知其當何如也。武功之事。向屢言之。若夫訂四庫全書。及以國語譯漢全藏經二事。皆舉於癸巳年六旬之後。旣而悔之。恐難觀其成。越十餘載。而全書成。茲未逮二十載。而所譯漢全藏經又畢。歲夫耳順古稀。已爲人生所艱致。而况八旬哉。茲以六旬後所創爲之典。逮八旬而得觀國語大藏之全成。非昊乾嘉庇。其孰能與於斯。而予之所以增惕欽承者。更不知其當何如矣。至於國語譯大藏。恐人以爲惑於禍福之說。則不可不明示其義。夫以禍福趨避教人。非佛之第一義諦也。第一義諦佛且本無。而况於禍福乎。但衆生不可以第一義訓之。故以因緣禍福引之。由漸入深而已。然予之意。仍並不在此。蓋梵經一譯而爲番。再譯而爲漢。三譯而爲蒙古。我皇清至中國百餘年。彼三方久屬臣僕。而獨闕國語之大藏可乎。以漢譯國語。俾中外胥習國語。卽不解佛之第一義諦。而皆知尊君親上。去惡從善。不亦可乎。是則睽以國語譯大藏之本意。在此不在彼也。茲以耄耄觀事。實爲大幸。非溺於求福之說。然亦卽蒙天

福佑如願臻成所爲益深畏滿忱惕儆戒而已耳是爲序。
乾隆五十五年二月初一日。

高宗純皇帝御製喇嘛說

佛法治自天竺。即厄納特阿克部。其地曰痕都斯坦。東流而至西番。即唐古忒部。其地曰三藏。其番僧又相傳稱爲喇嘛。喇嘛之字。漢書不載。

元明史中。或訛書爲刺馬。陶宗儀輟耕錄載。元時稱帝師爲刺（讀作拉）馬。毛奇齡明武宗外紀。又作刺麻。蓋係隨意對音。故其字不同。予細思其義。蓋西番語謂上曰喇。

謂無曰嘛。喇嘛者。謂無上。即漢語稱僧爲上人之意耳。喇嘛又稱黃教。蓋自西番高僧帕克巴。舊作八思巴。始

盛於元。沿及於明。封帝師國師者。皆有之。元世祖初封帕克巴爲國師。後復封爲大寶法王。並尊之曰帝師。同時又有丹巴者。亦封帝師。其封國師者不一而足。明洪武初。封國師大國師不過四五人。至永

中。封法王。西天佛子者各二。此外封灌頂大國師者。樂灌頂國師者十有八。及景泰成化間。益不可勝記。我朝惟康熙年間。祇封一章嘉國師。相襲至今。我朝雖與黃教。而並無加崇帝師封

號者惟康熙四十五年。敕封章嘉呼圖克圖爲灌頂國師。示寂後。雍正十二年。仍照前襲號爲國師。其達賴喇嘛。班禪額爾德尼之號。不過沿元明之舊。換其襲敕耳。

黃教之興。始於明。番僧宗喀巴。生于永樂十五年丁酉。至成化十四年戊戌示寂。其一大弟子曰達賴喇嘛。曰班禪喇嘛。達賴喇嘛位居首。其名曰羅倫嘉穆錯。以化身掌黃教。一世曰根敦珠巴。二世曰根敦嘉穆錯。三世曰索諾木嘉穆錯。即明時所稱活佛鎖南堅錯也。五

世曰阿旺羅卜藏嘉穆錯。我朝崇德七年。達賴喇嘛。班禪喇嘛。遣貢方物。八年。賜書達賴喇嘛及班禪呼圖克圖。蓋仍元明舊號。及定鼎後。始頒給敕印。命統領中外黃教焉。

蓋中外黃教總司以此二人。各部蒙

古一心歸之。與黃教。卽所以安衆蒙古。所繫非小。故不可不保護之。而非若元朝之曲庇諂敬番僧也。元朝

尊重喇嘛。有妨政事之弊。至不可問。如帝師亦專席於坐隅。其帝子之號司徒。司空。國公。佩金玉印章。前後相望。怙勢睢恣。氣燄薰灼。爲害四方。不可勝言。甚至強市民物。拏捶留守。與王妃爭道。拉毆隨車者。皆釋不問。並有民毆西僧者。截手。詈之者。斷舌之律。若我朝之興黃教。則大不然。蓋以蒙古奉佛。最信喇嘛。不可不保之。以爲懷柔之道也。其呼圖克圖之相襲。乃以僧家無子。授之徒。與子何異。故必覓一聰明有福

相者。俾爲呼必勒罕。

卽漢語轉世化生人之義

幼而習之。長成。乃稱呼圖克圖。此亦無可如何中之權巧方便耳。其來已

久。不可殫述。孰意近世其風日下。所生之呼必勒罕。率出一族。斯則與世襲爵祿何異。予意以爲大不然。蓋佛本無生。豈有轉世。但使今無轉世之呼圖克圖。則數萬番僧無所皈依。不得不如此耳。

從前達賴喇嘛示寂後。轉生爲

呼必勒罕。一世在後藏沙卜多特地方。二世在後藏大那特多爾濟丹地方。三世在前藏對噶地方。四世在蒙古阿勒坦汗家。五世在前藏崇禋地方。六世在裏塘地方。現在之七世達賴喇嘛。在後藏托卜札勒拉里崗地方。其出世且非一地。何況一族乎。自前輩班禪額爾德尼示寂後。現在之達賴喇嘛。與班禪額爾德尼之呼必勒罕。及喀爾喀四部落供奉之哲布尊呼圖克圖。皆以兄弟姪姻。遞相傳襲。似此掌教之大喇嘛。呼必勒罕。皆出一家。幾與封爵世職無異。卽蒙古內外各札薩克供奉之大呼必勒罕。亦有各就王公家子弟內

轉世化生者。即如錫呼圖呼圖克圖。即係喀爾喀親王固倫額駙拉旺多爾濟之叔。達克巴呼圖克圖。即係阿拉善親王羅卜藏多爾濟之子。諾木綽爾濟呼圖克圖。即係四子部落郡王拉什燕丕勒之子。堪卜諾們汗札木巴勒多爾濟之呼必勒罕。即係圖舍圖汗車登多爾濟之子。似此者難以枚舉。又從前哲布尊丹巴呼圖克圖圓寂後。因圖舍圖汗之福晉有娠。衆即指以爲哲布尊丹巴呼圖克圖之呼必勒罕。及彌月。竟生一女。更屬可笑。蒙古資爲談柄。以致物議沸騰。不能誠心皈信。甚至紅帽喇嘛沙瑪爾巴垂涎札什論布財產。自謂與前輩班禪額爾德尼及仲巴呼圖克圖同係弟兄。皆屬有分。唆使廓爾喀滋擾邊界。搶掠後藏。今雖大振兵威。廓爾喀畏罪降順。匍匐乞命。若不爲之剔除積弊。將來私相授受。必致黃教不能振興。蒙古番衆猜疑輕視。或致生事。是以降旨藏中。如有大喇嘛出呼必勒罕之事。仍隨其俗。令拉穆吹忠四人降神誦經。將各行指出呼必勒罕之名。書籤貯於由京發去之金奔巴瓶內。對佛念經。令達賴喇嘛或班禪額爾德尼同駐藏大臣公同掣籤一人。定爲呼必勒罕。雖不能盡除其弊。較之從前各任私意指定者。大有間矣。又各蒙古之大呼必勒罕。亦令理藩院行文。如新定藏中之例。將所報呼必勒罕之名。貯於雍和宮佛前。理藩院堂官會同掌印之札薩克達喇嘛等公同籤掣。或得真傳。以息紛競。

去歲廓爾喀之聽沙瑪爾巴之語。劫略藏地。已其明驗。雖興兵進剿。彼卽畏罪請降。藏地以安。然轉生之呼必勒罕出於一族。是乃爲私。佛豈有私。故不可不禁。茲余製一金餅。送往西藏。於凡轉世之呼必勒罕。衆所舉數人。各書其名置餅中。掣籤以定。雖不能盡去其弊。較之從前一人之授意者。或略公矣。夫定其事之是非者。必習其事。而又明其理。然後可。予若不習番經。不能爲此言。始習之時。或有議爲過興黃教者。使予徒泥沙汰之虛譽。則今之新舊蒙古。畏威懷德。太平數十年。可得乎。且後藏煽亂之喇嘛。卽正以法。

上年廓爾喀之侵掠後藏。時仲巴呼圖克圖既先期逃避。而大喇嘛濟仲札蒼等。遂託占詞爲不可

守以爲衆喇嘛紛紛逃散。于是賊匪始敢肆行搶掠。因卽令將爲首之濟仲韞至前藏。對衆剝黃正法。其餘札蒼及仲巴呼圖克圖俱羣解至京治罪安插。較元朝之於喇嘛。方且崇奉之不暇。致使妨害國政。況敢執之以法乎。我朝雖護黃教。正合於王制所謂修其教。不易其俗。齊其政。不易其宜。而惑衆亂法者。仍以王法治之。與內地齊民無異。試問自帕克巴創教以來。歷元明至今五百年。幾見有將大喇嘛剝黃正法及治罪者。天下後世。豈能以予過與黃教爲譏議乎。

元朝曾有是乎。蓋舉大事者。必有其時與其會。而更在乎公與明。時會至而無公與明以斷之。不能也。有公明之斷。而非其時與會。亦望洋而不能成。茲之降廊爾喀。定呼必勒罕。適逢時會。不動聲色以成之。去轉生一族之私。合內外蒙古之願。當耄近歸政之年。復成此事。輯藏安邊。定國家清平之基於永久。予幸在茲。予敬益在茲矣。

御製十全記

昨准廓爾喀歸降。命凱旋班師。詩有十全大武揚之句。蓋引而未發。茲特敘而記之。夫記者志也。虞書朕志先定。乃在心。周禮春官掌邦國之志。乃在事。旅獒志以道甯。則兼心與事而言之。然總不出夫道得其道。乃能合於天。以冀承乎貺。則予之十全武功。庶幾有契於斯。而可志以記之乎。十功者。平準噶爾爲二。定回部爲一。掃金川爲二。靖臺灣爲一。降緬甸安南各一。卽今二次受廓爾喀降。合爲十。其內地之三叛。么騰。弗屑。數也。前已酉廓爾喀之降。蓋因彼擾藏邊界。發偏師以問罪。而所遣鄂輝等。未宣我武。巴忠乃遷就完事。致彼弗懼。而去歲復來。以致大掠後藏。飽欲而歸。是以罪庸臣。選名將。厲衆軍。籌儲餉。福康安等深感朕恩。弗辭勞苦。於去歲冬月。卽率索倫四川降番等精兵。次第由西甯冒雪而進。今歲五月。遂臨賊境。收復藏邊。攻克賊疆。履線險如平地。渡溜要若蹄涔。繞上襲下。埋根批吭。手足胼胝。有所弗卹。七戰七勝。賊人喪膽。及兵臨陽布。賊遂屢遣頭人。匍匐乞降。將軍所檄事件。無不謹從。而獨不敢身詣軍營。蓋彼去歲曾誘藏之噶布倫丹津珠爾等前去。故不敢出也。我武旣揚。必期掃穴犁庭。不遺一介。亦非所以體上天好生之意。卽使盡得其地。而西藏邊外。又數千里之遙。所謂不可耕而守。

者亦將付之他人。乃降旨允降。班師以藏斯事。昔唐太宗策頡利曰。示之必克。其和乃固。廓爾喀非頡利之比。番邊殊長安之近。彼且乞命。顛恩准之不暇。又安敢言和乎。然今日之宣兵威。使賊固意求降。歸順實與唐太宗之論有所符合。昔予記土爾扈特之事。於歸降歸順。已悉言之。若今廓爾喀之謝罪乞命。歸降歸順。蓋並有焉。以其悔過誠而獻地切也。迺知守中國者。不可徒言偃武修文。以自示弱也。彼偃武修文之不已。必至棄其故有而不能守。是亦不可不知耳。知進知退。易有明言。予實服膺弗敢忘。而每於用武之際。更切深思。定於志。以合乎道。幸而五十七年之間。十全武功。豈非天貺。然天貺逾深。予懼益切。不敢言感。兢兢惶惶。以俟天眷。爲歸政全人。夫復何言。乾隆五十七年歲次壬子孟冬月之上澣御筆。

御製詩乾隆癸丑

攻克擦木之圖

今爲歸順昔歸降。一廓爾喀事有雙。未示兵威且利啗。豈知乞命獻誠腔。可嘉名將及勇士。何礙存卬遂定駟。擦木首攻卽前進。戰圖補詠靖蕃邦。

攻克瑪噶爾轄爾甲之圖

乘勝遂教鼓勇前。瑪噶爾轄地相連。密林伏賊將守險。峭壁降兵條破堅。其目七名衆六十。生擒以半別殲全。雖云不戰功爲上。戰卽成功合詠篇。

攻克濟隴之圖

番境濟隴西極邊。賄求彼尙占依然。石牆木卡層層固。據險阻堅處處連。冒雨衝宵分路進。破碉克寨一時全。近千殲賊復藏地。多害生靈亦覺憐。

攻克熱索橋之圖

復全番境臨廓境。一水橫流熱索河。其北其南賊宵禦。卽深卽險我須過。索拉直進大剿彼。峩綠上游繞壓他。乘勝正兵架橋渡。莫非天助感誠多。

攻克協布魯之圖

熱索橋過路可通。未逢賊禦進追窮。前臨協布覘屯聚。上繞橫河得壓馮。無不克攻戰必勝。有餘力蓄剿爭雄。堪嘉敵愾心同一。每閱飛章憐切衷。

攻克東覺山之圖

愈近賊巢守愈固。兼之地更險而紆。分兵爭首穿幽阻。合隊埋根克要區。手足胼胝胥憤竄。精神鼓舞益勤劬。有征無戰雖傳古。將惠兵忠實快吾。

攻克帕朗古之圖

分路橫河帕朗進。乞恩越切越毆還。將軍所檄都遵命。堪布曾遮懼見顏。何必犁庭不遺介。遂教振旅一時班。年前捧表陪臣至。更有崇恩厚賜頒。

廓爾喀陪臣至京之圖

七戰由來七獲捷。歷觀悼史鮮誠逢。自惟罪重徹原號。可示恩寬復舊封。繳冊還金歸次第。承筐載橐俾從容。乃知德服勝威服。昊貺欽蒙茲勵恭。

公拉布丹納木札勒之敕。乾隆四十七年三月十六日。奉上諭。據轍登多爾濟等奏。哲布尊丹巴呼圖克圖之父公索諾木達喜。于三月二十七日病故。所遺公爵。哲布尊丹巴呼圖克圖欲致信達賴喇嘛。請以其弟拉布丹納木札勒承襲之處。令其暫行停止等因。請旨具奏前來。索諾木達喜曾受朕恩未久。卽行病故。殊屬可憫。朕甚軫念。著于彼處銀內。賞給索諾木達喜銀五百兩。做好事。其所遺公爵。既據哲布尊丹巴呼圖克圖請以其弟拉布丹納木札勒承襲。著照所請。卽令拉布丹納木札勒承襲。欽此。

札薩克頭等台吉策稜旺楚克多爾濟之敕。奉天承運皇帝制曰。朕惟尙德崇功。國家之大典。輸忠盡職。臣子之常經。古聖帝王。戡亂以武。致治以文。朕欽承往制。甄進賢能。特設大武勳階。以彰激勸。受茲任者。必忠以立身。仁以撫衆。智以察微。防姦禦侮。機無暇時。能此則榮及前人。福延後嗣。而身家永康矣。敬之勿怠。

諾彥和碩齊係貝勒婆羅柰之弟。從前管理哈拉烏蘇喜拉依古勒兵之時。婆羅柰曾以諾彥和碩齊感激主恩。操練兵丁。黽勉從事。奏請賞以微職。以示鼓勵。由軍機大臣議給諾彥和碩齊蒙古札薩克管旗章京職銜等因。具奏奉旨。婆羅柰之弟諾彥和碩齊。著賞給札薩克頭等台吉職銜。沒後。令其弟色臣哈什哈承襲。札薩克頭等台吉。沒後。于乾隆五年。令其弟齊旺多爾濟承襲。札薩克頭等台吉。沒後。于乾隆十年。奉上諭。朕加恩將諾彥和碩齊給以札薩克頭等台吉。令伊弟等承襲以來。俱能誠心黽勉盡職。現

在齊旺多爾濟之札薩克頭等台吉王婆羅柰。既請以齊旺多爾濟之兄諾彥和碩齊之子旺堆承襲。著照所請。加恩令旺堆承襲。該部知道。欽此。欽遵。卽令旺堆承襲札薩克頭等台吉。沒後。于乾隆三十一年。令伊子索諾木拉喜承襲札薩克頭等台吉。沒後。于乾隆五十七年。令伊子策稜旺楚克多爾濟承襲札薩克頭等台吉。仍著世襲罔替。

頭等台吉卻多爾旺曲之勅。奉天承運皇帝制曰。云。敬之勿怠。奉旨。部議甚是。應卽依議行。但札喜納木札勒之祖索諾木丹津。究爲生前輩達賴喇嘛之人也。茲達賴喇嘛業已圓寂。所有索諾木丹津之公爵。若以其子孫已襲兩輩。將來札喜納木札勒缺出時。竟行削去。毫不議給世職。朕心亦爲不忍。若以公爵世襲罔替。與例且又不便。朕念前輩達賴喇嘛。俟札喜納木札勒出缺後。將公爵削去。加恩賞給頭等台吉。世襲罔替。著爲令。永遠遵行。欽此。沒後。于乾隆五十七年。奉上諭。據鄂輝等奏。輔國公札喜納木札勒現已出缺。請以伊子卻多爾旺曲承襲頭等台吉等語。著照所奏。卻多爾旺曲准其承襲頭等台吉。餘依議。欽此。

四等台吉策稜仲甲卜之敕。奉天承運皇帝制曰。云。敬之勿怠。奉上諭。據福康安等奏。查問戴琿薩木珠靈巴傷亡一案。緣去年在生格宗地方與廓爾喀打仗時。曾受鎗傷。嘔血而故。是實等語。薩木珠靈巴打仗受傷。嘔血而故。亦屬可憫。著加恩交部照傷亡例議卹。欽此。薩木珠靈巴傷亡後。議給伊子策稜仲甲卜四等台吉。世襲罔替。

刻衛藏通志後敘

大鈞塊坳。萬物芸生。準之大易。六位三才之中。動物惟人爲最靈矣。有形有氣。有知有義。無先覺以覺衆。覺則其羣渙而无所統束。恐禍亂之相尋。堯舜也。昊綽。上帝好生。作之君。以宰赤縣神器。政於是出。作之師。以三物四術。整齊之。教於是生。中古之世。君師政教合於一。孔孟纂述六經以後。君師政教分而爲二。漢之文景光武。唐之文皇。宋仁宗。元世祖。一統之君。而德不能兼教化。董仲舒。鄭君。王通。韓愈。朱子。一經之師。而位不得佐政令。治有統系。道有宗主。扶輿滂礴。二千年離而復合。始集景運於我。韜聖祖仁皇帝。於是君師政教出於一矣。是有實焉。有權焉。惡可以無說。粵稽聖祖高宗。經筵日御。發擲天筆。纂述易。尚書。三禮。四詩。春秋。內傳。諸家箋解。平其得失。攷立學官。御纂性理精義。淵鑑齋。朱子全書。排比四庫。整齊百家。以示學林塗軌。操之以治律歷。制禁令。齊六職。決百事。宰制成器。陶冶庶彙。非以盡其實耶。兼崇黃教。綏服北徼。西域。蒙準。回部。用借根方。立天元術。擢任司天臺官。利瑪竇。南懷仁。湯若望等。擅究疇人天算。太常鍾律之度數。測量地輿。尋究河源。作皇輿表。有圖有考。以宅土物宜。敬授民時。農務物產。貿遷有無。北設市場於尼布楚。恰克圖。南立市舶司於交廣。蠻募。蠻耗之間。貴貨易土。通商惠工。以美利利。

天下非以通其權耶。皇哉唐哉。唐哉皇哉。古今聖治邗隆。莫備於康熙。如日月之經天。嶽瀆之緯地矣。實者。經也。常道也。二百六十年中。在位通人。處逸大儒。亦既推闡盡致。家握隨珠。而人懷荆璧矣。權者。緯也。通道也。囊括九邊。鞭笞四海。聲教訖於殊域。徵之禮曰。五方之民。言語不通。嗜欲不同。修其教。不易其俗。齊其政。不易其宜。鼓之以雷霆。潤之以風雨。於是列聖宰制天下之機權出焉。大制不割。割善戒無轍迹。內而諸夏。經制彬彬。亦既景鑠。融矣。外而蒙準。回康。烏斯藏各部。崇黃教以綏輯。鎮撫之。於此見至仁之覆育。於此見大慈之枕被焉。粵稽太宗文皇帝。始膺寶命。達賴刺麻實始率喀爾喀四十八部。崇上尊號。肇基王迹。爰拓北陲。景陵敕撫。遠大將軍十四貝子。及將軍延信等。伐定西藏。復布達拉坐牀之地。以國語。蒙文。蠟丁。唐古忒。四體文。繙譯心經。秦陵獎。頗羅。甯歸順。錫之郡王爵。仍設駐藏大臣。鎮之。御選祖燈語錄。校刻北藏。修多羅十二部。裕陵始革藏王爵。凡衛藏事。一裁之。駐藏大臣。與達賴班禪參決之。以清文繙譯全藏。俾廣流布。製金奔巴餅。以定呼弼。勒罕之真偽。在易。風行地上。觀聖人以神道設教。豈佔畢小儒所能窺測萬一乎。藉謂必如儒者所云。人其人。火其廬。焚其書。而後可。適所以激邊衅。而示以聖道之不廣。何所見之慎乎。且彼西域之衆。太蒙之人。必有政以齊其吏民。必有教以化其頑梗。太西各邦。政教互權。昔合而今分。此亦天地自然之符。人事推激之分數然也。前史稱絕之未知其利。通之未見其害。籌邊事者。惡可以不列心焉。然則繇此以推。聲教所暨。流通無礙。風雨露雷。莫非神化。滋液滲漉。何生

不育。不廢摩哈默之天方教。可以收回哈薩克布魯特以西諸部。兼行爾撒之摩西十誡。佛說四十二章。維列小乘經。乃最初義經。

云身三口四意。三是有十惡行。能戒止十惡。即名十善行。嗣又鑿攝其教。爲三歸五戒。摩西本之。而小變其科旨。乃西域婆羅門之枝流也。涅槃經。如來性品。阿噶伊郁等十四音。亦英法文二十六字母之祖。欽定同文韻統詳之。是亦譯官舌人之所當知者也。唐

碑所謂景教者。苟仿釋典。使高才潤色之。以彼教治彼族。可以維婁西牛賀諸大洲。借權寓實。我列祖列宗。不已微示機括矣乎。今三衛之墜。銜接巴裏二塘者。七鬯晏然而雅魯藏布江下游。則割入英緬。三藏

之南邊。絨轄江孜。定日。帕克里與英圭黎接壤。新定市。埔於亞。東哲孟雄全歸彼。英語稱西金。現隸孟加臘印督。廓爾喀。布

魯克巴則尙羈縻兩屬。亦黃教地也。布魯克巴一名布坦。紅教喇嘛地。服役輸貢於布達拉商上。作木朗。洛敏湯則已并合無存。揆之因其

教不易其俗之義。類族辨物。分別部居之方略。微特回黃兩教可用。卽景教各源流。亦何嘗不可與之導其竅會。發其枝離。施其銜轡。以使之同歸文字聲音。威儀教化之域哉。傳曰。稟以行權。其在斯乎。其在斯乎。爰先校刻此衛藏通志二十卷。以爲之椎輪。以俟大輅焉爾。

光緒二十有一年龍集乙未冬十月吉日。賜進士出身。分巡徽甯池太廣兵備道。雲騎尉。前記名御史。戶部郎中。會典館纂修官。臣袁昶恭敘。

按此書係請前戶部主事桂林龍松岑先生繼棟校刻。伊未署名。詳見先公文集中附記。并云原本未著姓氏。疑卽爲和琳所輯云。

衛藏通志校字記

卷首

聖祖御製平定西藏碑文。因而允從拉藏。苦苦腦兒。羣衆公同之請。謹案。苦苦腦兒。聖訓作青海。皇朝通考作庫克淖爾。西藏記作庫庫腦兒。或繙譯之文。或聲轉之字。賜今呼必爾罕册印。封爲第六輩達賴喇嘛。安置禪塔。謹依聖訓諸書。改作安置禪榻。餘字俱謹遵。改不悉錄。

高宗御製十全記。以致大掠後藏。飽欲而歸。謹案。聖訓此句下。有使長此以往。彼將占藏地。嚇衆番。全屬無遺類矣。東華全錄作全蜀無甯歲矣。此書佚此數句。

然天貺愈深。予懼益切。不敢言感。兢兢惶惶。以俟天眷。爲歸政全人。夫復何言。謹案。聖訓不敢言感句下。有唯恐難承句。提要。

第五條。今案。此寫本無此門。僅有查達賴喇嘛班禪幾輩譯文之覆呈。原在詩文門。今移入喇嘛

門後。

第十一條。今案。此亦佚。僅有查西藏公爵台吉各勅之覆呈。亦原在詩文門。今遂附喇嘛門之後。

第十二條。今案。陞調章程。略見於番目門內。品級俸祿。亦略見撫卹折價門內。並無準章。

第十三條。今案。唐碑。見寺廟門內。乾隆御製十全記。今已敬編卷首。關帝廟碑。原載寺廟門。大招

紀功碑。後藏碑。均原載紀略門。恤出痘碑等。今附撫卹門後。

第十四條。今案。寺廟門。僅有雙忠祠碑。附有同殉之主事參將各一人。並未別見旌忠祠。及殉忠

人名。

第十五條。今未見。

第十八條。今未見。

第十九條。今案。有部落一門。却無沿革。

第二十一條。今案。此亦佚。惜乎令人不審名從主人之義。姚瑩之蕃爾雅。亦尙未詳。

第二十四條。今案。原有職掌一門。而於糧臺文員殊略。

第二十五條。今案。此亦佚。

第二十七至三十條。三十三至三十六條。三十九至四十條。今書暨未見。

卷一。

引通典語。悉照改正。共二十二處。

後漢書。張騫但著地多署溼乘家。其奉浮圖不殺法。而精文善導達之功。靡所傳述。今案。此後漢

書西域傳論。多脫誤。已照改。

案語。齊集遠近大小喇嘛於大招各經。案。各字疑。

元以西僧教瓦班爲翰林學士承旨。案。元史。無學士字。

卷二。

乾隆五十七年九月。和琳成德奏廓爾喀遣哈斯達爾一摺。奉硃批。所辦得理。好。欽此。謹案。聖訓作所辦得體。好。

乃仰仗天威平定之後。聖訓作及仰仗天威平定之後。

亦必益加感畏。實爲得當。聖訓作亦必益加感畏。辦理實爲得當。

西界又自定結至薩熱喀山頂。案。山川門作杏撒熱喀山。此無杏字。與西藏賦注同。

南界怒江之水。不知其源。案。山川門已有考。此四至八到多用西藏賦注。故失照。

卷三。

康熙六十年二月。

上諭廣詢方言乃得其真。謹案聖訓云務得其正。

今大兵得藏邊外諸番悉歸仁化。謹案末句聖訓云悉心歸化。

其山川名號蕃漢異同當於時考證明核。謹案末句聖訓云當於此時考證明核。

大概中國諸水皆發源於東南內外大幹。謹案聖訓云中國諸大水皆發源於東南諾莫渾烏巴

西大幹內外。番名岷捏蘇。謹案聖訓云岷尼雅克撮。

金沙江之源自達賴喇嘛東北烏蘇流出。謹案聖訓云自達賴喇嘛東北烏尼烏蘇流出。

此諸水自東南大幹之內故發源於西番流入中國也。謹案聖訓云此諸水在諾莫渾烏巴西大

幹之內故發源於西番流入中國也。

此諸水在東南大幹之外故皆流入南海也。謹案聖訓云此諸水在東南諾莫渾烏巴西大幹之

外故皆流入南海也。

打箭鑪之西南達賴喇嘛所屬拉里城之東南為喀木地方。即康也達賴喇嘛為危地。烏斯與危衛同音也班禪呼

圖克圖為藏地合三地為危地耳。謹案聖訓云打箭鑪西南達賴喇嘛所屬為危地拉里城東南

爲喀木地。班禪額爾德尼所屬。爲藏地。合三地爲危地耳。

牛魔山注。每歲送老工夾布於其上。案。康輜紀行云。卽四川通志所謂打牛魔王也。

工湯拉。別作貢尙拉。彭楚河。別作蚌楚河。普出河。別作普楚河。如此之類。各仍其舊。以博異名。

藏布江注。有木船度船爲渡。案。當是有木船皮船爲渡。

金沙江注。又有威依木查鄂模二池之水。案。水道提綱作又有威衣木查鄂模。色勒錯鄂模二池

之水。

青海注。其東北有巴顏池。周四十餘里。有功額池。周五十餘里。今案。功額池在青海之南。謹據一

統志。一統輿圖。水道提綱各書。增入南字。

岷江注。入江之水。有黑水河。有二源。北源出九里古拉達巴罕嶺。在岷江南源之西南。東北流。折而

東南。入四川界。案。黑水二源。只見北源。今補於此。其南源西南。自山中東北流來。會又東南流。

入邊。又東南折南。復東南流。至長甯堡西北。與大江會。

卷四。

巴塘至察木多路。江卡至黎樹宿注。七十里至黎樹。至王卡。稱爲惡八站。案。別本同。論文義。當云

七十里至黎樹。自黎樹至王卡。稱爲惡八站。洛加宗至俄倫多尖。乍了宿注。乍了有寺院。卽會

典圖注之札雅廟也。乍了札雅長短言之分。本書乍了多誤了。今改正。

前藏至後藏。白浪至札什倫布。注。過洋楮橋。卽雅蛟藏布大河。案。雅蛟藏布河。本書未見。

松筠巡邊記。拉木洛洛協噶爾。案。四川通志。此句作拉攷羅羅。上工程站。拉木。卽拉子。洛洛。卽羅

羅。通志此文無何至如入無人之境以下九句。

前藏至生根物角。案。卽王我師藏鑪總記之松根阿腳。本書別亦作生根物角。僧生根物格。皆重唇

輕唇之異。

前藏至生根物角。四百十里。至騰格爾諾爾。本條未載。後有專條。

兩河口分路至青海路。八百四十里。分作十四站。至巴漢海流圖。本條未載。見於獨磊出庫至西甯

路中。

兩河口至河州首。九站至熱黨。本條亦未載。見前兩河口至舊洮州程中。

打箭鑪由霍耳德爾格草地至察木多。地名格蔥。案。衛藏圖志作林蔥。本書部落門亦作林聰。翻

譯無正字。

打箭鑪由草地進藏路。約同定同古。案。衛藏圖志作納定同古。

藏程紀略。平逆將軍延。案。康熙五十九年。授都統宗室延信爲平逆將軍。遠近西海青海各國。

蒙古諸王部落皆以來見。案皆以來見下應有脫字。封然無聞。當是封燕然山。然字單用少見。其兩岸爭妍句疑有脫字。

卷五

高宗御製喇嘛說注。宗喀巴二大弟子。以化身掌黃教。一世曰根敦珠巴。二世曰根敦嘉木磋。三世曰索諾木嘉穆錯。五世曰阿旺羅卜藏嘉穆錯。謹案此必寫本漏書四世一條。今以康輶紀行所引經簿敬補於此。

第四輩名雲丹嘉木磋。生於明萬曆十七年己丑。生蒙古地方敬格爾家。十五歲至藏。在噶勒丹坐台之桑結仁慶處出家。班禪羅卜藏曲津處受大戒。萬歷間封爲沙達布多爾濟桑結。能驅邪逐祟。曾於石上踏留足印。

卷六

招拉筆洞寺。其南山生下爲藏之峯山。案此語費解。必有誤。

大招寺唐碑。案此本闕誤。與一統志西藏記所錄互有得失。今悉仍其舊。而錄一統志西藏記於此。以資考證。

一統志唐碑

大唐文武孝德皇帝、大蕃聖神贊普、舅甥二主。商議社稷如一。結立大和盟約。永無淪替。神人俱已證之。世世代代。使其稱贊。是以勒石留傳之於後也。文武孝德皇帝與聖神贊普二聖。濬哲鴻被。曉久永之化。垂矜愍之情。恩覆並無內外。商議協同。務令萬姓安泰。施恩如一。成久遠大治之績。茲者同心以申鄰好之義。共成厥美。今漢蕃二國所守見管封疆。洮岷之東。屬大唐國界。其塞之西。盡是大蕃地土。彼此不爲殺敵。不舉兵革。不相侵牟。封境或有積阻。捉生問事。給以衣糧。放歸。令社稷山川無擾。各敬人神。然舅甥相好之義。苦難每須通傳。彼此相倚。二國常相往來。兩路所遣唐差蕃使。並於將軍谷交馬。其洮岷之東。大唐供應。清水縣以西。大蕃供應。須令舅甥親近之禮。使其兩界煙塵不揚。同聞頌德之名。永無驚恐之慮。行人撤備。鄉土俱安。並無相擾之犯。垂恩萬代。則稱美之聲。徧於日月所照矣。蕃於蕃國受安。漢亦漢國受樂。各依此盟誓。永不移易。當三寶及諸賢日月星辰之下。刑牲設誓。如有不依此言。背約破盟者。受其殃禍也。蕃漢君臣。並稽首告立。周細爲文。二君之德。萬載稱揚。內外蒙庥。人民咸頌矣。

西藏記唐碑

大唐文武孝德皇帝、大蕃聖神贊普、舅甥二主。商議社稷如一。結立大和盟約。永無淪替。神人俱以證知。世世代代。使其稱贊。是以盟大節留傳知於後也。文武孝德皇帝與聖神贊普德之黎贊陛下

二聖睿哲鴻被。曉之今永化亨。矜愍之情。恩覆其無內外。商議叶同。務令萬姓安泰。所思如一。成久遠大治之績。茲觀同心以伸。儻好之義。共成厥美。今蕃漢二國所守。見官封疆。洮岷之東。大唐國界。其塞之西。盡是大番地土。彼此不爲殺敵。不舉兵革。不相侵謀。封疆或有積阻。捉生問事。設給以衣糧。放歸。令社稷山川無擾。各敬人神。然舅甥相好之義。苦難每須通傳。彼此相倚。二國常相往來。兩路所差。唐差蕃使。並於將軍谷交馬。其洮岷之東。大唐供應。清水縣之西。大番供應。須令舅甥親近之體。使兩界烟塵不聞。同揚盛德之名。頻無驚恐之慮。行人撤備。鄉土俱安。禮無相擾之犯。垂恩萬代。則稱羨之聲。遍於日月所照矣。蕃於蕃國受安。漢亦於漢國受樂。茲合其大業耳。各依此盟誓。永不移易。當三寶及諸賢日月星辰之下。且陳形俱爲盟設。此大誓約。如有不依此誓。蕃漢背約破盟者。來其禍殃也。倘傾覆以及動陰謀者。不在破盟之限。蕃漢君臣。並稽首告立。周細爲文。二君之德。萬載稱揚。內外蒙庥。人民咸頌矣。

此碑日久剝蝕。字多脫落不存。

白木薩欲修廟宇。案卽上文之拜木薩。白拜雙聲。

小招寺墨珠多爾濟。卽上文墨居多爾濟。別又作珠多吉。皆聲轉及長言短言之異。今兩存之。岡堅寺。生多寺。距札什倫布一站。疑與前岡堅喇嘛寺。距札什倫布一站相複。

福康安關帝廟碑。於惠齡和琳孫士毅皆書號。於體未協。皆易之。後營官寨關帝廟碑亦同。均更正。打箭鑪聖祖御製惠遠廟碑文。今恭迓卷首。

卷七

乾隆五十七年十二月。福康安等奏邊界營官酌定陞擢疏。如此懲勸有方。番目皆知奮勉。亦永資綏靖矣。案別本同。永資綏靖上。疑有番民或邊民字。四川通志載此疏。祇作如此秉公甄拔。庶幾有所勸懲。無末二句。

卷八

會奏火藥就本地配造疏。所用工料。雖校內地昂貴。而所用腳價。較之內地運來。節省至三十餘萬之多。案四川通志作節省至十餘萬之多。

卷九

乾隆五十七年八月二十七日。上諭三道。謹案。聖訓載在正制度門。併作一道。語意視此簡。

卷十

乾隆五十七年十一月。大學士公福康安等會奏。所有巴勒布舊錢。與商上原鑄錢文。每圓總有銅二三分。成色較低。應將商上原錢及巴勒布舊。若概令繳銷。勢所不能。議令每紋銀一兩。易換八

圓與嗣後鼓鑄足色銀錢示以區別。案應將商上二句跳衍在上。今改正。

卷十一

案條例原目作章程。此卷實已分見各門。今姑以彙輯。可備考察。悉仍其舊。

卷十二

乾隆五十七年十二月。軍機大臣議覆福康安等奏。每年巴勒布止准貿易次。克什米爾止准貿易一次。案四川通志作每年巴勒布止准貿易三次。查本書條例門亦作三次。今據增入三字。

卷十三

噶弼平定西藏奏疏。案各處俱作噶爾弼。吹木丕勒宰桑。卽東華錄之吹穆只爾寨桑。章名

爾自榮。卽東華錄之章米爾榮。

一由類烏齊。結結樹冰噶。三達奔卡爲正兵。案結結樹冰噶。卽程站門之結樹邊卡。三達邊卡。卽

三大徧關。

閏四月初四日。和琳奏。恩達至嘉裕橋四站爲內烏齊地方。案內烏齊。卽類烏齊。類伍齊。

卷十四

辦理撫卹款項諭第二款。注於嘉慶二年春照依第五條云云。此書所載駐藏大臣姓氏。至乾隆五

十九年止。此處更著嘉慶年事。是此書編於嘉慶時。第七款阿第素章嘎。第十款噶舒克卽執照。姚瑩之蕃爾雅無之。不解何物。

松筠責革營官巴素多爾濟片。後半葉夾縫有硃批三處。一在隨經千總李臻把總胥耀宗訪出句旁。批此二人可嘉五字。一在枷號示懲句旁。批好字。一在如始終奮勉遇有該省缺出再行陞補句旁。批是字。

札什倫布經費。除所管營官並各寺喇嘛口糧。日食糧食八萬七千一百九十克。茶二百一十二甌半。散茶二克半。案。二克半爲數少。與上下數目懸殊。疑有脫字。

松筠奏閱邊撫卹番民摺。夾縫有硃批三處。一在尙有沿邊之薩喀呵哩帕克哩定結絨轄六處句。於定結字側。批好字。一在其唐古忒各世家及達賴喇嘛親屬人等概不準私用烏拉句側。批是字。一在此項差徭永行禁止並嚴飭噶布倫各營官句側。批是字。

卷十五

達木蒙古乾隆十六年三月奉上諭兩道。謹案。聖訓併爲一道。在賞賚門內。

四十族住牧地界。上隆布族東至受地方蒙古爾津。案。藏地多以一字名地者。如朗。如嶺。如色。如降。此受及下文上阿克碩族之力。皆一字地名。藏衛康卽其例也。

西甯管轄四十族。今祇載三十九族。案西藏記上阿拉克碩族之下。尙有下阿拉克碩族。此似佚寫。以上四十族之戶口。與後三十九族之戶口。皆子目與總數不符。

西藏管轄三十九族。夥爾札麻蘇他爾。西藏記連下。只多族爲一是。樸族與上三札族。東西南

北四至全同。疑樸族。西藏記作樸俗。

此七十九族譯字。往往對音而殊字。不備述。

布魯克巴注。前赴適中之汪則城。解勸和合。案下文兩奏書俱云貝勒親至。則汪宣諭。汪則則汪。

不知是一是二。西藏記上文亦作汪則城。兩奏書卻作則江。疑汪之訛。

庫呢注。其部長名熱哨烏爾。生嘉慶。至丙辰遣人來藏。案生嘉慶上下有脫誤。

白木戎注。婦女下身亦用布遮。穿一中衣。案當如西藏記作重穿一中衣。大据招羊。案西藏

記。康輜紀行等書皆作大据招羊。字書並無据招字。

乍丫注。闡教黃教諾們罕之印。案康輜紀行作講習黃法那門汗之印。

察木多注。闡教呼圖克圖。康熙五十八年。始頒正呼圖克圖印。其二呼圖克圖住察木多大寺。三呼

圖克圖住甲拉克大寺。注俱詳喇嘛門。今喇嘛門不見。

巴塘安撫司十一巴塘。案通考巴塘係正副宣撫司。通考成於乾隆十二年。此當係後改。瓦述

斜科。卽通考瓦述餘科。可證漢褒斜道作褒余道。德爾格。通考作德爾格式宣撫司。屬雅州府。

長官司霍耳東科。通考作宣撫司。

打箭鑪安撫司。六拉滾。不見於通志。

卷十六。

第六葉佛說藥王藥上二菩薩經。案。龍藏目錄作觀藥王藥上二菩薩經。佛說法門經。案。龍藏

目錄作佛語法門經。

第二十二葉佛說辟除諸惡陀羅尼經。注。十二經同卷。案。自佛說俱枳羅陀羅尼經以下。實祇十

一經。龍藏有佛說旃檀香身陀羅尼經。在妙色陀羅尼經後。此佚。

第二十三葉佛說八種長養功德經。注。四經同卷。案。以上僅三經。龍藏尚有穢迹金剛法禁百變

法門經。此佚。

第三十二葉佛說大安般守意經。下未注卷。今依龍藏補入。

第三十四葉佛說觀身經。案。龍藏作身觀經。

第三十六葉佛說額多和多耆經。注。八經同卷。案。此祇七經。龍藏佛說耶祇經之下。尙有末羅王

經。此佚。其餘經同名。而但字有增減者。不悉錄。

衛藏通志目錄

卷首新編

御製詩文

卷一 考證 以下悉仍舊編

卷二 疆域

卷三 山川

卷四 程站

卷五 喇嘛

卷六 寺廟

卷七 番目

卷八 兵制

卷九 鎮撫

卷十 錢法

卷十一 貿易

卷十二 條例

卷十三 紀略 原一卷今分爲上中下三卷

卷十四 撫卹 原未列入門類今新編入分爲上下二卷

卷十五 部落

卷十六 經典

衛藏通志卷一

考證

謹案疑耳而信目者人之常情源遠而未分者學之流弊嘗考通典類函子史通鑑水經注諸書未嘗不載天竺西域諸國事蹟然所聞異辭所傳聞異辭疑信相參源末互異求其實實於人跡不到之區不可得也姑博採焉考諸古則存而勿論證之今則信而有徵

吐番在吐谷渾西南不知國之所由或云禿髮利鹿孤有子樊尼其主偃檀爲乞伏熾盤所滅樊尼率餘種依沮渠蒙遜其後子孫西魏時爲臨松郡丞與主簿皆得衆心因魏末中華擾亂招撫羣羌日以強大遂改姓爲宰敦野至今其人號其主曰贊府貴臣曰主簿又或云始祖贊普自言天神所生號鶻隄悉補野因以爲姓

宰敦野與悉補野言譌其實一也或云本姓棄蘇農也

其國出鄯城五百里過烏海入吐谷渾部落彌

多彌蘇毗及白蘭等國至吐番界

謹案

烏海即今青海吐谷渾即今青海蒙古部
札薩克王公台吉由西甯出口赴藏大路

其國都號邏娑城。用法嚴整。議事則自下而起。因人所利而行之。此其所以能強且久也。重壯賤老。母拜于子。重兵死。惡疾終。以累代戰沒者爲甲門。臨陣奔北者。懸狐尾於其首。表其似狐之怯。其贊普弄贊。雄霸西羌。隋開皇中。其主論贊。率弄贊都牂牁西匹播城。以五十國西南與婆羅門接。

謹案。

贊普。卽藏布。弄贊。卽今羅卜藏。婆羅門。卽今藏西南大西門也。

唐貞觀十五年正月。以宗室女封文成公主。降於吐蕃贊普。命禮部尙書江夏王道宗送之。弄贊親迎於河源。見王人執子培禮甚謹。視大國服飾禮儀之美。俯仰有愧沮之色。謂所親曰。我祖父未有通婚大國者。今我得尙公主。當築一城。以誇後代也。

謹案。

今大招內有唐公主及贊普像。旁有巴勒布王女拜木薩像。乃贊普之妾。又大招北別有小招。乃唐公主自建修靜之所。東向。

武后如意初。武威軍總管王孝傑。大破吐蕃。復龜茲。于闐。疎勒。碎葉。四鎮。至萬歲通天初。又寇涼州。執都督許欽明。欽陵兄弟皆有才略。欽陵多居中。諸弟分領方面。諸番憚之。

二年。吐蕃大論欽陵。遣使請和。武太后遣前梓州通泉縣尉郭元振往。至野狐河。與陵遇。陵曰。大國久不許陵和。陵久不遣番使。以久無報命。故去秋有甘涼之鈔。斯實陵罪。今欲和好。能無懼乎。振乃謂曰。論先考東贊以宏才大略。服事先朝。結好通親。荷榮承寵。本期傳之永代。垂於無窮。論不慕守。

舊恩中致猜阻。無故自絕。日尋干戈。屢犯我河湟。且父通之。子絕之。豈爲孝乎。父事之。子叛之。豈爲忠乎。然論之英聲籍甚。遐外各自爲主。奚爲懼乎。陵曰。今天恩旣許和好。其兩國戍守。咸請罷置。以便萬姓。豈不休哉。然以西十姓突厥四鎮諸國。或時附番。或時歸漢。類多翻覆。乞拔去鎮守。分離諸國。各建侯王。使其國自爲君。人自爲守。旣不款漢。又不屬番。豈不人免憂虞乎。陵曰。十姓四鎮本將鎮靜戎落。以撫甯西土。通諸大邦。非有他求。論今奚疑。而有憂虞乎。陵曰。然緣邊守將多好功名。見利而動。罕守誠信。此番國所爲深憂。振曰。十姓諸部與論種類不同。山川亦異。爰覽古昔。各自區分。復爲我編入。積有年歲。今論欲一言而分離數部。得非昧弱苟利乎。陵曰。使人豈不疑陵貪冒無厭。謬陳利害。窺竊諸部。以爲漢邊患耶。陵若愛漢土地。貪漢財幣。則青海湟川實邇漢邊。其去中州蓋三四千里。必有窺羨。何不爭利於此中。而突厥諸部懸在萬里之外。積漠廣莽。殊異中國。安有爭地於萬里外。而能爲漢邊患哉。捨近務遠。計豈然也。但中州人士深謀多計。天下諸國皆爲漢并。雖大海之外。窮塞之表。靡不磨滅。今吐番塊然獨在者。非漢不貪其土地。不愛其臣僕。實陵兄弟小心謹密。得保守之耳。往者高宗以劉審禮有青海之役。乃使黃仁素賈守義來和。和事曾未畢。以爲好功名。人崔知辯從五俟斤路。乘間隙瘡。痍我衆。驅掠牛羊。蓋以萬計。自此陵之國人大危。慄和事矣。今之此求。但懼好功名者之吞噬。冀此爲翰屏以虞之。實非有他懷焉。振曰。茲事漫汗體大。非末吏所能。

明論當發使奉章以聞。取裁於聖主。陵乃命郎宗乞恩。若爲使。振曰。今遣使之後。國不可更犯漢邊。且番使前後入朝。不時遣者。良以使之後。兵仍犯漢。故朝廷躊躇曰。是給我也。以爲偵諜。不以爲使人。遂遷延無報。今若踵前陵塞。是故陷所去人使。孰謂請和也。陵俛前踟躇久之曰。陵與國人咸憾。崔知辯之前事。故嘗有此舉。以虞好功者之來侵。比實以選練騎士三萬分路出師。使人既有此言。今既於和事非便。安可相違。既罷兵散卒。遂指天爲信。

杜氏通典

後漢書曰。明帝夢金人長丈餘。頭有光明。以問羣臣。或曰。西方有神。名曰佛。其形長丈六尺。面黃金色。帝於是遣使天竺。問佛道法。遂於中國圖形像焉。續漢書曰。天竺國一名身毒。在大月氏東南。修浮圖佛道以成俗。不殺伐。

謹案。大月氏。卽今業爾羌回部。在藏之西北。有兩路通藏。一由和闐南山。一由沙雅爾。

宋元嘉起居注曰。阿羅單國王毗沙跋摩遣使云。諸佛世尊。常樂安隱。處雪山陰。雪水流注。百川洋溢。八味清淨。周布屈曲。從趨大海。一切衆生。咸得受用。又曰。師子國王遣使奉獻。詔答曰。此小乘經甚少。彼國所有。皆可寫送。釋道安西域志曰。波羅柰斯國。佛轉法輪處。在此國也。

又曰。須刺國有五百沙彌真人寺。望晦日。寺前有方青石。天人來下石上。

又曰。摩訶賴國有阿耨達山王舍城。在山東南角。竹園精舍在城西。又有佛浴所。六年苦行處。

支僧載外國事曰。和訶條國在大海之中。地方二萬里。國有大山。山有石井。井中生千葉白蓮花。井邊青石上有四佛足跡。合有八跡。月六齋日。彌勒菩薩與諸天神禮佛跡。竟便飛去。浮圖講堂皆七寶。國王長者常作金樹銀花供養佛。

謹案

今藏西南通伽噶爾部落在海中。其地有巴特瑪薩木巴娃佛。巴特瑪譯語蓮花也。

又曰。迦維羅越國今屬播黎越國。猶有優婆塞姓釋可二十餘家。是白靜王之苗裔。昔太子生時。有二龍王。一吐冷水。一吐暖水。今有池。尚一冷一暖。

又曰。鳩留佛姓迦葉。生那訶維國。

又曰。彌勒佛當生波羅柰國。在迦維羅越南。

又曰。罽賓國在舍衛之西。國王民人悉奉佛。道人及沙門到冬未中。前飲少酒。過中不復飯。

又曰。佛在拘私那竭國。般泥洹。欲泥洹時。自然有寶牀從地出。有八萬四千國王。爭將佛歸。神妙天人曰。佛應就此土。那竭王乃作金棺梅檀車送喪。佛積薪不燒。自然王將舍利歸宮。八萬四千國興。

兵爭舍利。婆羅門分之。用金升量舍利。得八斛四斗。諸國各得。還立浮圖。

扶南國記曰。頓遜國屬扶南。西出海中。國主名崑崙。有天竺胡五百家。兩佛圖婆羅門千餘人。頓遜人敬奉其道。以香花自洗。精進不捨晝夜。香有區撥。摩花。冬夏不衰。日載數千車貨之。慘更香好。南州異物志曰。天竺國地方三萬里。佛道所出。其國王城郭宮室。皆雕文刻鏤。

佛地論曰。佛者覺也。覺一切種智能開覺有情。如睡夢覺。故名爲佛。

普曜經曰。佛兜率天降神於西域迦維衛國淨梵王宮。摩耶夫人剖右脅而生。時多靈瑞。生而能言。本相經曰。牟尼佛年十九。踰城出家學道。勤行精進。禪定六年成道。具三十二相。八十種好。佛地論曰。姓釋迦。號牟尼佛。

謹案

釋迦牟尼佛。唐古特語名曰沙迦圖巴。

後魏釋老志曰。凡說教。大抵言生生之類。皆因行業有三世識神不滅。凡爲善惡。必有報應。漸積盛業。陶冶羸鄙。經無數形。藻練神明。乃致無生。而得佛道也。其間階次心行等級非一。皆緣淺以至深。藉微而爲著。在於積仁順。蠲嗜慾。習靈靜。而成通照也。其始修心。則依佛法僧之三歸。又有五誠。去殺盜婬妄言飲酒。大意與仁義禮智信同。

隋書經籍志曰。釋迦在世教化四十九年。乃至天龍人鬼並來聽法。弟子多有得道證果。後於拘尸那城婆羅雙樹間。二月十五日。入般涅槃。譯言滅度。亦言常樂我淨。弟子迦葉追撰述其教。爲十二部。後漢明帝夢金人飛行殿庭。以問於朝。而傳毅以佛對。帝遣使往天竺。得佛經及釋迦像。自後佛

法徧於中夏。

以上唐類函

周秦西漢以上。無言佛者。魏書釋老志云。劉歆志七略。班固志藝文。釋氏之學。所未曾紀。隋書經籍志云。推尋典籍。自漢以上。中國未傳。或云。久以流布。遭秦湮沒。而辭而闕之者。則如北魏世祖詔云。漢人劉元真。呂伯彊之徒。乞胡之誕言。用老莊之虛假。附而益之。唐傅奕云。孃兒幼夫。摹擬莊老。宋宋祁作唐書李蔚傳贊云。華人之譎誕者。又攘莊周列禦寇之說。佐其高。皆以爲釋氏本於莊老。然自白馬馱經以來。貝葉流傳。於今具在。皆本橫行梵字。譯爲震旦之文。非剽竊老莊以成句也。顧嘗詳讀內典。參求宗旨。與老氏則秦越。與列莊實伯仲。豈所謂三代之時。久已流布。遭秦湮沒之說。信與抑。是法不二。不隔華戎。有自然而合者歟。今周秦西漢既無言佛之書。可編錄。輒擇列莊之語。同於宗門者。著於篇。而每語各著其所以同者焉。

文中子或問佛子曰。聖人也。曰。其教何如。曰。西方之教也。中國則泥。

史記匈奴傳漢使驃騎將軍去病將萬騎出隴西過焉支山千餘里擊匈奴得休屠王祭天金人注金人卽金佛像是其遺法立以爲祭天主也魏書釋老志金人率長丈餘不祭祀但燒香禮拜而已此則佛道流通之漸也

史記大宛傳大夏東南有身毒國注索隱曰身音乾毒音篤孟康云卽天竺也所謂浮圖胡也正義曰萬震南州志云地方三萬里佛道所出左右諸大國凡十六皆供奉之以天地之中也浮圖經云臨毗國王生隱屠太子父曰屠頭邪母曰莫邪屠身色黃髮如青絲乳有青色爪赤如銅始莫邪夢白象而孕及生從母右脅出生有髮墮地能行七步又云太子生時有二龍王左右吐水一龍水暖一龍水冷遂成二池今猶一冷一暖初行七步處琉璃上有太子腳跡現在生處名祇洹精舍在舍衛國南四里是長者須達所起又有阿輸迦樹是夫人所攀生太子樹也括地志云沙祇大國卽舍衛國也在月氏南萬里卽波斯匿王浚處此國共九十種知身後事城有祇樹給孤園又云天竺國有東西南北中央天竺國國方三萬里去月氏七千里大國隸屬凡二十一天竺在崑崙山南大國也治城臨恆水又云阿耨達山亦名建末達山崑崙山水出一名拔扈利水一名恆迦阿卽今稱恆河者也自崑崙山以南多是平地而下溼土肥良多種稻歲四熟留役馳馬米粒亦極大又云佛上忉利天爲母說法九十日波斯匿王思欲見佛卽刻牛頭梅檀像置精舍內佛坐此像是衆像之始

後人所法也。佛上天青梯，今變爲石，沒入地，唯餘十二磴，磴間二尺餘。彼耆老言：梯入地盡，佛法滅。又曰：王舍國胡語曰：罪悅祇國，其國靈鷲山，是青石，頭似鷲鳥。胡語曰：耆闍崛山，耆闍鳥名，鷲也。崛山石也。山周四十里，外周圍水。佛於此坐禪，及諸阿難等俱在此坐。又云：小姑石，石上有石室者，佛坐其中。天帝釋以四十二事問佛，佛一一以指畫石，其跡尙存。又於山上起塔，佛昔將阿難在此上山四望，見福田疆畔，因制七條衣割截之法於此，今袈裟衣是也。

謹案

前藏羅卜嶺岡，乃達賴喇嘛浴之所，水自藏布江引入池。中池上有做棚，壁繪諸佛像及青石梯，六佛昇天之遺跡也。

後漢書西域傳論佛道神化地曰：身毒而二漢方志莫有稱焉。張騫但著地多暑溼，乘象而戰，班勇雖列其奉浮圖不殺伐而精文善法導達之功，靡所傳述。余聞之後說也。其國則殷乎中土，玉燭和氣，靈聖之所降集，賢懿之所挺生，神迹詭怪，則理絕人區，感驗明顯，則事出天外，而騫超無聞者，豈其道閉往運數開，叔葉乎不然，何誣異之甚也。漢自楚英始盛齋戒之祀，桓帝又修華蓋之飾，將微意未譯，而但神明之耶。其清心釋累之訓，空有兼遺之宗，道書之流也。且好仁惡殺，蠲敵崇善，所以賢達君子多愛其法焉。然好大不經，奇譎無已，雖鄒衍談天之辨，莊周蝸角之論，尙未足概其萬一。又精靈起滅，因報相尋，若曉而昧者，故通人多惑焉。蓋導俗無方，適物異會，取諸同歸，措夫疑說，則

迦維別名也。釋迦於四月八日生。姿相超異者三十二種。天降嘉瑞以應之。亦三十二。舊唐書僧元奘傳。元奘姓陳氏。洛州偃師人。大業末出家。博涉經論。嘗謂翻譯者多有譌繆。故就西域廣求異本以參驗之。貞觀初。隨商人往遊西域。元奘既辨博出羣。所在必爲講釋論難。蕃人遠近咸尊伏之。在西域十七年。經百餘國。悉解其國之語。仍採其山川謠俗土地所有。撰西域記十二卷。貞觀十九年。歸至京師。太宗見之大悅。於是詔將梵本六百五十七部於宏福寺翻譯。釋法顯佛國記。在道一月五日。得到于闐。其國豐樂。人民殷盛。皆奉佛法。以法樂相娛。衆僧乃數萬人。多大乘學。皆有衆食。彼國民人星居。家家門前皆起小塔。最小者可高二丈許。作四方僧房。供給客僧。及餘所須。國王安堵法顯等於僧伽藍。僧伽藍名瞿摩帝。是大乘寺。三千僧共榾槌食。入食堂時。威儀齋肅。次第而坐。一切寂然。器鉢無聲。淨人益食。不得相喚。但以手指摩。

又曰。從四月一日。城裏便灑掃道路。莊嚴巷陌。其城門上張大帷幙。事事嚴飾。王及夫人采女皆往其中。瞿摩帝僧是大乘學。王所敬重。最先行像。離城三四里。作四輪像車。高三丈餘。狀如行殿。七寶莊校。懸繒幡蓋。像立車中。二菩薩侍。作諸天侍從。皆金銀雕瑩。懸於虛空。像去門百步。王脫天冠。易著新衣。徒跣持花香。翼從出城迎像。頭面禮足。散華燒香。像入城時。門樓上夫人采女搖散衆華。紛紛而下。如是莊嚴供具。車車各異。一僧伽藍則一日行像。四月一日爲始。至十四日。行像乃訖。行像

訖。王及夫人乃還宮耳。

又曰。到謁叉國。與慧景等合。值其國王作般遮越師。般遮越師。漢言五年大會也。會時。請四方沙門。皆來雲集。已。莊嚴衆僧坐處。懸繒幡蓋。作金銀蓮華。著繒座。後鋪淨坐具。王及羣臣如法供養。或一月二月。或三月。多在春時。王作會已。復勸諸羣臣作供養。或一日。或二日。三日。五日。供養都畢。王以所乘馬鞍勒自副。使國中貴重臣騎之。並諸白氍種種珍寶。沙門所須之物。共諸羣臣發願布施。布施已。還從僧贖。

謹案

孟春上旬。達賴喇嘛下布達拉。赴大招。住錫齊。集遠近大小喇嘛於大招。各經（疑有脫字）嘗誦經。約三萬餘衆。唐古特語謂爲磨羅木。漢人名曰攢招。乃宗喀巴之經會。佛經之波羅蜜也。或八九日。或十數日。攢招畢。則出大小喇嘛請遊。

達爾佛像。載以四輪車。數百人曳之。即彌勒佛垂伸裝束。前引導以鼓樂。繞大招一市。漢人謂之轉寺。

又曰。西行十六。由延便至那謁國界。醯羅城中。有佛頂骨精舍。國王敬重佛骨。慮人鈔奪。乃取國家姓八人。人持一印。印封守護。清晨八人俱到。各視其印。然後開戶。開戶已。以香汁洗手。出佛頂骨。置精舍外高座上。以七寶圓礎。礎下琉璃鐘。覆上皆珠璣校飾。骨黃白色。方圓四寸。其上隆起。每日出後。精舍人則登高樓。擊大鼓吹螺。敲銅鈸。王聞已。則詣精舍。以華香供養。供養已。次第頂戴而去。從東門入。西門出。王朝朝如是。供養禮拜。然後聽國政。居士長者亦先供養。乃修家事。日日如是。初無

懈倦。供養都訖。乃還頂骨於精舍中。

又曰。佛從忉利天上來向下。下時。化作三道寶階。佛在中道七寶階上行。梵天王亦化作白銀階。在右邊。執白拂而侍。天帝釋化作紫金階。在左邊。執七寶蓋而侍。諸天無數從佛下。佛既下。三階俱沒於地。餘有七級。現後阿育王欲知其根際。遣人掘看。下至黃泉。根猶不盡。王益信敬。卽於階上起精舍。當中階作丈六立像。精舍後立石柱。高三十肘。上作獅子。柱內四邊有佛像。內外映徹。淨若琉璃。有外道論師與沙門諍此住處。時沙門理屈。於是共立誓。言此處若是沙門住處者。今當有靈驗。作是言已。柱頭獅子乃大鳴吼見證。於是外道懼怖。心伏而退。

又曰。阿育王弟得羅漢道。常住耆闍崛山。志樂閒靜。王敬心。請於家供養。以樂山靜。不肯受請。王語弟言。但受我請。當爲汝於城裏作山。王乃具飲食。召鬼神而告之曰。明日悉受我請。無坐席。各自賚來。明日。諸大鬼神各持大石來。辟方四五步。坐訖。卽使鬼神累作大石山。又於山底以五大方石作石室。可長三丈。廣三丈。高丈餘。窟前有四佛坐處。又諸羅漢各各有石窟坐禪處。動有數百。佛在石室前。東西經行。調達於山北。嶮間橫擲其石。傷佛足指處。石猶在。佛說法堂已毀壞。止有磚壁基在。其山峯秀端嚴。是五山中最高。法顯於新城中。買香華油燈。倩二舊比丘送法顯上耆闍崛山。華香供養。然燈續明。慨然悲傷。收淚而言。佛昔於此說首楞嚴。法顯生不值佛。但見遺跡處所而已。卽

於石窟前誦首楞嚴。停止一宿。

又曰。復順恆水西行十二由延。到迦尸國波羅柰城東北十里許。得仙人鹿野苑精舍。此苑本有辟支佛住。常有野鹿棲宿。世尊將成道。諸天於空中唱言。白淨王子出家學道。後七日當成佛。辟支佛聞已。卽般泥洹。故名此處爲仙人鹿野苑。世尊成道後。人於此起精舍。

又曰。法顯本求戒律。而北天竺諸國皆師師口傳。無本可寫。是以遠步乃至中天竺。於此摩訶衍僧伽藍得一部律。是摩訶僧祇衆律。佛在世時。最初大衆所行也。於祇洹精舍傳其本。自餘十八部。各有師資。大歸不異。於小小不同。或用開塞。但此最是廣說備悉者。復得一部鈔律。可七千偈。是薩婆多衆律。卽此秦地衆僧所行者也。亦皆師師口相傳授。不書之於文字。復於此衆中得雜阿毗曇心。可六千偈。又得一部經。二千五百偈。又得一卷方等般泥洹經。可五千偈。又得摩訶僧祇阿毗曇。故法顯住此三年。學梵書梵語寫律。道整既到中國。見沙門法。則衆僧威儀。觸事可觀。乃追歎秦土邊地衆僧。戒律殘缺。誓言自今已去。至得佛。願不生邊地。故遂停不歸。法顯本心欲令戒律流通漢地。於是獨還。

酈道元水經注。竺法維曰。波羅柰國。在迦維衛國南千二百里。中間有恆河東南流。佛轉法輪處。在國北二十里。樹名春浮。維摩所處。

梁書扶南國傳。俗事天神。天神以銅爲像。二面者四手。四面者八手。手各有所持。或小兒。或鳥獸。或日月。其王出入乘象。嬪侍亦然。王坐則偏踞翹膝。垂左膝至地。以白疊敷前。設金盆香爐於其上。舊唐書吐蕃傳。其人或隨畜牧。而不常厥居。然頗有城郭。其國都城號爲邏些城。屋皆平頭。高者至數十尺。貴人處於大氈帳。名爲拂廬。寢處污穢。絕不櫛沐。接手飲酒。以氈爲盤。捻麩爲椀。實以羹酪而食之。多事源羝之神。人信巫覡。不知節候。以麥熟爲歲首。

謹案。

邏娑城。邏些城。今唐古特語名。前藏地爲拉薩。蓋譯言之異也。

又曰。元鼎初。見贊善於閩懼廬川。蓋贊善夏衙之所。其川在邏娑川南百里。臧河之所流也。

子史精華

謹案。

唐古特俗。夏秋之交。無論男女。羣浴於藏布江之溪。以祓除癘疫。乃古秋祓之遺意。布達拉西南十五里。名羅卜嶺岡。達賴喇嘛浴於其地二十餘日。還。

元文宗卽位之初。以西僧輦眞吃刺思爲帝師。帝師至上命朝臣一品以下咸郊迎。大臣俯伏進觴。帝師不爲動。惟國子祭酒李木魯狃舉觴立進曰。帝師釋迦之徒。天下僧人師也。予孔子之徒。天下儒人師也。請各不爲禮。帝師笑而起。舉觴卒飲。衆爲之懷然。

元武宗至大元年。以西僧教瓦班爲翰林學士承旨。元英宗至治三年。敕寫金字藏經。

元恭帝奉定三年。禁西僧馳驛擾民。先是西臺御史李昌言嘗從平涼府靜會定西等州。見西番僧佩金字圓符。絡繹道途。馳騎累百。傳舍至不能容。奉元一路。自正月至七月。往返者百八十五次。用馬至八百四十餘匹。乞更正僧人給驛法。至是聞其擾民。禁之。

明成祖永樂五年。封西僧哈立麻爲大寶法王。前年冬。侯顯偕哈立麻至。帝令建齋於靈谷寺。爲高帝高后薦福。或言青雲甘露。青鳥白象之屬。連日畢見。帝大喜。侍臣多獻賦頌。乃封哈立麻萬行具足十方最勝圓覺妙智慧善普應祐國演教如來大寶法王。西天大善自在佛。領天下釋教。賜印誥。其徒三人亦封灌頂大國師。

明憲宗成化四年。加番僧封號。西僧劄巴堅參以祕密教得幸。封萬行莊嚴功德最勝智慧圓明能仁感應顯國光教宏妙大悟法王。西天至善金剛普濟大智慧佛。錫誥命者不可勝計。服食器用。僭擬王者。出入乘樓輿。衛卒執金吾仗前導。其他羽流加號真人高士者亦盈都下。

謹案。

前藏西北山後大寺。住錫噶爾瑪巴瑪圖克圖。係黑教喇嘛。雲南人也。卽明時所謂哈立瑪者。藏手卷一軸長二十餘丈。乃繪永樂初哈立瑪誦經靈谷寺圖。

明武宗正德五年六月。帝自稱大慶法王。帝於佛經梵語無不通曉。鑄大慶法王西天覺通圓明自在大定慧佛金印。自稱法王。其後帝習韃韃語。自名忽必烈。習回回語。自名妙吉。教爛。習番僧語。自

名領吉班丹。十年冬十二月。遣太監劉允使烏思。左右言西域番僧能知三世。遂命允往迎。以珠璣爲幡幢。黃金爲供具。餽賜鉅萬。所攜鹽茶又數十萬。允至臨清。漕艘爲之阻截。又峽江舟大難進。易以艍。相連二百餘里。至成都。又治入番器物。居歲餘。始行。兩月至其地。番僧恐中國誘害之。匿不出見。允脇以威。番人夜襲之。奪其寶貨器械。士卒死者數百人。

謹案

四川打箭爐喇嘛寺內藏唐時所遺儀仗器械。或當時所掠者。

衛藏通志卷二

疆域

謹案衛藏疆域。舊志所載。東至巴塘之南墩。東南至類伍齊番族。東北至青海屬之納木稱巴顏番族。南至狝猶茹巴怒江。西南至布魯克巴部落。北至草地。通回部沙雅爾。西北通回部和闐。仍照舊編纂。惟後藏極西邊界。壬子秋。廓爾喀投誠。遵照新定界址。設立鄂博地方編纂。

乾隆五十七年九月。奉上諭。立定地界一事。已有旨令福康安等。應於藏內邊界。一一設立鄂博。毋許私行偷越。現在大兵將撤。此事最關緊要。福康安等宜趁此時詳細曉諭。申明約束。以熱索橋迤西。如協布魯雍雅東。覺堆補木帕朗古等處。皆經大兵攻克。本應卽以爲後藏邊界。今念爾悔罪投誠。仍行賞還。其熱索橋以內。濟隴。聶拉木。宗喀等處。本屬藏地。前此雖經汝侵占。現經大兵收復。非如上次講和退還者可比。嗣後以濟隴。聶拉木以外爲界。爾部落人等。不得尺寸擅越。如有私行偷越者。一經拿獲。卽行正法。爾部落遇有遣使進貢獻表等事。亦當先行稟明邊界將領。聽候知照。方准進口。如此明白曉諭。立定鄂博章程。庶可永斷葛藤。肅治邊界。欽此。

十二月大學士公福康安等會奏章程內開查西藏邊界如濟隴、聶拉木、絨轄、噶爾達薩喀、崑布等處均與廓爾喀道路相通。臣福康安等於濟隴外之熱索橋、聶拉木外札木地方之鐵鎖橋及絨轄邊界均已設立鄂博、釐定疆域、將巴勒布貿易之人及唐古忒番民零星商販已奏請立法稽查、不許私相往來、應交與駐藏大臣於巡視之便認真查察、隨時派人堆砌、不得日久廢弛、致有偷越等因具奏、奉旨依議、欽此。

五十八年正月大學士公福康安、工部尚書都統和琳等具奏、爲接據廓爾喀王拉特納巴都爾稟稱、蒙公中堂大將軍差穆大人前來聶拉木札木一帶分立地界、小的卽差頭人前往、穆大人已經分定、辦理甚妥、小的悅服、卽照穆大人所立地界、永遠遵奉、不敢私毫有違、自取罪戾、還望公中堂大將軍在大皇帝前、將小的一片誠心奏聞、常常施恩、感激不盡等語、隨檄該王宣示大皇帝天恩、赦爾等前罪、爾等復將凜遵約束、永矢恭順、冀受大皇帝天恩等因具稟、足見爾等一片誠心、本大將軍回京時、必將爾與爾叔感畏大皇帝恩威、永爲藩服、誠悃代爲陳奏、自蒙聖明俯鑒、渥施恩眷、現在駐藏大臣工部尚書都統和大人爲大皇帝親信大臣、特命來藏整飭鎮撫、嗣後爾等如有稟呈事件、當在和大人前稟明、聽候指示、卽將來更換之駐藏大人、凡有應行曉諭事件、爾等惟當一一遵奉、毋稍違悞等因具奏、奉硃批、知道了、欽此。

三月駐藏大臣工部尙書都統和琳奏爲接據廓爾喀王拉特納巴都爾稟稱前差穆大人定立地界極爲公道。惟有廓爾喀東邊多羅卡界內拉結撒儻兩處地方原係廓爾喀所管。此時該處營官不許小的管理。懇求查明賞給等因。又譯看寄班禪信內云。從此以後兩家照舊和好。永遠不敢滋事。所有底瑪宗地方原係給了你們的。可卽差人前來管理各等語。臣當卽飭令噶布倫詳細查多羅卡邊界拉結撒儻兩處。本係廓爾喀地方。前經福康安差穆克登阿第巴前往定界時。在熱隴橋設立鄂博爲界。其多羅卡地界拉結撒儻兩處係在熱隴橋以外。相距四五程途。自應歸廓爾喀管理。臣一面飭令絨轄營官遵照將熱隴橋以外之多羅卡拉結撒儻兩處地方仍聽廓爾喀管理。不許占越滋事。再查底瑪爾宗地方係廓爾喀所管。因五十三年彼此說合。廓爾喀願將此地方送與薩迦呼圖克圖作爲酬謝。當時雖有此議。並未收管。臣伏思上次唐古忒許銀講和。及廓爾喀許地酬謝。俱屬不成事體。廓爾喀既經悔罪投誠。將上次合同業已繳銷。永不敢再提一字。今該部長改悔前非。雖欲與衛藏修好。仍將前許之地讓還管理。自屬恭順之意。但思該部落既附藩封。歸入版圖。卽與唐古忒無異。未便仍照前次私議。令薩迦呼圖克圖收受。查歲琫堪布現在前藏。臣面諭毋得差人前去收管。併傳知班禪札飭薩迦呼圖克圖遵照。一面檄諭廓爾喀部長。今將底瑪爾宗既在鄂博之外。自應仰副皇上柔遠之意。賞與該部長管理等因具奏。奉硃批。諸凡皆妥。欣慰覽之。

欽此。

六月駐藏大臣副都統成德自定結具奏。查閱後藏各邊界新設番兵及履勘鄂博情形。惟定日地方遼闊爲聶拉木、宗喀、絨轄三處總匯之地。實爲緊要。查所通絨轄之小路。轄木多通宗喀大路。擦木達杏通聶拉木之小路。古喇噶木炯並宗喀。共計五處。均爲要隘。每處設定瑋一名。番兵二十五名。卽於定日現設番兵五百名內。就近派撥安設。似於聲勢更爲聯絡。亦不妨其隨時操演等因具奏。奉硃批。欣慰覽之。欽此。

七月駐藏大臣工部尙書都統和琳、副都統成德具奏。查閱帕克哩定結各卡隘情形。所噶爾達地方卡隘二處。一名薩迦嶺。一名春堆。此二處均與廓爾喀相通。又定結地方卡隘一處。名擢拉山。此處與廓爾喀、哲孟雄相通。又帕克哩地方卡隘三處。一名哲孟山。與布魯克巴相通。一名哈爾山。與布魯克巴小路相通。一名宗木山。與宗木相通。以上卡隘六處。均歸江孜前後藏大道。爲總匯要隘。臣成德親赴各處。逐一查勘。俱極嚴密。所有臣成德回藏日期及查閱情形。理合會銜具奏。奉硃批。知道了。欽此。

九月駐藏大臣工部尙書都統和琳、副都統成德等具奏。哲孟雄、作木郎二部落。在藏邊界外。不過每年與達賴喇嘛、班禪額爾德尼通問書信。不聽藏中調遣。被廓爾喀侵占。已有十年。去歲經福康

安徽令協勦。又復藉稱天熱，畏懦不前。迨聞廓爾喀歸順，復思藉天朝威勢，請斷還六輩達賴喇嘛所定舊界，並請添設番兵，由商上給與錢糧，代爲守禦。經福康安及臣和琳等窺其情僞，將懦弱無能，貪得便宜隱衷，逐一指駁。一面檄諭令廓爾喀約束手下人，毋許欺凌弱小。一面將邊外極邊小部落，即可置之不問等情具奏。奉到硃批：所議皆妥，知道了。欽此。又旁批：可惡之見，不可從。欽此。自去年至今，一年有餘，該二部落自知理短辭曲，未敢復來懇乞。查廓爾喀王公叔姪，自歸化以來，諸事稟命而行，實爲小心恭順。昨於六月初，特遣頭人哈斯達爾薩野等至界，稱有面稟事件。據聶拉木營官稟報前來。臣等因發給路票，差人護送到藏。據哈斯達爾薩野等將其國王請安稟帖及土儀鎗刀各一件呈遞。稟稱該國王及其叔巴都爾薩野、凜遵大皇帝諭旨，並將軍大人們教導，愛惜百姓，和睦鄰封，從未多滋事端。惟作木朗哲孟雄二部落之人，素來不安本分，往往造言生事，誠恐他們在大人們面前架說是非，又爭地界。那時大人聽信一面之辭，小的國王就擔不是，所以差小的等前來回明。哲孟雄營官寨，並喇嘛廟，及其餘各寨落，俱被我們占了。已有十年。現在哲孟雄只贖了日尼杵及崗多二處。我們現係天朝子民，固不敢妄自動兵，亦不肯令其覆滅。目下皆係各守境土。又作木朗亦係廓爾喀占了多年，只贖該部長之叔蘇班色一名。本係壞人，現在聞他往各部落借兵，希圖恢復。各部落皆未曾幫助。我們亦未窮追。誠恐蘇班色造言來告，小的國王求大人們

都不要聽他的話。並請差官定立交界等語。臣久知哲孟雄作木朗二處並非藏屬。爲廓爾喀侵占已久。且該處番民窮苦。貪占便宜。較唐古忒爲尤甚。隨傳噶布倫等詳細查問。委係被廓爾喀侵占已有十年。噶布倫所知情形。亦與哈斯達爾所說無異。是該二部落與藏中毫無關涉。而噶布倫及無知僧人轉稱此二處雖不屬藏內管理。向來與達賴喇嘛相好。彼處廟宇俱是經典上有的。今廓爾喀畏懼天朝。既來請示。求大人們趁此機會。仍照六輩達賴喇嘛所定地界剖斷。豈不兩便等語。臣等因唐古忒人本糊塗。貪得便宜。不知事理輕重。固不值深加責備。當即告以該二部落既係經典上有的。當初廓爾喀侵占之時。你們不去幫助。今廓爾喀既已恭順天朝。卽屬大皇帝臣民。與唐古忒一樣。况該國王侵占哲孟雄作木朗地方。在歸順天朝以前。本欽差焉有不爲屬國反斷還不屬藏內管轄部落之理。反覆窮詰。俱各俯首。臣等公同商酌。廓爾喀恭順小心。既來請示。固不可令其欺凌弱小。亦不值代爲分定疆界。自當遵照前奏。置之不問。隨於次日。傳集哈斯達爾等面諭。哲孟雄作木朗二部落雖非藏內統轄。究屬與達賴班禪二喇嘛從前相好。既稱爾國侵占已有十餘年之久。本欽差斷不肯仍然令爾退還。但哲孟雄現在僅有日尼杵崗多二處棲身。作木朗亦僅有蘇班色一人。爾等當體大皇帝好生之心。不可過於追迫。各安本分。歸告爾王。總以凜遵大皇帝諭旨。和睦鄰封。愛惜百姓。方不負大皇帝成全爾國至意。至於邊外地方。本欽差亦不值差官代定交

界當據哈斯達爾伏地叩頭。感激悅服之情形於顏色。臣等隨酌量賞與盤費。派員護送起行。並與拉特納巴都爾緞錦等件。以爲酬答。一面嚴飭各邊界頭人。亦不得容留該部落之人。致滋事端也。等因具奏。奉硃批。所辦得理。好欽此。

十一月初五日。奉上諭。和琳等奏廓爾喀差頭人哈斯達爾薩野到藏請安遞稟一摺。所辦得理。已於摺內批示矣。廓爾喀因侵占鄰近部落地方。惟恐其希圖恢復。差人赴藏稟明。並又瀆請差官定界。設遇胥無定見之人。又必聽從所請。率爲割斷邊界。又致生事端。卽如藏中噶布倫及僧人等。俱以該二處雖不屬藏內管理。向與達賴喇嘛相好。彼處廟宇。俱係經典所有。請仍照六輩達賴喇嘛所定地界。爲之割斷。此等愚昧無知之人。經該部落侵凌。卽懦弱無能。紛紛逃散。及仰仗天朝兵威平定之後。又復藉勢貪佔便宜。妄求定界。今和琳並不聽信噶布倫等浮辭。實屬可嘉。卽向廓爾喀頭人明諭。既不准其欺凌弱小。亦不復更爲分定疆界。旣不聽藏中覬覦之心。亦足以悅服廓爾喀之心。而哲孟雄等部落。聞知天朝割斷公允。亦必益加感畏。實爲得當。嗣後接任之員。遇有此等事件。俱當堅持定見。仿照辦理。切勿爲浮言所惑。邊界自可永遠甯謐也。將此諭令知之。欽此。

五十九年正月。駐藏大臣工部尙書都統和琳。副都統成德等具奏。爲籌辦藏界。補立鄂博。以期久遠。事查有藏屬薩喀邊外。作木朗以東。洛敏湯地方一處。人戶三四百家。向來頭人。係其自立自廢。

既非藏屬。又不屬作木朗管理。閒嘗差人與達賴喇嘛呈遞哈達。或送銀錢五六十圓。以爲布施。五
十三年以前。亦被廓爾喀侵占。每年卽與廓爾喀當差。仍送商上銀錢五六十圓不等。自五十七年
大兵進勦時。洛敏湯便不與廓爾喀交納錢糧。去年廓藩貢使到藏面稟。應歸於何處管理。臣等詳
細查明。委係另有一小部落。與藏中毫無關涉。但離薩喀邊界止有三天路程。恐唐古忒退有後言。
臣等曾面與達賴喇嘛噶布倫等商議。洛敏湯一處。固非藏內地方。然離邊界較近。爾等如以地方
緊要。本欽差卽不許廓爾喀侵佔。廓爾喀亦必不敢不從。但既歸藏內管理。其頭人出缺。自應歸駐
藏大人及達賴喇嘛揀放。錢糧亦應交納商上。未有三四百戶。只交銀錢五六十圓者之理。且屬朋
情布施。亦難向廓爾喀啓齒。據達賴喇嘛噶布倫等僉稱。洛敏湯頭人向來俱係其自立。不屬藏中
管轄。彼處百姓亦皆桀驁難馴。斷不服管。商上亦不藉伊五六十圓銀錢用度等語。臣等仍遵前旨。
仿照辦理。哲孟雄作木郎之例。面諭該貢使。以洛敏湯係邊外極邊小部落。並非藏內管轄。應聽爾
自行辦理。歸告爾王。總以凜遵諭旨。和睦鄰封。愛惜百姓。毋得稍有越佔。致負天恩等語。該貢使叩
頭。感於辭色。臣等因思濟隴、聶拉木、絨轄各邊界業經臣福康安俱已派員酌中立有鄂博。而藏界
西南通外番地方。如薩喀、定結、帕克哩等處。均未定有鄂博。難保日久不無爭端。查遊擊張志林熟
於邊務。令其帶領營官。先行前往各邊。會同各營官。自薩喀起。酌於緊要處所。將應立鄂博地方。繪

圖貼說。毋得草率從事。三月閒。卽應駐藏大臣巡邊操演漢番官兵。臣和琳於二月底起身到彼。計張志林可以辦竣。統俟。臣親自酌定。眼同堆立鄂博。實爲一勞永逸之計。是藏中皆有定畧。嗣後邊外各部落。設與廓爾喀少有爭競。總與藏中無涉。廓爾喀亦斷不敢妄踰一步。唐古忒人雖糊塗。亦有遵循。可期永遠無事等因具奏。奉硃批。知道了。欽此。

五月。駐藏大臣工部尙書都統和琳奏。爲定日閱兵完竣。隨帶遊擊張志林、噶布倫丹津、那木結戴、琿拉旺策卜丹等。攜帶噶廈底案。由薩迦宗喀、聶拉木、絨轄、定結、帕克哩沿邊一帶。率同該處營官。悉心講求查對底冊。張志林所擬應立鄂博處所。均與噶廈底冊及年老番民稟告相符。查各處路徑崎嶇。雪山重疊。臣分派營弁。眼同各該處營官。將舊有瑪尼堆者。加高添砌。其全無形迹者。一律堆設整齊。所有唐古忒西南與外番布魯克巴、哲孟雄、作木朗、洛敏湯、廓爾喀各交界。均已劃然清楚。再查定結屬下有噶爾達一處。亦係通廓爾喀小道。向屬阿哩公管理。而阿哩公駐劄前藏。每年遣一人前往收取租息。臣查五十三年。郭爾喀卽由此回巢。原不屬營官管轄。是以毫無阻滯。今臣飭噶布倫將商上非屬緊要莊田。核其所得租息。撥與阿哩公一處兌換。將噶爾達歸於定結營官管轄。以重邊防等因。

西界

西至廓爾喀部落爲界。由前藏西行。經聶黨格。過鐵鎖橋。至干壩拜爾吉。過干布拉。

即西崑崙

至羊卓白

地。沿海行走。由仁蚌至日蓋子。卽札什倫布。仍仲甯翁結巴寺後山。自札什倫布西行十日。至三桑

乃阿哩界。由三桑過崗得寨。入阿哩噶爾渡界。一由三桑墨雨拉。經脅噶爾。至聶拉木交巴爾布界。

此係舊

案。新定界址。自札什倫布西行。由拉孜。至脅噶爾。定日。宗喀。薩喀。通狹巴嶺山。鍋拉納山。畢

志所載。

都納山。朗古山頂。納汝克喀山頂。朗雜山頂。均設立鄂博。此內爲唐古忒境。此外爲洛敏湯。作木朗

二部落境。又自宗喀通濟曠。至熱索橋。設立鄂博。此內爲西藏境。此外爲廓爾喀境。又自定日通聶

拉木。至鐵鎖橋。設立鄂博。此內爲西藏境。此外爲廓爾喀境。又自拉孜通絨轄。至波底山頂。設立鄂

博。此內爲西藏境。此外爲哲孟雄境。又自定結至薩熱喀山頂。臥龍支達山頂。羊瑪山頂。設立鄂博。

此內爲西藏境。此外爲哲孟雄境。又自干壩至洛納山頂。丈結山頂。雅納山頂。設立鄂博。此內爲西

藏境。此外爲哲孟雄境。又自帕克哩至支木山頂。臧猛谷山頂。日納。宗官察。設立鄂博。此內爲西藏

境。此外爲哲孟雄。布魯克巴二部落境。又臧曲大河南。本係哲孟雄地界。被廓爾喀侵佔已久。臧曲

大河以外。俱係廓爾喀境。

西南界

西南至布魯克巴、巴勒布二部落爲界。巴勒布今屬廓爾喀。一由納格爾行八日至帕爾與布魯克巴交界。山川

險阻難以出入。一由業爾奇木樣納山業朗地方至結隆與哲孟雄宗里口交界。一由業爾斯卡祿納山業朗寨爾交廓爾喀界俱係險道。西南又自怒江北哨義桑昂却宗瀾滄江各處至阿布拉通

南墩大道。

南界

南至狽瑜茹巴之怒江爲界。由拉撒東南行一日過鍋噶拉大山至宋布堡。過宗噶拉山、札拉山。至押噶交藏江。至怒江。其地廣闊無垠不能悉載。怒江之水不知其源。江闊數里兩岸石壁峭立中流急湍不可以舟楫。其地亦名工布。

東南界

東南由前藏朗陸山轉出達則經珠貢寺及沙金塘草地古樹邊卡至春奔色接類烏齊界。通察木多大道。

東界

東至巴塘之南墩甯靜山爲界。雍正三年松潘鎮總兵周瑛勘定疆址始定於南墩甯靜山嶺上建

立界牌。嶺東之巴塘、裏塘屬四川。嶺西屬西藏。其中察卡、中甸。由前藏東行十里許。過機楮河。即藏江至墨竹工路皆平坦。自此經拉哩、碩、板多、察木多、乍了、江卡。至南墩。跬步皆山。崎嶇險仄。計程三千五百零五里。

東北界

東北至西甯所管之那木稱、巴彥等番族爲界。由前藏北行十五里。向色拉山東。過鍋拉山。至浪宕。由隆竹松過彭多河。有鐵鎖橋。過河。由角孜拉山。呼正寺。增頂工。至木嚕烏蘇。通西甯大道。又由玉樹接西甯。松潘、秦甯三處大道。又通略隆宗。類烏齊地方。

北界

北至草地爲界。由前藏西行。出羊巴井口。至新橋。即平川。西通後藏。東接噶勒丹。北行草地。至木嚕烏蘇。噶爾藏骨岔。交青海界。

西北界

西北亦係草地。有克哩野大山。納克產隘口。北通哈具得卜特爾。又北直至木嚕烏蘇渡口。仍交西甯大道。其東接玉樹界。又羊巴井至桑沱洛海。過紅塔爾小山。過拉納根山。即騰格哩諾爾。即天池也達

木地方係每年出防處。由吉札卜至僧格物角隘口。東北至噶爾藏骨岔。阿爾坦諾爾一帶俱通沙雅爾、和闐、回疆地方。

衛藏通志卷三

山川

謹案西南番地山川山海經所不載。水經注亦未傳。第引法顯佛國記爲阿耨達五天竺之證。率誕詭不經。唐元奘法師遊西域十有七年。撰記十二卷。世不傳其書。且山川名目古今音譯尤多訛舛。未得方言之真。茲閱四川通志。又詳考一統志。并雜志家所載。依次編纂。

康熙六十年二月。奉上諭。朕於地理從幼留心。凡古今山川名號。無論邊徼遐荒。必詳考圖籍。廣詢方言。乃得其真。故遣使臣至崑崙山西番諸處。凡大江、黃河、黑水、金沙、瀾滄、諸水發源之地。目擊詳求。載入輿圖。今大兵得藏。邊外諸番悉歸仁化。三藏阿哩之地。俱入版圖。其山川名號。番漢異同。當於時考證明核。庶可傳信於後。大概中國諸水。皆發源於東南內外大幹。其原委可得而縷晰也。黃河之源。出西甯徼外庫爾坤山之東。衆泉流出。沮洳渙散。不可勝數。望之燦如列星。蒙古名鄂敦塔拉。西番名蘇羅木。譯言星宿海也。是爲河源。匯爲查靈、鄂靈二湖。東南行。折北。復東行。由歸德堡。積石關。入蘭州。岷江之源。出於黃河之西。巴顏哈拉嶺。七七勒哈納。番名岷捏蘇。漢書所謂岷山。在西徼外。江水所出是也。而禹貢導江之

處在今四川黃勝關外名楮山

番語謂水為楮

古人謂江源與河源相近禹貢岷山導江乃引其流非源斯言實

有可據其水自黃勝關流入灌縣分數十歧至新津縣復合為一東南流至敘州府金沙江入之金沙江

之源自達賴喇嘛東北烏泥烏蘇流出烏尼烏蘇譯言乳牛也其水名烏魯烏蘇東南流入喀木地

喀木即康

世今名察木多

又東南流逕中甸入雲南塔城關名金沙江至麗江府亦名麗江至永北府北會達沖河東流經

武定府入四川界至敘州府合岷江流經夔州府入湖廣境由武昌府與漢江合漢江之源出陝西甯羌

州北蟠冢山名漾水東流至南鄭縣為漢水入湖廣界東南流至漢陽縣漢口合岷江此諸水自東南大

幹之內故發源於西番流入中國也瀾滄江有二源一源於喀木之噶爾機雜噶爾山名雜楮河一源於

喀木之濟魯肯他拉名敖木楮河二水會於察木多廟之南名拉克楮河流入雲南境為瀾滄江南流至

車里宣撫司為九龍江流入緬國瀾滄之西為哈拉烏蘇即禹貢之黑水今雲南所謂潞江也其水自達

賴喇嘛東北哈拉諾爾流出東南入喀木界又東南流入怒夷界為怒江入雲南大唐隘名潞江南流經

永昌府潞江安撫司境入緬國潞江之西為龍川江龍川江之源從喀木所屬春多嶺流出南流入大唐

隘西流為龍川江至漢龍關入緬國此諸水在東南大幹之外故皆流入南海也又雲南邊境有檳榔江

者。其源發自阿里斯之東、阿里斯即今之阿哩。自後藏札什倫布西行十日。乃阿哩地方交界。由三桑至岡得業入阿哩噶爾渡地方西北。乃納達克酋長得鍾那木札爾地土。達木珠喀巴普山。

譯言馬口也。有泉流出。爲雅木藏布江。從南折東流。經藏危地。過日噶共遙爾城旁。合噶爾諾木倫江。又南流。經工部地。入雲南古勇州。爲檳榔江。出鐵壁關。入緬國。而岡底斯之南。有山名朗卜切喀巴普。譯言象口也。有泉流出。入瑪匹木達賴諾爾。又流入朗喀諾爾。兩湖之水西流。至桑納池。岡底斯之北。有山名僧格喀巴普。譯言獅子口也。有泉流出。西亦至桑納池。二水合而南行。又折東行。至那克拉蘇木多地。與岡底斯西。瑪卜加喀巴普山之水會。瑪卜加喀巴普者。譯言孔雀口也。其水南行。至那克拉蘇木多地。會東行之水。東南流。至額納特克國。爲岡噶木倫江。卽佛書所謂恆河。佛國紀載。魏法顯順恆河入南海。至山東之渤海入口。應卽此水矣。梵書言四大水出於阿耨達山。下有阿耨達池。以今考之。卽岡底斯是也。唐古忒稱岡底斯者。猶言衆山水之根。與釋典之言相合。岡底斯之南。有二湖接連。相傳爲西王母瑤池。意卽阿耨達池也。又梵書言普陀山有三。一在額納特克之正南海中。山上有石天宮。觀自在菩薩遊舍。是乃眞普陀。一在浙江之定海縣海中。謂善才第二十八參觀音菩薩說法處。一在圖伯特。今番名布達拉山。亦爲觀音化現之處。釋氏之書。本自西域。故於彼地山川。頗可引爲據也。禹貢導黑水。至於三危。舊註以三危爲山名。而不知其所在。朕今始考其實。三危者。猶中國之三省也。打箭爐之西南。達賴喇嘛所

屬拉里城之東南為喀木地方。即康也。達賴喇嘛為危。烏斯與危同音也。班禪呼圖克圖為藏地。合三地為三危耳。哈

拉烏蘇由其地入海。故曰導黑水。至於三危。入於南海也。至於諸番名號。與史傳不同。而亦有可據者。今之圖伯特。即唐之突厥。唐太宗時。以公主下降。公主供佛像於廟。今番人名詔詔者。譯言如來也。其地猶有唐時中國載去佛像。明成化時。烏斯藏大寶法王來朝。辭歸時。以半駕鹵簿送之。遣內監護行。內監至四川邊境。即不能前進。而留其儀仗於佛廟。至今往來之人。多有見之。此載於明實錄者。爾等將山川地名詳細改正具奏。欽此。

衛藏。今以布達拉為前藏。札什倫布為後藏。統名曰衛藏。

布達拉山。前藏地方四面皆崇山峻嶺。不生草木。殆古所云鐵圍也。其中原隰平衍。南北約六七十里。東西約二百餘里。中通藏江。自東北繞西南流。藏江之北。北山之南。平地突起一石山。圍五六里。高一里許。名布達拉依山。疊砌層樓十三

層。為達賴喇嘛坐牀之所。(見寺廟門。)唐古忒語。凡山名布達。普陀之轉音也。山曰拉。水曰楮。後倣此。

招拉筆洞山。布達拉西南。山勢起伏相連。中嶺鑿斷。接砌石塔。中通大道。山極陡峻。亦似平地突起。高二里許。南鄰藏江。山頂疊砌層樓。業醫喇嘛居之。(見寺廟門。)

磨盤山。招拉筆洞之西北。亦似起伏相連。形如磨盤。故名。

羅下嶺岡。布達拉西南十五里。藏江南岸。其北岸平野叢林。開砌池沼。引藏江水灌之。亭船具備。爲達賴喇嘛暑月澡浴之所。乃清幽勝境也。

牛魔山。藏江之南。高二百餘丈。爲布達拉屏障。達賴喇嘛每歲送老工夾布於其上。

僧格拉山。前藏南。連絡重疊。崎嶇難行。唐古忒語謂獅曰僧格。以山形似獅故名。

札拉山。與僧格拉相連。路不甚險峻。

鍋噶拉山。前藏南行二日。桑葉地方。山高積雪不消。中多瘴氣。

奔巴拉山。前藏東南。唐古忒語謂瓶曰奔巴。山形如奔巴瓶故名。

洞噶拉山。布達拉西三十里。聳峻連霄。高四百餘丈。唐古忒語謂海螺曰洞噶。山形似螺。故名。近藏江北岸。中設關卡。爲布達拉關隘。

業黨山。前藏西南行三十里。名登龍岡。過大橋。又西南折。山勢陡峻。爲前藏西面屏障。通後藏大道。

根柏山。布達拉北面屏障。與別蚌寺後山相連。

札羊宗山。前藏山南。上建多爾濟札古寺。山有石門。

色拉山。布達拉北二十里。色拉寺後。唐古忒謂金曰色。其山產金。故名。達賴喇嘛派人封閉。

浪黨山。色拉寺後。平險。參半。上下約三十里。

角子拉山。前藏東北。上建呼正寺。俗名熱正寺。路徑曲折。鳥獸寂然。如喇嘛振鐸呼之。山禽獐鹿畢集。

郎路山。前藏東北。

乳牛山。前藏東北。

沙羽克岡拉山。前藏北。

喇根拉山。前藏北。

噶勒丹山。俗名甘丹山。前藏東。噶勒丹寺後。

克哩野拉山。前藏北途長淤沙積雪。煙瘴逼人。自羊八井入草地。至巴彥圖河。皆大山難踰。

墨雨拉山。前藏西高峻。積雪多瘴。

噶木布拉山。俗名甘不拉。前藏西行一百七十里至曲水。渡藏江。通後藏大道。即西崑崙山也。

岡巴則山。離曲水五十里。由溝內登陟過嶺。南即西海子。亦頗側難行。

札什倫布山。過春堆四十里。入山口。亦平原宏敞。有山自西北蜿蜒而結成平巒。形如蟹螯。名札什倫布。依山建寺。爲班禪額爾德尼住錫之所。四面皆平遠。岡巒崩。崩。崩。拱抱。惟北面有崇巖疊嶂。高不可測。

岡底斯山。即大雪山池。阿哩地方之東北。周一百四十餘里。峯巒陸絕。積雪如懸崖。山頂百泉聚流。至麓即伏。實諸山之祖脈。梵書所謂阿耨達山也。

達木殊喀巴普山。岡底斯山之東。唐古忒語。達馬也。達木殊馬王也。喀巴普。盛食糗粳木盒也。山形似馬。口有泉流出。故名。

朗卜切喀巴普山。岡底斯山之南。唐古忒語。朗卜切。象也。山形似象。口有泉流出。故名。

僧格喀巴普山。岡底斯山之北。唐古忒語。僧格。獅子也。山形似獅子。口有泉流出。故名。

瑪下加喀巴普山。岡底斯山之西。唐古忒語。瑪下加。孔雀也。山形似孔雀。口有泉流出。故名。梵古所云阿耨達山四大水。即出此四山也。

通拉大山。後藏西南十餘里。峯巒峻峭。積雪不消。由定日通轟拉木大道經此。

狹巴嶺山。鍋拉納山。畢都納山。朗古山。納汝克喀山。朗雜山。札什倫布西。由魯噶爾、定日、宗喀、薩喀等處通此數山。此外為廓爾

境。略

波底山。由絨轉通此山。此外為哲孟雄境。

杏撒熱喀山。臥龍支達山。羊瑪山。由定結通此數山。此外為哲孟雄境。

洛納山。丈結山。雅納山。由甘壩通此數山。此外為哲孟雄境。

支木山。臧猛谷山。由帕克哩通此二山。此外為哲孟雄布魯克巴二部落境。

圖巴鄂色山。登龍岡之西。

嘛哩噶布山。業黨之西。

札克洞山。曲水之東。

甘壩山。過巴則嶺。

札什岡。

甲錯山。過拉子一站。

紫日山。協嘎爾。

佳納山。聶拉木。

薩爾山。宗略赴陸迦寺大道。

常桑山。常桑。

浪噶山。札什倫布之西。

噶拉山。

日洞山。曲水。

噶如山。宜椒。

納雅山。由花寨子赴彭錯嶺大道。

羅羅山。過拉子兩站。

達爾結嶺。聶拉木。

工湯拉山。宗略。

江納山。湯谷。

拉喀山。俱在噶略。

日蚌山。昔略。

拉古曬古山。過務庸官寨。

洋卓雍錯海。下甘壩山。

熱水塘。過拉子兩站。

普出河。定日。

鹿馬河。宗喀。

熱水塘。熱噶。

廓拉海。星克宗。

熱水塘。羊八井。

藏布江。

舊志載其源有三。出自三壩。經流至熱正寺。歷湯家古寨。合流白楮河。一出自剛喇山。經流至竹貢寺。噶定。合三壩水。會於白楮河。三江之水聚為匯。過達克則。德慶。至西藏門首。有木船度船為渡。又名機楮河。按藏江原委。不見史冊。

碩布山。碩布巴拉。

雅納臧布大河。

彭楚河。協噶爾。

納錯海。距宗喀一站。

補泥海。宗喀赴薩迦大路。

甲木海。熱噶。

碩布河。碩布巴拉。

鹽海。

今考錢坫西番水地記一卷，悉遵照
皇輿圖大清一統志編輯，謹纂入。

大金沙江，番名雅魯藏布江，源出番西界卓書特部落西北達木楚克哈巴布山，三源俱東北而合。

折東南

有庫木岡前山水自西南來會，又東北流，加蘇木拉河自西北來會，其水源出卓書特西北沙庫雅拉山、麻拉山，及佳拉山，捏立嶺，四水合流而爲一，又南合西來之查爾河，東流入藏布江，江水又東，有阿拉楚河自北來會，其水源出沙

拉木岡前山，南流入藏布江，江水又折南流，又東北，有那烏克藏布必拉自東北來會，水在卓書特西南，源出東北桑里池，西流，受北來尙里噶巴嶺及木克陸山二水，南來拉主克山，阻崙山，羊巴木山三水，由羊巴木嶺西折南流，又受西北來雅拉嶺、大克陸山二水，又南入藏布江，江水又東南，有郭永河自東南來會，水在卓書特東南，有四源，一出昂則嶺，名陸列河，一出蓋楚岡前山，名蓋楚克河，一出賽丹山，名珠克河，一出拉魯岡前山，名拉魯河，俱東流，合而爲一，又東北入藏布江，江水又東南，有一水自西南來會，又東南，折東北，又東南，有一水自西南尼雅陸岡前山來會，又東，有薩楚河自東北來會，水在薩噶部落西南，源出岳落岡千諾山，有六水，俱南流，會爲加巴藍河，又南合西北拉主克阻倫羊巴木山三水，又合西南昂色昂勒宗山二水，又東南，折西南，又合東北查噶貢噶爾他拉山二水，西南捏木山及六色立羊鼓山二水，爲薩楚藏布河，西南入藏布江，江水又東南，有二水自北來會，又東，有甕楚河自南來會，水在薩噶部落西南，有四源，一出西南札木東塔拉泉，一出南岡克麻爾塔拉泉，一出南那木噶山，北三源合而東北流，一出東南大克拉塔泉，西流，與三源合，北流，入藏布江，江水又東，有式爾底河自南來會，水在薩噶部落西南，有三源，一出西南沙盤嶺，一出南舒拉嶺，俱東北流而合一，一出東南楚岡里窪甘山北源，與二源合，入藏布江，江水又東，有滿楚藏布河自北來會，水在薩噶部落西南，北有斜爾尙山、撒龍山二水，南流，合東來充札達克山三水，又合西來拉克藏卓立山水爲河，又東南流，入藏布江，江水又東，又一小水自南來會，又東，有一水自南來會，水有二源，一出西南岡里窪甘山中，一出南牛拉嶺，合而北流。

逕阿里宗城西。又北合東南來一水。又北入藏布江。江水又東折東北流。有薩噶藏布河自東北來會。水在薩噶部落東南。源出東北拉布池。池水泛濫。伏流復出西南曲曲流。有一水北自必普塔克拉克山東南流。合東北拉陸阿爾山水。又西南合西北來一水。又西南有拉普岡冲山水西南流注之。又西南合西來一水。又南有東北岡陸山二水合而西南流。又合東南凡布陸山水。又西南折東南流。曰薩噶藏布河。又東入藏布江。江水又北折西北流。屈曲有小水二。自南來會。又屈曲東南流。有嘉木磧池。水自北來會。水自章阿布林城來。城在日喀則城西北約千里。江水又東南。有一水自西南來會。水二源。一出西南瓜查嶺北麓。一出東南牙噶陸山北麓。北流而合。屈曲入藏布江。江水又折北流。二山南麓。則彭楚藏布江也。又西北有隆左池。水自西北來會。又東北流。有莽噶拉河自南來會。水源出那拉古壺察山。江水又東北。有鑛里山水自東南來會。又東北。逕章拉則城北。城在日喀則城西北千里。江水又東北。有鄂尼楚藏布河自西北來會。水源在章阿布林城西北。有楚拉喇山一水。西南流合東來一水。又西南。匯爲那木楚克鄂模。其北有多存岡山水南流。亦匯焉。池周百里。從西南流出。折東南。又爲陸岡普池。又東流出。有三水自西合而來會。曰大克楚河。又東有江楚河自西南來注之。又東。逕邦拉嶺。章阿布林城嘉木磧池之北。屈曲又東。有拉山水自西北來注之。折東北。至穆克布查薩木馬鐵鎖橋北。有北來之鄂尼楚河。自江林普拉山南流來會。折東流。入藏布江。江水又東。經益蘇克零城北。又東北。有一水自北來會。又東北。有一水南自婆色納木山來會。又北。有戒忒武出河自北來會。又北。折東流。有打克北朋楚河自北來會。折東南流。有薩布河自南來會。其水源出楚拉米洪羅綽爾莫三山。有三泉流出。北流有二水。一自西南來。名桀河。一自東南來。名當楚河。俱會。又北。逕日喀則城西界。入藏布江。江水又東。逕日喀則城北。城在拉撒西南。即班禪之所居也。江水又東。有年楚河自南來會。水有二源。一出珠母拉木山。東北流。一出其東順拉嶺。池泉數十。匯爲一水。北流。二源合。曰章魯河。又東北。至娘娘廟前。有八水。從東北喀魯嶺諸山。又南。札木長山。社山來合。而西南流注之。折西北。過江則城西。又西北。過向滿城西。又西北。與南來一水合。又北。與西來二水合。又北。曰年楚河。過日喀則城東南。得蘇木嘉石橋。橋長七十丈。十九洞。又北。入藏布江。江水又東北。有尙河自北來會。水亦曰商河。源出西北絳札拉山。東南流。有造索克布山水西來注之。又東南。逕尙那木林城南。有佐山水自北注之。又東南。

入藏布江。江水又東，逕普冬廟前。又東，有一水自南來會。又東北，有烏雨克河自拉公山來會。又東，得薩拉珠噶鐵鎖橋。又東，逕林彝城北，有龍前河自南來會。其水源出東珠木哈拉山，西南流，與西來奪金剛藏山水合，折西北，逕林彝城東。又北，入藏布江。江水又東北，有捏木河自西北來會。水源出拖巴山，江水折東南流，逕拜的城北。有一小水自西北來會。其城東南有牙木魯克于木卒池，廣四百五六十里。池中有山三，一曰迷納巴，一曰鴉博士，一曰桑里。下流甚衆，時白時黑，或成五采。池水環之，在烏雨克零喀城之東北。納噶則城之正東，其水不竭。江水又東北，逕楚舒爾城南。又東南，逕日喀爾公喀爾城北。有噶爾招木倫江自東北來會。其水有二源，一曰迷的克藏布河，出默魯公喀城東北。迷的克池，池廣數十里。西南流，與東南來一水合。又西南，與東南一水合，流入西南。曲折西北流，與西北來之盛吞西里克塔拉合。又西流，與北來一小水合。又西南，逕蓬多城東北，而與達木河會。其西南源曰達木河，出蓬多城東北。查里圖嶺，西南流，有拔布陸河，東自央噶拉嶺來會之。又南，逕蓬多城北，而與迷的克河會。二河既合，名噶爾招木倫江。又東南，與西來二水合。又東，與北來一水合。又東南，曲曲流，逕鄂那廟。又東南，與東來岡噶拉嶺水合。又西南，得鄂那鐵鎖橋。又南，逕默爾公噶城西。又南，折西曲曲流，逕噶勒丹廟北。又西，逕第巴達克城南。又西南，有一水自溫主普宗城西北來注之。又南，逕得沁城北。又折西曲曲流，逕拉撒南。拉撒者，唐時吐番舊部，今爲達賴喇嘛所居也。城內有伊克昭廟，暨唐長慶碑。又噶爾招木倫江，又西北，逕洞噶爾城東南。與東北來一水合。又西南，逕日噶牛城北。有羊八井河合。楚普河自西北來注之。又西南，與西北來二小水合。又西南，逕楚蘇拉城東南。又西南，逕日噶爾公噶爾城北，而入藏布江。江水又東南，有一水自南來會。又東，有一水自南來會。又東，有一水自北來會。又東，逕薩木拖廟前。又東，有二水自北來會。一水自南來會。又東，逕乃布冬城北。有一水自南來會。又東，有巴楚河自北來會。又東南，逕桑里城南也。勒庫城北，有一水，自北來會。又東南，有一水自南來會。又東，逕鄂克達克。厄城西南，有聽里麻楚河自東北來會。其水東南流，其東北有池泉。南有陸拉嶺水，並逕城北，而合入藏布江。江水又折東南流，逕也庫城。達格布拉綏城東北，當碑古魯那木嘉城。達格布同春城。達格碑那城北，有年楚河自北來會。其水源出沙羽克岡拉山，卽噶勒丹廟東南山也。有水曰麻出河，與南巴拉嶺之巴陸楚河合。東北流，與北來烏山之烏出河合。又東，折南，逕公布札木達城東。

南有水曰佳囊河自北來繞城東而合。又東南曲流。逕公布碩格城南。與東來巴宗阻池水合。又東南折西南。與西來札布山之牛楚河合。又南逕公布竹木城東。地母城西。又東南逕則布拉岡城東。又南入藏布江。江水又東逕察木哈廟北。有薩木陸拉嶺水。自東北來會。又東南逕森打麻廟西。禿哥里山西南。又南流入羅喀布。占國界會岡布藏布河。朋楚藏布河折西南。入厄訥特克國入南海。

岡布藏布河入藏布江

自喀木部之拉里廟會東北察拉嶺水。東偶工拉嶺水。東南流。有一水自西北章阿爾松山來會。又東南有尼楚河自東北來會。其水源出喀布地之弩布工拉爾山。西南流入岡布河。河水又東南行。牛楚河自西北來會。又東得達克拉臻橋。又東有一水自東北來會。又東南曲流。有一水自東北來會。又南逕的雅爾山西。入岡布部落。抵撒皮唐他拉東喀木境。有薄藏布河自北來會。其水源出喀木達里土宗城東南。舒板多城南。有春多大嶺二水合而入岡布河。河水至此。其地人呼爲喀克布必拉。逕噶克碑書里東城西。又南逕賽水隆。嶺東。榮格拉岡里山西。出岡布界。逕公拉岡里山。又南入羅喀布占國界入藏布江。

朋楚藏布河入藏布江

在薩喀部落東南有三源。一西出書爾穆藏拉山。一東出西爾中麻山。一東南出瓜查嶺。合而東南流。有一小水自西來會。又南有一水自南來會。水出綽爾猛通那岡里山。又南折東。有一水自南來會。一水自北來會。又東南有二水自西南來會。其一出卓什岡甘山。一出阿巴拉山。又東有一水自南來會。又東北逕羅西喀爾城南。有一水自西北來會。其水出拉喀拉布山。二源同流。逕城北。入朋楚河。河水又東北。有羅楚河自北來會。其源出牙噶陸山。及東北岡木阿山。三源合而南流。入朋楚河。河水又東北。有羅布藏河自西北來會。又東繞岡陸前山北。折南流。有一水自東北來會。在丁家城西。出林窩拉山及蘇庫岡甘山者也。河水又南曲流。有牛楚藏布河自西來會。水出東拉嶺。則里木布山。珠木朗瑪山。阿巴拉山。納澤勒山。北拉嶺諸水匯而東南流者。河水又東南。有帕哩藏布河自東北來會。水在帕哩宗城東北。有一水西南流。爲噶爾撮池。又西南爲札木撮池。又西南折東。與東北來一水合。又西南與西北來之噶拉嶺水合。又西南逕帕哩城西。又西南與東

來一水合。又西南入朋楚河。河水又西南有牛楚河。自西來會。其水源出喜拉岡參山。東南流。合東北岡布乾山水。又東南與西來一水合。又東南逕凡陸城南界。與北來札木珠山水合。始曰牛楚河。又東流。逕年爾木城北界。折東南曲流。又東北入朋楚河。河水又東南逕珠拉徠部落。入厄訥特克國界。下流入藏布江。

岡噶江

源出岡底斯山東南。山在番地極西阿哩之達克喇城東北。直西甯府西南五千餘里。以道里計之。當即佛書所稱阿耨達山也。東有達木楚克喀巴普山。則雅魯藏布江之所出也。東南有朗卜切喀巴普山。山形似蹲象。故名。其山北麓有泉出。匯爲池。西北流。有一水自北來會。又西北有公生池。水東北來會。其水二源。一東北出大克拉公馬山西南流。一東出卓書特西界馬爾岳木嶺。嶺在阿哩之東界。即岡底斯向東南之支山也。其水流匯爲池。池廣八十里。不流。西十餘里。又有一池。湧地而出。長三十里。有一水自北注之。西南流。又與東北來一水合。又西南入朗卜切喀巴普山水。而爲瑪匹木達賴池。池南北百五十里。東西百里。又西出爲浪噶池。池南北百七十里。東西百里。又西出折南曰狼出河。曲曲流。有楚噶拉河自東北來會。水源出藏文嶺南麓。南流折西南。逕古格札什倫布東。則城東南。又西南入狼出河。河水又西折北。又東北逕古格札什倫布城西。則布魯城東。折西北。又西南逕則布魯城西南。又折西。曲曲西南流。逕出木爾的城北。又西曲曲流。抵阿哩西鄙桑那出木多境。有拉楚河自西北來會。其水源出岡底斯山北。僧格喀巴普山。山形似獅。故名。南麓有池。廣數十里。匯諸泉水西流。折南。逕岡底斯山西南支峯。又西南折曰拉楚河。折西流。有藏文嶺北水自東南來注之。又西北有大雪山水自東來注之。山名遮達布哩阿林。在僧格喀巴普山之西。直布則城東北。有水西北流。屈曲折西。合彭錯泉水。又西入拉楚河。又西南折西北。有野公泉水自東北來注之。水平地湧出。匯爲數道。西流屈曲。在札什岡城東南。入拉楚河。拉楚河又西北逕札什岡城西南。又西北折西。曲曲流。與北來四小水合。逕出尺克則廟南。又西抵拉達克城南界。又西逕畢土克廟。又西折南。曲曲流。又東南折入狼出河。狼出河既會拉楚河水。勢始盛。又西南逕畢底城西。城爲阿哩極西地。又南折東北。又東南曲曲流。逕那克蘇木多北鄙。有麻楚河自東北來會。其水源出達克喇城西北。瑪卜

加喀巴普山。山形如孔雀。故名。東南麓有池。東南流。曰瑪楚河。逕喀拉木多城北。曲曲流。逕布拉克城東。有一水自西北來注之。又南折西南。有佳拉嶺水自東南來注之。又西折南入狼出河。狼出河既會瑪楚河。曰岡噶江。江水又東南出阿哩界。逕瑪木巴。木朗部落。至厄訥特克國入南海。

騰格爾池

在拉撒西北。日喀則城東北。其東北隔山。即露源之布喀池。其北隔山。則流沙也。池廣六百餘里。周千里。東西長。南北狹。蒙古呼天爲騰格爾。即天池也。其東有三水流入。皆名察哈蘇。太河西有二水流入。北曰羅薩河。南曰達爾古

藏布河。合西來數

池水。東流入池。

哈拉烏蘇

前藏北行八日。皮船通。按哈拉烏蘇。蒙古語。黑水。即露江上游。番名鄂尼爾。源出薩喀。北有巨澤。曰布喀鄂模。在大流沙之東。廣一百餘里。其水東南流。又成一澤。曰厄爾濟根。鄂模。廣百餘里。又東南流。又成一澤。曰伊達鄂模。

廣亦百餘里。又東南爲哈拉池。廣百二十餘里。其水色黑。即古雅望之嘉湖也。又東南有一水自西來會。又南有布倫河自南來會。其水在哈拉池之東南。東有公噶巴噶馬山之哈拉河。魚克山之魚克河。俱西北流。合西南來之朔木池水。入露江。江水又東。有駭拉池。水自北來會。又東折北。逕巴楚山麓。又東北有二小水自南來會。一小水自北來會。又東北有沙克河。合布克河。自西北來會。沙克河源出拉撒北喀爾古。察嶺南流。合都回山水。又東南合布克河。水布克河出布克山。山連峯而東。爲諾木渾烏巴什山。其陰水入金沙江。陽水即布克河也。布克河既合沙克河。又東南合庫蘭河水。入露江。江水又東北入喀木部。折東南。有索克占且索河。自北來會。其水源出伊克諾木渾烏巴什嶺。及布哈山。祭漢峯流出之。四水來會。歷兩山。開入喀木境。又西南入露江。江水又東南。得索克薩馬木橋。橋在索克宗城南境。江水又東南。折西南流。始名鄂尼楚河。又西南有一小水自西北來會。又東南有一小水自東北來會。一小水自西北來會。又東南有一小水自西南來會。折東流。有一水自北至。色里索木拖巴來會。又東南有一水自東

北來會。又東有一水西南自達哩上宗城之敦錯池北流。合數小水來會。又東有一水自南來會。又東逕洛隆宗城北境。有一水自北來會。又折東南得札木雅薩木巴橋。又東南有一水自北來會。又南有一水自西來會。折東。又南有一水自西北來會。又東南逕喀喇圖廟西。又東南有一水自北來會。又西南折東南。有一水自西來會。又南有鄂楚河自東北來會。又南一水在匝坐里岡城西。源出城北境納蘭嶺南流。至加拉穆境入潞江。江水又南屈曲流。有一水自東來會。又東南逕迷納隆境。又東南入怒夷界。曰怒江。又南流入雲南麗江府界。曰潞江。

海子。通後藏大道。過岡巴則嶺下。周圍行四十八日。水深不測。中有山環繞。西南隅有多爾濟拔姆宮。

彭多河。前藏北行三日。有鐵鎖橋。亦有皮船。

春良諾爾。前藏北行九日。相傳亦天池也。

阿克達木河。前藏北行二十五日。

春結江。藏南前後藏之水。於此合流。由赤書羅卜喜洛出藏境。即藏布江之別名也。

怒江。即外夷界急湍。奔浪不可渡。

臧曲大河。哲孟雄部落西與廓爾喀交界。

阿耨達河。在岡底山下。阿哩東境。

陸海。自札什倫布至阿哩。夏開隨地皆水。故名。

年楚河。後藏東北水源有二。一出珠母拉木山東北流。一出其東順拉嶺池。匯為一水。又曰章魯河。

業黨河。離前藏一百八十五里。由曲水。過鐵鎖橋。今廢。有皮船可渡。

江達。舊志稱工布江達。工布者。東南別一部落也。江達乃正站。今改正。

鹿馬嶺。番名蒲葛倉。在江達西。綿長平坦。上下約四十里。風烈異常。無多積雪。微有瘴氣。

江達格卡河。一自瓦子山發源。經東閣寺。甯多。至江達。一自鹿馬嶺發源。經順達。刊木合流。至工布。遠布會於藏布江。

拉里。

拉里大山。在大寺西。山勢如龍形。上下五十里。極險峻。四時積雪。下至拉里。北接玉樹。乃青海要津。

瓦子山。番人呼爲溜拉山。層層頑石。狀如瓦片。故名。上下約五十里。多積雪。崎嶇難行。離江達二日。

同妥楮河。在拉里東。發源魯工拉山。經流擦竹卡。歷四十餘里。合得楮河。一名拉里河。

得楮河。在拉里東北。發源大偏關大山。經流拉里。會同妥楮河。

松茄楮河。在拉里東。發源大偏關之大山。集經流桑結松多。與林楮河合流。至拉里。會得楮河。

熱水塘。在拉里東。四時常溫。番人呼擦楮卡。

達隆宗。即邊爛。又名賓巴。

必達拉山。在拉子西南沿山。平坦而小。上下十里。

沙工拉山。一名丹達山。過丹達塘十五里。上山頗側難行。俯臨雪宮。西望峭壁摩空。中一小溝。蜿蜒而上。凜冽冰城。刺肌奪目。少有微風。斷不可過。有丹達神廟。必虔誠祈禱。乃得平靜。見寺廟門。

魯工拉山。與沙工拉相連。山勢平衍。長百餘里。冬春積雪不消。離拉里一日。

撒楮河。在達隆宗北。發源朔瑪拉山巢。經流索馬朗等處。東南流入偶楮河。

邊楮河。在達隆宗東南。發自達隆大山。合冒楮河。至賓巴。流入察木多等處。會偶楮河。

俄楮河。源出沙工拉之嘉木磋嶺。經流朗吉工等處。合葉楮河。

葉楮河。源出魯工拉山巢。經流至工多。合工楮河。又至阿南多。合俄楮河。同歸偶楮河。

碩板多。

章拉山。在碩板多東。高峻險阻。上下約三十餘里。至曲幽。又名紫駝。

烏底拉山。在碩板多西南。勢不甚峻。越二十五里。至撥浪山寺。又五里。至中義多。

巴拉山。在碩板多西南。勢平坦。上下約三十里。至巴里郎。

朔馬拉山。一名賽瓦合山。在碩板多西邊。風獵獵。亂山皆童。踰二十餘里。至索馬郎。

柱馬郎錯河。源出噶拉漫山坡。經流紫駝曲齒北流。歸偶楮河。

胄楮河。源出烏底山。經流四十里。至碩板。多合柱馬郎錯河。會於偶楮河。

洛隆宗。

得貢拉山。在洛隆宗東。山勢陡峻。上下約三十里。至嘉裕橋。

得噶拉山。在洛隆宗西。山路陡險。九十里。過鐵凹塘。交碩板多界。

偶楮河。在洛隆宗西。源出噶爾藏骨登海子。流入納克樹。至擦哇岡後。合瀾滄江。

峽隆喜楮河。在洛隆宗南。源出噶喇山。東流。至洛隆宗得貢拉山下。合偶楮河。

類烏齊。

瓦合大山。在類烏齊西南。山大而峻。路險難行。四山相接。綿亘一百六十里。四時積雪。有數十丈之筴。行其上。愁雲撥霧。日色慘淡。立有望竿堆。合周天三百六十之數。藉為鄉導。戒勿出聲。違則冰雹驟至。按康熙五十九年。雲南官兵三百餘。

日名至此山下禁營一夜
風雪人馬俱仆盡陷營中。

過腳山。略陡積雪綿長五十里有煙瘴離瓦合山三日八十里至拉貢至察木多二日乃川滇西藏三界之中最爲重地兩河環抱左右有大木橋東走四川南達雲南西通西藏北通青海乃扼要之區。

擦噶拉山。山頂平坦上
下約二十里。

葉達拉山。勢頗平衍上下約三十里。
至嘉裕橋交洛隆宗界。

紫楮河。在類烏齊東北。
即昂楮河下流。

擦木多。舊名喀木亦名
康亦名昌都。

達蓋拉山。在察木多東山勢危峻上
下約四十餘里接熱了界。

沖得拉山。在察木多東高峻冲霄上下約
六十餘里接哈申松林口界。

奪布拉山。在察木多東南平
坦易行約二十里。

鼎格拉山。在察木多東南。疊嶂重崖。上下約五十里。

魚別拉山。在察木多西南。不甚險峻。上下約二十五里。接乍了巴貢界。

列木拉山。在察木多東。上下約五里。

巴貢山。蒙堡山。擦瓦山。雲山。雪山。白多山。納多山。黃雲山。隱山。拉貢山。

昂楮河。在察木多左。源出中壩。因通雲南。亦名雲河。

雜楮河。在察木多右。源出九茹。因通四川大道。亦名川河。二水合流入雲南界。

瀾滄江。番名雜楮必拉。有二源。一出喀木之雜坐裏岡城西北。格爾濟雜噶那山。即古和甸之鹿石也。其水東南流。有庫克噶巴。又東南。有一水自東北來會。一水自西北來會。又東南。有一水自東北來會。折南。又西南。逕察木多廟東境。又西南。而與鄂木楮必拉合。鄂木楮必拉之源。出巴喇克。拉丹蘇克山。其山在格爾濟雜噶那山之東。山下有十餘池。匯而西南流。有一源曰普陀戎他拉。自西南大山南流。屈曲合巴哩。哈達水來會。又屈曲折東南流。逕察木多廟之西。而與雜楮必拉合。二源既合。亦統名曰雜楮必拉也。江水南流。又東南。折西南。逕賈廟西北。有一水自東北匯東南來之滾兆宗城及查木敦廟水來會。江水至此。番稱默楮必拉也。

又西南得私什達克雜木橋。喀木番部境之大橋也。又南有自出河自西北來會。洛隆宗城東北有楚充千兩池水。番俱多布格鄂。模合而東南流會雜楮果貢阿林之水。又東南逕靈渦車廟前。又東南屈曲數百里入瀾滄江。江水又南有一水自西來會。又東南有一水自東北來會。又西南有一水自西來會。又南得占什達克薩瑪橋。又西南逕察喀羅巴。又西南有雅爾瑪巴山水自西來會。又東南有喀塔噶哩布嶺水自西來會。又東南逕屈蟲帝蘇廟西南。又東南逕蒙番東境。怒夷西界折東北流。又東南有一水自西來會。又東南有一水自西來會。又東南。至雲南塔城關西入麗江府曰瀾滄江。

乍丫。

指達拉山。

在乍丫東。頗平坦。上下約十里。

昂拉山。

在乍丫西北。危峻難踰。上下約八十里。進藏要道。冬春積雪。行者苦之。

作拉山。

在乍丫西北。高陡險峻。上下約三十里。

勒楮河。

在大寺前。源出昂拉山下。合甲倉河。

樂楮河。

源出作拉山。亦合甲倉河。

甲倉楮河。源出官覺。經流洛隆宗。合樂楮河。到乍丫界。

色楮河。源出上納多。經流江卡等處。西南流入蔡木多大河。

巴塘。

甲噶拉山。在巴塘東。凌霄插漢。上下約八十里。

龍新山。在巴塘東。險峭特絕。上下約三十餘里。冬春多積雪。行者苦之。

卜伊拉山。在巴塘南。不甚險峻。上下約二十里。

空子拉山。在巴塘西南。山勢平坦。上下約七十餘里。

甯靜山。在巴塘西南。山頂平坦。四十餘里。山中立界。山以東爲內地。屬巴塘。山以西爲外地。屬西藏。

喜松山。在巴塘西。勢甚高峻。上下約四十餘里。亦巴塘西藏交界。

巴冲楮河。在巴塘民堡之旁。源出占對。流入德爾格合金沙江。

金沙江。

番名色楮河。舊志載源出伊洛木拜圖。流入木魯烏蘇等處。至巴塘瑋子勒。入麗江。歷甯番涼山。合雅龍江。會於敘州府大河。此江渡口甚多。惟春科工。妥楮卡。牛苟。竹巴籠。係官商大道。修造木船以渡。其餘俱係皮船。按金沙江亦名犁牛

河。古麗江也。番名木魯烏蘇。源出巴薩通拉木山東麓。山形高廣。形似犁牛。其西麓水曰雅爾嘉藏布河。西流入喀齊爾烏蘭達普。麓水爲金沙江。亦曰倫布楚必拉。亦曰巴楚必拉。其水東北流。與西北源合。其水出巴薩通拉木山之西數百里。勒魯爾烏蘭達普。蘇阿林。曰喀齊烏蘭木倫。東南流。入金沙江。金沙江又東北。與南源合。其水出拜都嶺。曰拜都河。北流入金沙江。三源既合。水勢始盛。又東北。有阿克達木河。自南來會。其水源出布哈山東北。伊克諾木渾烏巴什嶺北之特門塔拉二池。東北流。有小水二。自東北來會。曰伊克阿克達木水。又有小水一。自西來會。曰巴哈阿克達木。入於金沙江。江水又北。折而西。有托克托乃烏蘭木倫。自西北來會。其水源出勒魯爾山東北。西金烏蘭拖羅海山。東流入金沙江。自此山綿亘而東。繞木魯烏蘇之北。千數百里。皆稱巴顏喀拉山。其陰即黃河源也。江水又北。折而東。又東南。有波羅必拉。自南來會。其水源出伊克阿克達木河北之察蘇拉圖山。北流而得烏蘭必拉。其水源出格爾濟雜噶那山之西麓。有烏蘭池。周七十餘里。自西流出。爲必拉。有巴圖拉水。南自多倫巴圖爾嶺來會。又北。有庫博渾必拉。東北來會。又西北。咸會於波羅必拉。波羅必拉又西北。有郭汝克必拉。南自察蘇拉圖山之西北麓來會。又西北。入金沙江。烏蘭池東。則瀾滄江所出之格爾濟雜噶那山也。江水又西北。折東。有洞布倫山。水自南來會。山在格爾濟雜噶那山之北。有賽音庫博渾山。連岡相接。又北。曰洞布倫山。有二水。一出山西。一出山東。合而西北流。入金沙江。江水又東。逕那木唐隆山。古爾板波羅吉山。始折東南流。有圖虎爾河。自南來會。其水源出格爾濟雜噶那山之東北。同布勒西洛西山。一曰空楚河。一曰和秦河。北流而合。東北逕好勒嶺。及活呵洛好勒察漢峯之東北。有水南自卓爾長山北麓合。而入金沙江。江水又東南。有那木齊圖烏蘭木倫。自西北來會。其水源出厄爾機根嶺。西北流。逕巴木巴拉嶺。西至薩拉隆達拉山北。入金沙江。江水又東南。有那木齊圖烏蘭木倫。自西北來

會其水源出巴顏哈拉得哩奔山東南流入金沙江江水又東南折而西南分爲七派二十餘里而復合有濟渡番名多倫鄂羅木伊多渾伊多渾者華言濟渡處也江水又東流有庫庫烏蘇東北來會其水源出巴顏喀拉西倫衣山西南流入金沙江江水又東有濟渡番名巴木布勒伊多渾江水折西南流有小水自西來會又南分爲二派三十餘里而復合又南逕股得勒圖西勒圖山及特門烏珠山之西南麓又南有古爾板拖爾哈圖山水自東來會其水出山南麓曰圖哈爾圖哈拉烏蘇西南流折西北有克蘇乞老河東南自阿拉爾巴顏哈拉達巴罕之西北麓注之又西南有毛伸霍爾霍河自南來注之又西南有噶布拉河自東北來注之又西南入金沙江此水隔山之東乃黃河源江水又南流有伊克庫庫色必拉自西來會有濟渡曰伊克庫庫賽爾伊多渾舟楫渡也多倫鄂羅木巴木布勒伊多渾則皆馬渡也江水又南有一水自西南來會又東南折東有池水自東北來會池水廣二十餘里江水又東南有一水自西南來會其水曰巴罕庫庫賽必拉有濟渡冬春馬渡夏秋皮船渡也江水又東南有一水曰尼林哈拉烏蘇源出雜佛洛巴顏哈拉達巴罕此山西北卽拉木拖羅海山又西卽烏哈那哈達其東北卽哈拉機達拉克阿林其東南卽薩喀勒拉克山北隔星宿海者其水西南流入金沙江江水又東有齊齊爾哈納庫庫烏蘇自南來會其水源出蘇克布蘇克木山綿亘而東有七大山流出七大水又有威衣木查鄂模二池之水俱東北流合而爲一曰齊齊爾哈納庫庫烏蘇入金沙江江水又東有忒獸圖水自南來會其水源出打克木喀木雜噶山西北流入金沙江江水又東折東南有一水自北來會水出巴顏哈拉達巴罕之東南山江水又南有一水自南來會水出租蘭達租山東麓江水又東南有一水自北來會水出雜巴顏哈喇山之西南麓此水隔山東北卽雅龍江源也江水又南有角克池水自西北來會其池周六十里在蘇噶莽河屯之北東南入金沙江江水又東南入喀木境始名布倫楚必拉也有小水自西北來會江水又東南折西南又東南逕伸郭廟有一水自北來會其水源出朗朗普格山東南入金沙江江水又東折而南有濟渡曰翠冲郭哩多渾江水又南有一水自東北來會水源出里遼達巴罕西南入金沙江江水折西南流至里木山西南拉都格巴東北有一水自東北來會江水又南流至達拉哈達東越里拉達巴罕西又折西南流至巴塘城西境有一水自東北來會源出越里拉達巴罕南麓西南流逕巴河屯南入金沙江江水至此亦有巴塘河之稱也江水又

南。逕巴塘他拉西。又折西南流。始名巴格必拉。有濟渡。曰巴格必拉多。渾江水曲曲流。又西南。有一水自西北來會。其水源出巴屯西北重山中。東南流。合三小水入金沙江。江水又東南。有敦格馬格。縮格。自東北合而來會。敦格河亦曰敦格必拉。源出岡里拉馬爾山。西南流。有札木哈達山水東北注之。即馬格河也。亦曰麻緒必拉。敦格河又南。有噶木布乃哈達山水自東北來會。即縮格河也。亦曰縮格必拉。三河匯而入金沙江。江水又東南。有一水自東北來注之。來源出巴特瑪郭出山。西南流。逕東噶爾河屯南。傑達麻他拉北。又西南。匯而為怒。又西南。入金沙江。江水又東南。入雲南麗江府西北塔城關。曰金沙江。入金沙江之水。有無量河。上源曰多克田河。源出陽頂文廟西北之沙里出諸爾池。東南流。折東北。有里出河東北來會。其水源出里木山東麓。東流。有沙魯齊山水自西南來會。又東。折南流。至裏塘東南。有二水。北出波羅多拉達巴罕。一東南流。一西南流。合而來會。又西南。至迷黎拉岡地。入無量河。無量河又東南。入雲南界。

裏塘。

達俄岡山。赤喇岡山。出喇山。蟒喇山。甲噶山。大松山。俱在裏塘東。勢頗平坦。不甚險峻。紫木喇山。在裏塘東。上下各十

五。漳喇山。在裏塘東南。其山甚險。上下約百餘里。山之左。係鄉城威蓋地。屬四川山之右。係麗江中甸。屬雲南。阿拉柏桑山。在裏塘西南。平順可行。上下約三十里。至海子口界。拉枯山。與柏桑山相連。亦頗

平坦。約十餘里。色勒隆宗山。與拉枯山相連。勢亦平順。上下約十餘里。額東勒山。與隆宗山相連。上約十五里。平順易行。下約二十里。陡險盤曲。雲龍

拉山。頗平坦。上下約二十餘里。鎖龍山。火燒坡。均在裏塘。亂石窰。人頭灣。均在俄洛。疊雜山。在疊雜地。喇布山。在甲

藏木山在藏木地 沙布山在沙魯布 革凹山在革凹奔松地 喇喇山在喇爾地 二郎雪山在二郎灣 三壩山在立登三壩地 打山在毛茂了 射鹿山

在立渠 河頭地 毛丫山在曲登地 窮藏山占對交界

裏楮河在裏塘門首 河源出瓦述長垣蒙了沙向東南流至眉里喇卡哈雅入內地河口稍窄於裏塘上行十餘里有桑巴橋通巴塘大道下行六十餘里至江宗有橋亦名桑巴

色隆達河在裏塘西南 源出額東勒山流入雪山根合袁達楮河山喇嘛了至鄉城會金沙江均係木橋通巴塘大道

拉梯楮河源出立登三壩 經流二郎灣傳莫樽松等處入金沙江

交界河在鄉城朔竹地

立渠河在裏塘射鹿山發源 經流與下渡河合

溫塘泉有三一在裏塘西十里一在裏塘南二十里一在喇嘛了熱水塘汛 三泉之水四時常溫內有紅蟲長二三寸人有患瘡疾者浴之即愈彼地僧俗人等珍重之

雅龍江舊志載在裏塘東 源出青海之釀磧地方流入霍爾咱地用牛皮船為渡通林聽安撫司至甘孜用木船皮船為渡通德爾格部落直達察木多至上中下渣壩亦用牛皮船為渡通占對喇滾至上中二渡用木船皮船為渡通裏塘至下渡亦

用牛皮船爲渡。通會鹽替之穆哩土司。及雲南中甸地方。由甯番三渡水。會金沙江。入馬湖。歷敘州府。歸川江大河。按金沙江。漢書地理志之繩水也。雅龍江。若水也。源出雜巴顏哈拉山。在裏塘城西北。其山在雜佛洛巴顏哈拉山之東南。有東西二源。東南流。番名曰雜椿。必拉。又東南。有一水自東北來。會番名曰齊齊爾哈那必拉。又南流。有一水自北來。會曰瑪木齊奇拉哈那必拉。又東南。有朗朗普格山水。自西南來。會。其山水東北出。匯爲拉木椿池。廣五十里。東北出。爲囊必池。廣六十里。西北出。爲噶拉木池。廣五十里。池旁皆山。其水入雅龍江。江水又東南。有小水自北來。會。又東南。有小水自西南來。會。又東南。有一水自西北來。會。水源出巴顏圖呼木達巴罕之西山。又東南。有小水自南來。會。又東南。有一水自西北來。會。水源出巴顏圖呼木嶺之東山。又東南。至巴顏哈拉巴林之南。折南流。又東南。有二水自西南來。會。又東流。番稱雜椿。齊奇拉哈納必拉也。江水又東南。至瑪木巴顏哈拉山西南。有瑪木齊齊爾哈那必拉。自北來。會。其水源出瑪木巴顏哈拉山之東南。流合東北之彌那克格必拉。又西南。入雅龍江。江水又南。有脅格必拉。自東北來。會。其水源出年泥莽格山。南流。折西。入雅龍江。江水折西南流。有鄂尼楚爾古河。自西來。會。亦曰敖楚爾必拉也。其水源出澤賽國嶺之北山。南流。有尼雅克楚必拉。西南流。注之。又東北。入雅龍江。江水折西。又東南流。有一水自東北來。會。水源出噶又格拉嶺。西南流。入雅龍江。江水折西南流。有小水自西北來。會。又南流。至瑪拉木岡嶺東北。又東南流。折西南。得濟渡處。番曰巴拉馬珠蘇多。昏亦曰必爾麻珠蘇木渡。此喀木番部東往打箭鏢販茶路也。渡在打箭鏢西。微外二百餘里。江水又西南。曰雅龍江。南入四川界。爲古對地方。自此而南。其東爲四川地。其西爲番地。入雅龍江之水。有勒拉河。源出打箭鏢西南大山。西南流。逕古對東南。入雅龍江。有打沖河。即古瀘水也。東南流。入雅龍江。打沖河之北。爲番界。番人稱爲黑惠江。亦曰納夷江。古合瀘水入繩。今合若水入繩也。

打箭鏢

南無脊山。在鑪東一百里。
高五百餘丈。

金釵塢。在鑪東七里。
險窄峻巖。

大岡山。在鑪東八十里。
高陡盤折。

郭達山。在鑪東北一里。高七百餘丈。時有青羊繞山而行。相傳漢諸葛武侯
七擒孟獲時。命郭達至鑪於沙哇納安鑪造箭。故名。其廟見寺廟門。

溫泉。在鑪東南五十里。榆林功。水性
溫暖。四時不竭。浴之能除積疾。

阿拉木公山。在鑪西。高
八百餘丈。

折多山。在鑪南。進
藏要道。

大蓋雪山。在鑪北
八十里。

雅納溝河。源出大蓋雪山西北。南流八十里。至
鑪。與瀘河會。又七十里。入魚通河。

瀘河。源出折多山西南。東流七十里至鏞。

頭道水。打箭爐東六十里。高崖夾峙。一水中流。居民皆住山麓。巖後瀑布百丈。天矯噴礮。砰訇如雷。亦一大觀。過客皆題詠焉。

瀘定橋。打箭爐東一百三十里。即瀘水也。以鐵索橋為渡。今亦以木船渡。水漲則不可過。仍行橋上。橋長三十一丈一尺。寬九尺。施索九條。覆板於其上。水頗險惡。大風亦不可履。為通爐要隘。

聖祖仁皇帝御製瀘定橋碑記。康熙四十年建。敬編卷首。

謹案西番水道。如黃河、青海、黑水、岷江諸水原委。雖去衛藏甚遠。不宜攔入。然北路通西甯、黃河、青海在所必經。東路通四川、黑水、岷江在所必越。謹附載以備參考。

黃河。源出星宿海西。巴顏哈拉山東麓。山石色黑。蒙古謂富為巴顏。黑為哈拉。二泉潛發。東南流數里而匯。曰阿爾坦河。其水色黃。蒙古謂金曰阿爾坦。折東又北。有小水自南來會。又東南。有烏哈峯水自西南來會。又東。有拉母拖羅山水自南來會。又

東。有西拉麓山水自北來會。又東。有七眼池水自北來會。始得鄂敦他拉。蒙古以星為鄂敦。以水灘為他拉。元史曰火敦腦兒。譯言星宿海者是也。阿爾坦河既會於鄂敦他拉。又有巴爾哈布山水自北來會。哈拉答爾罕山水自南來會。番名古爾板。索爾馬。蒙古謂三為古爾板。以阿勒坦河合二水為三也。東南流。注於槎靈海西北。得水為海。海大澤也。其澤周三百里。東西長。南北狹。河亘其中。番人呼白為查。長為靈。爾雅云。河出崑崙虛。色白者也。自海東南流。有查克拉峨山水自南來會。其水一曰色納格河。一曰多河。俱出山東北流。合而為一。又合庫克查池水。入於河。河水又東南折而東北。有哈拉河自東南來會。而注於鄂靈海。元史所謂阿剌腦兒是也。蒙古以青為鄂。言其水色青。由海折東北流。折東南。有放博圖噶順水。多木達噶順水。查哈噶順水。自南來會。又有放羅

海池水自東南來會而抵巴顏圖渾嶺有呼蘭河自西來會其水源出盛吞池東北流得庫得勒古河折東南入於河河水又東南有博勒圖河自東北來會其水出阿拉克薩拉山西南流入於河河水又東南有哈麻古爾台河自東北來會又有泉水小大五十餘曰厄得靈忒得靈鄂模匯成白圖河東流入河又有厄魯克河東南流入河哈爾吉河西南流入河薩克河東南流入河河水又東南水色漸黃屈曲五百餘里環阿木尼麻禪母孫山之南即大雪山也有多爾吞河自北來會呼呼烏蘇河有西南來會登河自北來會巴爾鄂河西南來會巴罕薩拉河自北來會哈拉河拜多河巴里馬河皆自南來會又有伊克薩勒河自西北來會他哈拉馬克河烏捏河布喀河皆自西南來會又有小水二自西北來會西拉河伊克巴爾和河巴罕巴爾和河自西南來會河水至此折東北流繞大雪山之支阜曰噶海山又噶拉濟山之麓大雪山者元史所謂亦耳麻莫布拉譯言騰格哩塔是也華言昆侖山其山綿亘三百餘里上有九峯中峯獨高冬夏積雪不消番人以祖爲阿木尼險峻爲麻禪冰爲母孫稱冰山與稱大雪山同耳河水東北流有三昆都侖河自東南來會三昆都侖者即土人謂古爾板昆都侖河元史所謂納鄰哈拉河乞哩馬出河鵬楞河也納鄰哈拉河今日德忒昆都侖源出賴杵山東北流入於河乞哩麻出河今日多木達圖昆都侖源出納克多木精山西北流入於河其納克多木精山岡出山之東南即四川松潘同知界也河水至此而始大又西流繞烏崗莽乃山之北逕納林通布珠山折西北流繞大雪山東北有巴罕哈留圖河東北來會又有伊克哈留圖河東北來會其水源出巴罕土魯跟山西南流入於河河水又西北有齊普河自西南來會其水源出涉馬山曰圖擊圖河東北流與得爾多河合其水出哈爾濟嶺東流入圖擊圖河又北曰齊普河入於河河水又北有察普楚河自西南來會其水源出索諾木達西嶺北流繞大雪山西折東北有密喇河西南來合之繞大雪山北有西拉哈下齊海河西北來合之又得阿爾昂河而入於河河水又折而東北流有哈克圖河自東南來會其水源出伊克圖爾跟山東北流折而北合巴罕圖爾跟山水又西北合伊西克山水入於河河水又北有滾俄羅吉河自西北來會其水源出青海西南濟哩山東南流合盛吞西哩克地諸泉水入於河河水又東北有蘇勒吉爾河自東南來會其水源出古爾板圖爾哈山西北流入於河河水又東北有小澗水自南來會又東有烏蘭河自東南來會其水源出他蘇拉海山西流合大成嶺水又西北逕敖隆臥拖

羅海山北入於河。河水又東北，逕古城址北。甘肅河州之西界也。有庫庫囊河自南來會。又東，有鄂涿蘭河自南來會。又東北，有烏蘭布拉克河自西北來會。其水源出青海東南，衆泉匯發，東南流入於河。河水又東北，有也巧雀匣河自南來會。其水出保安堡東南，西北流入於河。河水又東北，逕蘇魯古山南，折而東南流，有姑楚河自南來會。其水原出古爾板拖羅海山，東北流入於河。河水又東南，折而東北，逕積石山南，阿木尼達拉嘉山北，北界西甯府徵外，南入河州內地。此禹貢導河之積石也。水經注曰：唐述山，自鄂靈海至此。蒙古統謂之喀屯河。入河之水，有離水，源出西南徵外，打城達巴罕山之東南，東流，受小水二。又北流，有五普威河，自東南來會，折西北流，受小水二，入大夏堡北，曰大夏河。有洮水，源出洮州衛西南徵外，西傾山東麓，番名羅插普拉山，衆泉匯出，曰巴拉巴河。東南流，折而東，受小水十餘，入衛境。有湟水，番名波洛克克河，源出西甯府徵外，當青海之東，曰噶爾藏嶺，元人名之曰祁連山。明史所謂熱水山也。三泉迸發，一曰伊克烏拉古爾台，匯而南流，其東有布虎圖嶺，水曰昆都俞。南流，受毛哈圖河來會。又東南，有洞郭爾廟南，有土爾根察漢河，自西南來會，水勢始盛，折東流，至鎮海營，曰西甯河。入湟之水，曰浩靈河，番名烏蘭木倫河，源出青海西北阿木尼厄庫山，東南流，有哈爾昏河自北來會，折東北曲曲流，有滿楚克河自西北來會，東逕甘州府南，徵外番大山，東南流，南北受小水十餘，至大通堡，曰大通河。

青海

在西甯府徵外，漢書地理志曰：僊海。水經注曰：卑禾羌海，即鮮水也。今爲厄魯特等二十三旗地，番名呼腦兒。周七百餘里，中有二山，一曰魁孫拖羅海，一曰察漢峯。東西對出，水色青碧，冬夏不枯不溢，其東北有巴顏池，周四十餘里，南有功額池，周五十餘里，細納池，周四十餘里，其最大者。西南有拖孫池，周一百里，阿勒克池，周百六十里，東北有巴哈池，周百餘里，東北近洮州衛有湫池，周百餘里，即古天池大澤。又西北有股格池，周二百餘里。

岷江

大江亦曰岷江，源出松潘同知城西徵外，嶺山羊膊嶺，有二源，北曰岡出阿林，從嶺東麓東南流，其西北麓，即多拉昆都俞河也。南曰那格多木精阿林，從嶺南麓南流，此爲岷江正源，屈曲東流，與北源會，又東流，東南至黃勝關，入四川界，入

江之水，有黑水河，即鐵豹嶺水也。有二源，北源出九里古拉，達巴翠嶺，在岷江南源之西南，東北流，折而東南，入四川界。

衛藏通志卷四

程站

成都至打箭鑪計程九百二十里。

謹案四川成都禹貢梁州之域。天文井鬼分野。其控制西南各部落。若高屋之上。建瓴水焉。而打箭鑪乃中外扼塞。極西南則爲衛藏。打箭鑪以東。雖險阻百折。顧地猶中土。人物風俗。習見周知。無煩博引。僅識其道里所經而已。

成都縣至雙流縣尖。新津縣宿。計程九十里。

成都北走秦鳳。東下荆襄。南通六詔。西距吐番。由錦城南門五里過萬里橋。卽武侯送敬侯使吳處。十五里過簇橋。卽今之蠶市。入雙流縣境。十里過金花橋。十里至雙流縣。出南門。五里過南林鋪。十里過黃水河。河自溫江縣南流。四十里過縣東。至彭山縣合岷江。十里過串頭鋪。入新津縣境。十五里過花橋子。十里至新津縣。驛程平坦。沃野袤延。萬里之行。發軔於此。

新津至斜江河尖。邛州宿。計程九十里。

新津出南門五里過太平場五里過鐵溪橋下有鐵溪河昔武侯煉鐵於此二十里至斜江河源出大邑縣鶴鳴山東委曲斜流因名入邛州境十五里過高橋鋪二十里過聖花堡十五里過天官橋十里至邛州漢臨邛地即司馬相如遇卓文君處路亦平坦過此則漸歷崎嶇矣

邛州至大塘鋪尖白站宿計程九十里

邛州出南門過南河大渡即邛水山大通街上坡十里過十里橋過十里臥龍場十里過乾溪鋪蒲江境十里至大塘鋪十里過萬工坡明洪武間藍玉收雲南鑿石開道費工萬餘故名二十里過中枋鋪五里過墨竹關八里過河家坪名山縣境七里至白站即百丈驛訛名白站有唐白丈縣故址

白站至名山尖雅安縣宿計程九十里

白站十五里過洗馬池十里過白土坎石頭漫坡路十五里過和尚腦十里至名山縣十五里過金雞關小崗上建關帝廟十五里過桐子林由桐子林渡平羌江以武侯平羌於此故名十里至雅安縣漢嚴道縣地

雅安縣至觀音鋪尖榮經縣宿計程九十里

雅安縣出南門五里上嚴道山原名鹿角山唐元宗改今名五里過對崖十里過風木埡十里過八步石十五里至觀音鋪在山溪之間十里過飛龍關頂上有古刹名龍興寺下山十里過麻柳灣榮經縣境十里由廟上過七縱河源發瓦屋山武侯初擒孟獲處十里至榮經縣亦漢嚴道縣地

榮經縣至小關山尖。清溪縣宿。計程一百十里。

榮經縣出南門。十里過磨刀溪。十里由箐口站順溝而進。過大通橋。十里過安樂壩。清溪縣境。十里過黃泥鋪。上山。十里至小關山。由溪內行。林木障翳。山谷陰森。晴少雨多。雲霧常作。兜羅綿現。沿溝直上。偃仄難行。十五里過大關山下。岡過板房。復沿溝而上。十五里過長老坪。即相嶺。武侯曾屯兵於此。故名。冬春雪盛。險滑。行旅戒馬。十五里下山。過二十四盤。即邛笮山路。甚險峻。五里過羊圈門。五里至清溪縣。昔爲沈黎郡。其地風大。每日夕時。狂飈輒作。室皆動搖。憲宰有聲若傾圯狀。居人習之。勿異也。此地分路。出南門。即建昌地。

清溪縣至富莊尖。泥頭宿。計程八十里。

清溪縣出西門。下坡過溝。復折上山。十里過冷飯溝。十五里過四堰口。五里至富莊。俗名蠻莊。三十里過陡溜子。二十里至泥頭驛。自過清溪後。鳥道羊腸。日益加險。而蠻烟瘴雨。亦漸繪溼微之景矣。

泥頭驛至林口尖。化林坪宿。計程七十五里。

泥頭走山溝中。由老君劍。水急如劍。故名。其地有猓獯。乃昔羌人也。十五里過高橋。上三角坪。二十里至林口。復下溝。紆折登坡。十五里經伏龍寺。十里上飛越嶺。唐置飛越縣於山麓。旋廢。山勢陡峻。怪石巉巖。逼人而起。終年積霜雪。懶雲下垂。山足行旅如在層霄。此內地第一險阻也。山頂有隘。過隘即下山。十五里陡坡。無駐足處。至化林坪。沈邊土司屬。山頂有一海廣。不過三里。居民皆飲之。

化林坪至冷磧尖。鑰定橋宿。計程七十五里。

化林坪峻嶺臨江斜盤鳥道下山二十里至龍壩鋪有伊公溝水繞此入瀘河右走沈村沈邊土官住牧處二十里過瓦角十里過安樂村十五里至瀘定橋地稍溫暖河即瀘水有鐵鎖橋康熙四十年建東西長三十一丈寬九尺施索九條覆木板於上水頗險惡賴此橋爲利濟焉今亦有木船無風水小亦可渡

瀘定橋至大烹壩尖頭道水宿計程七十里

瀘定橋十五里過大崗塘五里過咱哩土官住牧處五里由黃草坪過小烹壩十里至大烹壩復上小坡十里過冷竹關下溝曲折十里過瓦斯溝十里至頭道水高崖夾峙一水中流居民皆住山麓水聲碎甸如雷霆巖山有瀑布天矯噴薄高數十丈下垂若練帛真一大觀一奇境也

頭道水至柳楊尖打箭鑪宿計程六十里

頭道水至日地塘五里又二十五里至柳楊一路柳陰密箒沿溝十五里過沈坑十五里抵打箭鑪

打箭鑪至裏塘計程六百八十里

謹案打箭鑪相傳漢諸葛武侯南征遣將郭達安鑪打箭之地距成都千里天文亦非鬼分野爲中華之極西西域之極東天時多寒少暑層巒峻嶺峭壁懸崖中隔瀘河勢最險要昔爲南詔地今隸明正宣慰使司詳部落門

打箭鑪至折多宿計程五十里。

打箭鑪出南門十里過工竹卡。凡差使至此始照口外例支應。平坡遠進四十里至折多山麓。有塘鋪。有旅舍。崇岡在望。峽道入藥。瘴氣候異。常令人氣喘。自此一攬山川之勝。巖荒冰雪中。使人心懾。

折多至提茹尖。阿娘壩宿計程八十五里。

折多過山。山雖長。不甚峻。產大黃。藥氣薰蒸。過者多喘。秋冬積雪瀾漫。三十里過破礪。行漫坡。亂石中。二十里過納瓦路。不甚阻。下山南行十五里至阿娘壩。土產饒多。地方儼有富庶之象。

阿娘壩至瓦切尖。東俄洛宿計程五十五里。

阿娘壩行三十里。道路平坦。至瓦切。過俄松多橋。經小營宮寨子。復歸大路。行十五里。過打納石。有土人數十家。有柴草。十里至東俄洛。有塘鋪。

東俄洛至高日寺尖。臥龍石宿計程七十五里。

東俄洛南行。過大雪山二座。深林密箐。蟲如玉立。人跡罕逢。三十里至高日寺。循海子而南。三十里穿大松林。下山十五里。至臥龍石。有旅店。有塘鋪。

臥龍石至八角樓尖。中渡宿計程一百二十里。

臥龍石西行。一路平衍。荒涼特甚。六十里至八角樓。有塘鋪。閒有旅店。然廢置無常。再行六十里。至中渡。卽河口。過河爲裏塘界。所謂雅龍江也。設外委一員。專司渡船。夏秋以舟渡。冬春則列船爲浮橋。濟行旅。蠻人以牛皮船渡。逐浪上下。望之如水中鳧。凡官差過此。在河東宿者。明正土司供役。過河西宿者。裏塘土官供役。

中渡至剪子灣尖。西俄洛宿。計程一百三十五里。

中渡過河。上山行三十五里。過麻蓋。中有礪房。有柴草。此站路甚險遠。難行。且多夾礪。行者或宿麻蓋中。以均途程。且戒備焉。四十里上大雪山。至剪子灣。有塘鋪。山頗陡險。亦有瘴氣。下山復盤折登山。四十里。過波浪工塘汛。有駐防兵。以防夾礪。十里下山。又十里至西俄洛。有塘鋪。土百戶供役。給柴草。換烏拉。有漢人客舍。

西俄洛至咱馬拉洞尖。火竹卡宿。計程一百十里。

西俄洛路經小山。進溝。過大雪山。下坡。共行四十里。至咱馬拉洞。林深谷邃。夾礪甚夥。有塘鋪。二十里至巒卡。復越小灣。下山名亂石窰。再折而上。小崗順山溝而下。行三十里。復過大山。二十里至火竹卡。有人戶。有柴草。

火竹卡至火燒坡尖。裏塘宿。計程五十里。

火竹卡至小橋。沿河紆折。登小山。二十五里至火燒坡。下坡。即平原。二十五里抵裏塘。有駐防塘鋪。換烏拉。

裏塘至巴塘。計程五百四十五里。

謹案裏塘在打箭鑪之西六百餘里。天寒多雨雪。昔隸青海部落。層巒疊障。道路紆迴。爲西藏要地。有正副土司二員。詳部落門。

裏塘至頭塘宿。計程五十里。

裏塘西南行三十里。過大木橋。上阿喇柏桑山。峻嶺層巒。日色與雪光交燦。二十里至頭塘。即貢撒塘。番名額叻奔松。柴草。人戶俱無。僅有塘鋪。官差則裏塘烏拉馱載。以給旅客。則自攜帳房。裹糧從事焉。

頭塘至乾海子尖喇嘛丫宿計程一百五里。

頭塘寒風凜冽。凍綻肌膚。從此愈行愈冷。上山過黃土岡。行四十里。至乾海子。又經濼壩及虎皮溝。上山下嶺。盤旋五次。大石森立。橫梗道塗。樹木交蔭。流泉交匝。均係夾壩出沒之所。行四十里。過拉爾塘。有塘鋪。上喇嘛山。二十五里。至喇嘛丫。有柴草。人戶焉。

喇嘛丫至二郎灣尖三壩塘宿計程一百十里。

喇嘛丫由溝上山。越雪嶺四層。石山礧礧。不生樹木。過嶺則深林密箬。水草徧地。共行五十五里。至二郎灣。有塘鋪。無人戶。由山足進溝。順溝而下。路稍平。過著東塔五十五里。至立登三壩。有塘鋪。柴草。巴裏二塘交界也。

三壩至松林口尖大湖塘宿計程一百里。

由三壩行。亂石縱橫。青松蔽日。過巴山。有海子。下山。枯樹參橫。絕不聞鳥雀聲。五十里。至松林口。下溝。路平。五十里。過巴隆達河。至大湖塘。地居溝口。有塘鋪。礪房。柴草。

大湖至彭擦木尖小巴沖宿計程一百三十里。

大湖進溝。上大雪山。三十里。至嶺。高險非常。雪凌瀾漫。越山而下。至崩擦木。六十里。有塘鋪。無人戶。道路險阻。下山。行四十里。至小巴沖。有礪房。柴草。頭人給役焉。

小巴沖至巴塘宿計程五十里。

小巴沖順溝而進。上小坡。雜木叢生。陟降五十里。出溝口。抵巴塘。其地沃野千里。水泉環繞。日麗風和。佳境也。

巴塘至察木多計程一千四百五里。

謹案巴塘在裏塘之南五百餘里。土地饒美。天氣暄妍。儼然內地也。無城郭。山則峻標甲噶。水則流合金沙。昔爲拉藏罕所屬。今設正副宣撫司。去巴塘九百餘里。地名乍丫。俱詳部落門。

巴塘至牛古尖。竹巴籠宿。計程五十里。

巴塘西南行。過小山一。自巴塘途次。以至西藏。有醉馬草。馬食如醉。疲乏不能行。經茶樹頂。復上大山。鳥道臨江。勢最險要。四十里至牛古。有河通舟楫。復沿山行。逶迤五十里。渡金沙江。至竹巴籠。有礪房。柴草。塘鋪。

竹巴籠至公拉尖。莽里宿。計程一百三十里。

竹巴籠渡江。即金沙江通蜀之馬湖江也。四十里至公拉。有柴草。頭人給役。山山間中行五十里。過空子頂。有塘鋪。亦夾壩田沒之所。上下四十里。至莽里。有人戶。柴草。有熱。做供給差役。換烏拉。

莽里至南墩尖。古樹宿。計程一百二十里。

莽里過龍新山。春冬多積雪。三十里過邦木。有礪房。柴草。有塘鋪。中有甯靜山。勒有與西藏分界礪石。南行經大山。五十里至南墩。有漢人寺。每年七月。巴察兩地客民。皆雲集貿易。如內地廟會。過山四十里。至古樹。有人戶。柴草。有塘鋪。

古樹至普拉尖。江卡宿。計程一百里。

古樹過漫山。山路雲霧四垂。閒有瘡癩。道路亦復崎嶇。四十里至普拉。有人戶。平房。柴草。有喇嘛供役。多黑帳房。番民行漫坡路。六十里至江卡。有礪房。柴草。駐防。塘鋪。

江卡至山根尖。黎樹宿。計程一百十里。

江卡行四十里。至淥河。十里至山根。上大雪山。終年積雪。盛夏亦涼。刺骨。復越小山。上下七十里。自黎樹至王卡。稱爲惡八站。有人戶。柴草。駐防。塘鋪。換烏拉。

黎樹至阿拉塘尖。石板溝宿。計程一百十里。

黎樹過漫坡。樹木環映。五十里至阿拉塘。有人戶。柴草。換烏拉。番人多刁惡不馴。又過小雪山二座。高下迂折六十里。至石板溝。有人戶。柴草。駐防。塘鋪。有頭人供給差役。

石板溝至阿足塘宿。計程八十里。

石板溝西南行。過大雪山二座。寒輝騰耀。射日迷離。上下無可駐足。行人裹糧而至。阿足塘。乍丫屬。蠻性狡猾。有駐防。塘鋪。有頭人給役。

阿足至歌二塘尖。洛加宗宿。計程一百里。

阿足過漫山二座。阿足河一道。水勢洶湧。五十里至歌二塘。經平川二十里。上山三十里。路最險要。至洛加宗。有塘鋪。頭人給役。換烏拉。

洛加宗至俄倫多尖。乍丫宿。計程八十里。

洛加宗沿溝而上。傍山行。路紆曲。稍平。第偏仄多。偏橋。四十里過木橋。至俄倫多。有柴草。人戶。復西南行。四十里。至乍丫。有寺院。即會典圖注之札雅廟也。有碣房。柴草。駐防。塘鋪。換烏拉。此地。番性桀驁。駕馭亦復不易。

乍丫至雨撒尖。昂地宿。計程九十五里。

乍丫順溝行。石徑。蠶叢。多梗塞。三十五里至雨撒。有人戶。柴草。復西行。過大雪山。路甚陡險。積雪如銀。烟嵐之氣。中人作病。上下六十里。至昂地。有駐防。塘鋪。有喇嘛。供給烏拉。

昂地至噶喀尖。王卡宿。計程九十里。

昂地順溝行三十里。至噶喀。上大雪山。亂石崎嶇。積雪層疊。秋濤怒湧。路復曲折。上下行人飢寒起粟。手指凍裂。六十里至王卡。有人戶。柴草塘鋪。頭人換給烏拉。

王卡至三道礮尖。巴貢宿。計程五十里。

王卡經熱水塘。二十里至三道礮。路平。又二十五里。紆折上山。路轉峯迴。五里至巴貢塘。有塘鋪。柴草。有頭人供給使役。

巴貢至窟籠山尖。包墩宿。計程一百里。

巴貢上大山。或降或陟。終日蹀躞荒山中。六十里至窟籠山根。以山多石穴。大者如堂如皇。小者如鍾如盎。如鉞如鈴。掩映迴環。上山行拗折而下。四十里至包墩。有頭人供給烏拉。

包墩至猛布尖。察木多宿。計程一百五十里。

包墩沿河行十里。過大山一座。小山二座。俱偏橋列如雲棧。崎嶇難行。上下六十里。至猛布。有礪房。柴草。在山凹之中。沿山臨河。復沿河登山。行二十里。過大山。有地名小恩達。皆木石搭橋。橋路甚險窄。不可騎行。六十里過四川橋。抵察木多。有土城。居民二百餘戶。換烏拉。

察木多至拉哩。計程一千五百里。

謹案。察木多。古名康。又名喀木。距巴塘千餘里。中隔乍丫。路出西北。天時無異。裏塘。三山環偪。二

水合流爲西藏門戶。界通川滇。北河有四川橋。南河有雲南橋。滇省舊曾設鎮於此。今歸併川省。設臺站。有正副呼圖克圖三人。其他方人民。詳部落喇嘛各門。

察木多至俄羅橋尖。浪蕩溝宿。計程七十五里。

察木多南河而進。偪仄多偏橋。行者戒焉。水複山重。路通各部番境。四十里至俄洛橋。有人戶。路稍平。三十五里至浪蕩溝。有碓房。柴草。

浪蕩溝至拉貢尖。恩達宿。計程一百六十里。

浪蕩溝二十里過裏角塘。進溝上山。山偏橋行。險異常。雪凌滑甚。且有瘴氣。八十里至拉貢。有塘鋪。碓房。柴草。有頭人給役。二十里過松羅橋。察木多屬上山。四十里恩達寨。其重役夫馬。則類伍齊商卓特巴供給焉。

恩達寨至牛糞溝尖。瓦合寨宿。計程一百五十里。

恩達寨二十里過達塘。有塘鋪。二十里過喇貢山。二十里至牛糞溝。二十里過瓦合山。高峻且百折。山上有海子。烟霧迷離。設望竿堆。三百六十合周天數。如大雪封山時。藉以爲嚮導。過此戒勿出聲。遠則冰雹驟至。山之中鳥獸不棲。四時俱冷。逾百里無炊烟。二十里過臄膊嶺。下山。三十里過瓦合塘。有塘鋪。又二十里至瓦合寨。隸類伍齊。有頭人供役焉。

瓦合寨至麻利尖。嘉裕橋宿。計程八十里。

瓦合寨西南行四十里。至麻利。有碓房。柴草。十里過山。山勢高聳。下山繞河西行。偏橋疊見。三十里至嘉裕橋。番名三孀橋。有碓房。柴草。兩山環抱。一水中流。天氣暄和。地土饒美。有塘鋪。

嘉裕橋至鼻奔山根尖。洛隆宗宿。計程八十里。

嘉裕橋西南行。上得貢拉山。山勢陡峻。上下二十五里。詰屈如蛇形。有松林。路悉險窄。多溜沙地。五里過橋。至鼻奔山根。五十里至洛隆宗。有礪房。柴草。有塘鋪。換烏拉。

洛隆宗至曲齒尖。碩般多宿。計程一百六十里。

洛隆宗西南行。經漫坡。上坡山路陡險。九十里過鐵凹塘。大山壁立。有塘鋪。順溝而行。路稍平坦。二十里至曲齒。又名紫駝。有大喇嘛寺。可尖可宿。近新開一路。由東南行。爲春夏繞道也。五十里至碩般多。居人稠密。物產亦饒。有礪房。柴草。有駐防。塘鋪。換烏拉。

碩般多至中義溝尖。巴里郎宿。計程一百里。

碩般多沿溝而上。路平。五十里過巴喇山。勢不甚峻。至中義溝。山程平坦。五十里至巴里郎。有礪房。柴草。有塘鋪。頭人供給烏拉。但居人落落。旅況增岑寂耳。

巴里郎至索馬郎尖。拉子宿。計程一百里。

巴里郎進溝三十里。上賽瓦合山。通志作朔馬拉山。邊風獵獵。亂山蒼葦。二十五里至索馬郎。又四十五里至拉子。沿山繞河而行。地多溜沙。足卻不前。其地有塘鋪。頭人給役。柴草價昂。蓋山兀地。荒致此不易耳。

拉子至邊壩尖。丹達宿。計程一百十里。

拉子西南沿山而上。過畢達拉山。山路平坦。上下十里。下山路偏仄。河流縱橫。水清淺。可褰裳而涉。四十里至邊壩。即達隆宗。有塘鋪。二山橫跨。四水環襟。爲西藏遼闊之區。六十里至丹達。有塘鋪。營官第巴供役。換烏拉。

丹達至察羅松多尖。郎吉宗宿。計程一百里。

丹達之麓有廟。相傳雲南某參軍解餉過此。歿於王事。屢著靈異。土人祀焉。過山者必禱之。十五里上沙貢拉山。峭壁摩空。蜿蜒而上。過閣王瀉。夏則泥滑難行。冬春冰雪成城。一槽僦仄。行人拄杖魚貫而進。此赴藏第一險阻也。丹達神見寺。廟門三十里下山。五里至察羅松多。五十里至郎吉宗。有禱房。柴草塘鋪。第巴供給差役。

郎吉宗至大窩尖。阿蘭多宿。計程九十五里。

郎吉宗一名浪金溝。曠野平坦。換烏拉順壩而下。有兩路。一山山徑。路窄險。一由溝。路稍平。惟夏日水漲多。阻四十里。至高塘有第巴供給差役。路雖平而側進若谷。順河而下。五十五里。阿蘭多有塘鋪。禱房。柴草。

阿蘭多至破寨子尖。甲貢宿。計程七十里。

阿蘭多西南行。側身循溝而上。南北俱有偏橋。上山路險窄。行人凜然如墜。三十里至破寨子。一名阿南卡。有橫石森如人立。俗名鸚鵡嘴。鑿以爲道。四十里至甲貢。拉哩屬。有柴無草。有塘鋪。第巴供給差役。

甲貢至大板橋尖。多洞宿。計程八十里。

甲貢路崎嶇。傍山而上下。過小坡。漫衍荒涼。四十里至大板橋。四十里至多洞。人烟寥落。無傳舍。有塘鋪。凡往來者。即其汛以爲棲息地。無柴草。

多洞至擦竹卡尖。拉哩宿。計程一百四十里。

多洞塘附近水邊。率水滸而上。二十里上大山。山峯峭立。雪凌險滑。視丹達無異。即魯工拉山也。六十里至擦竹卡。有熱水塘。過山凹。中有一湖。約寬七八里。長十餘里。冬春凍如平地。行人履之無怖。六十里抵拉哩。天冷水草惡劣。有駐防塘鋪。堪布供給差役。而烏拉則三十九族三十六村協濟也。

拉哩至前藏計程一千十里。

謹案拉哩在達隆宗西北。距察木多千餘里。時氣嚴寒。山勢陡險。原隸西藏。無城郭。所屬寺院。委堪布喇嘛主掌。兼第巴事。又有工布。江達。在拉哩西南。工布僻處一隅。而江達則西藏孔道。天時和暖。產稻米。有水田。絕域中之沃壤也。詳部落門。

拉哩至阿咱尖山灣宿計程一百六十里。

拉哩山溝復上大山。危峯聳峙。冰雪四時不消。巖崖海岸。風起雪擁。險滑難行。五十里至阿咱。有塘鋪。第巴供役。再行三十里。有海子。長四十餘里。俗傳有獨角獸。頗爲怪。八十里至山灣。有塘鋪。少柴草。

山灣至常多尖。甯多宿計程一百二十里。

山灣塘由山灣上草拉山。險峻難行。約四十餘里。多冰雪。積石鱗峒。共六十里。至常多。天時常如冬。山皆不毛。有塘鋪。居人以樹皮爲屋。僅數間。炊烟冷落。屬江達。有第巴供給烏拉。六十里。路稍平坦。至甯多有塘鋪。

甯多至過拉松多尖。江達宿計程八十里。

甯多路平。順濤而下。四十里。過拉松多。即王巴琿。過橋。水瀑湲激。石有聲。橋以東屬江達。四十里。至江達。地不甚寒。有駐防塘鋪。有柴草。

江達至順達尖。鹿馬嶺宿計程一百六十里。

江達在拉哩之西南。憑山依谷。形勢險要。有工布第巴供給差役。沿河而下。六十里。至江達。有塘鋪。沿溝而進。河道分流。林木陰翳。一百里。至鹿馬嶺。有塘鋪。山高無險阻。約四十里。視前歷之冰雪峻嶒者。居然平易矣。

鹿馬嶺至堆達尖。烏蘇江宿。計程一百八十里。

鹿馬嶺進溝而上下約四十里。山路坦夷。微有瘡痍。番稱葛倉。寒風凜冽。無盛暑。八十里至堆達。一名普善倉。有塘鋪。烟火寥寥。柴草亦稀。順河繞溝而下。過竹貢六十里。至烏蘇江路。俱平坦。有塘鋪。小第巴支應柴草牛羊。去衛藏較近。別開一奇境矣。

烏蘇江至仁進里尖。墨竹工卡宿。計程一百三十里。

烏蘇江水勢平緩。順河西行。雖僻處一隅。而程途夷坦。迥異前險。六十里至仁進里喇嘛寺尖。有塘鋪。行者如僕馬告瘁。至此可憩息焉。由東北而上。七十里至墨竹工卡。有塘鋪。第巴給役。

墨竹工卡至拉木尖。德慶宿。計程一百二十里。

墨竹工卡正北接察木多草地之路。其水向西流至藏。即藏河也。水驛有皮船。四十里至拉木。一名納摩。有房舍。柴草稀少。寺院幽僻。人稠地廣。繞河南而下。五十里。過占達塘。復西行。三十里至德慶。

德慶至蔡里尖。前藏宿。計程六十里。

德慶其地多候館。往來者恒棲止之。路傍有塘鋪。繞道而下。四十里至蔡里。一作采里。俗傳即西游真詮所記之高老莊。有第巴供給柴草。與西藏隔一水。二十里抵西藏。其地四山環峙。儼若城垣。水秀山奇。宛然福地也。

前藏至後藏。計程九百里。

謹案。前藏在拉哩之西千餘里。達賴喇嘛坐牀之所。曰布達拉。寺廟曰大詔。小詔。唐古忒所居之地。曰拉撒。寺僧辦事之所。曰商上。噶布倫辦事之所。曰噶廈。第巴辦事之所。曰碩裏。喇嘛居住之所。曰札倉。餘詳喇嘛寺廟山川部落各門。

前藏至登龍岡尖。業黨宿。計程八十里。

前藏路平坦。四十里過大橋。至登龍門。有房舍。順河而行。途亦平易。又四十里至業黨。有塘鋪。房舍。第巴供給。

業黨至僵里尖。曲水宿。計程九十里。

業黨亦順河而行。經崖礪三。亦不甚險阻。四十里至僵里。又五十里。從阡陌行。河流委折。至曲水。相傳有蝎子洞。犯死罪者。活縛至洞。令食之。沃野平原。綿亘百里。有房舍。柴草。塘鋪。有第巴給役焉。

曲水至岡巴則尖。白地宿。計程一百四十里。

曲水十五里至鐵索橋。江勢浩濶。最險。渡以木船。過河。三十五里至岡巴則。有房舍。柴草。又過巴則嶺。危峯巖業。即甘壩山。下山沿洋。卓雅錯。海北岸紆折而行。柴草稀少。沙路平坦。五十里至白地。

白地至亞喜尖。或撻魯尖。浪噶子宿。計程一百五里。

白地三十五里至亞喜十五里。至撻魯。俱有房舍。柴草。有歧路。一山江孜。一山然巴。然巴爲春夏商賈所必經。冬則雪凌。多阻滯。且翁古一帶村落。廣糧食。戊申西征之役。改由浪噶子。今因之。五十五里至浪噶子。

浪噶子至宜椒尖。春堆宿。計程一百二十里。

浪噶子五十五里平坦。至宜椒。過噶如山。六十五里至春堆。有第巴。人戶。路亦平坦。左手分路。通布魯克巴。

春堆至谷洗尖。江孜宿。計程一百四十里。

脊堆至谷洗七十里。過日節洞卡。七十里至江孜。二處均有第巴。人戶柴草所出。則江孜較多。路俱平坦。

江孜至甘壩尖。白浪宿。計程一百十五里。

江孜繞班古爾曲底寺前。五十五里至甘壩。六十里至白浪。有第巴。人戶。柴草。

白浪至葱堆尖。札什倫布宿。計程一百十里。

白浪迤邐而進。過洋椿橋。即雅蛟藏布大河也。七十里至葱堆。又四十里至札什倫布。

後藏至拉子。協噶爾。定日。聶拉木。

謹案。後藏地曰札什倫布。建仍仲甯翁結巴寺。由前藏內行。轉西行八日。爲班禪額爾德尼坐牀之所。詳山川寺廟門。其至聶拉木。濟隴等處邊界地方。其道里遠近。險易。宜悉載焉。

札什倫布至拉爾塘尖。剛堅喇嘛寺宿。

札什倫布南行。轉西。至拉爾塘。又轉北。至剛堅喇嘛寺。路俱平坦。

剛堅喇嘛寺至花寨子宿。

自剛堅喇嘛寺南行過三壩橋轉西北行至花寨子

花寨子至札什剛尖彭錯嶺宿。

由花寨子過納雅山至札什剛又過大山至白達寨又過峻嶺臨大河而下復登彭錯嶺有營官寨

彭錯嶺至札塘尖拉子宿。

彭錯嶺由山後下嶺至札塘經轄載至鐵索橋不過河越大山至拉子

拉子至白佳紀崗尖札普宿。

拉子上山至佳紀崗一路山蹊登涉過甲錯大山下至札普

札普至拉古噶古尖羅羅宿。

自札普迤邐崇山峻嶺下山至拉古噶古由拉古噶古羅羅大山下山經熱水塘又過小山至羅羅塘

羅羅塘至協噶爾宿。

由羅羅塘越小山下過羅桑橋又過山梁過脅曲橋至協噶爾有喇嘛寺營官寨

協噶爾至咱果爾尖眉木宿。

由協噶爾越繫日山下山。過蚌楚河。至咱果爾尖。又上山。至眉木宿。有礪房。人戶。

眉木至定日宿。

白眉木山後繞下。至定格橋。上山。至定日。一名第哩浪古。

定日至朗古尖。巴都爾宿。

由定日渡普楚河。至朗古。越通拉大山。罡風凜冽。寒氣逼人。下山。又登山。至巴都爾。有喇嘛寺。有礪房。

巴都爾至達爾結嶺尖。聶拉木宿。

由巴都爾依山越嶺。至達爾結嶺。又連度山溪。上帕甲嶺。經噶宜卡。過木薩橋。登山。至聶拉木。

聶拉木由巴都爾分路。至宗喀。計行程四日。

巴都爾至俄拉喇嘛寺宿。

自巴都爾越連崗層嶺。至俄拉喇嘛寺。

俄拉喇嘛寺至轄囉尖。白孜宿。

自俄拉喇嘛越甲納大山。下至轄囉。無人戶。又過小山。至白孜黑帳房。無備房。

白孜至達格尖。撒喜宿。

山白孜平川繞行。至達格。其北有納錯海。又平路逶迤。至撒喜黑帳房。

撒喜至宗喀宿。

由撒喜越貢尙拉大山。又繞宗喀山後。至宗喀。有石堡。

宗喀至濟隴。計行程三日。

宗喀至滾達宿。

宗喀紆折漫山。渡鹿馬河。又越山梁。至滾達。有礪房。

滾達至卓黨宿。

滾達越山嶺。有大所寺。過鹿馬橋。上擦木卡。極險峻。下山。至卓黨。

卓黨至濟甯宿。

由濟甯過帕巴喇嘛寺。
通廓爾喀湯布城大路。

宗喀至薩迦寺計行程十日。

宗喀至胡林宿。

由宗喀經羣喀寺。越工倘拉大山。其西南有
補泥海。下山。走平川。至胡林黑帳房。無獨房。

胡林至強谷宿。

由胡林繞山至撒喜。登撒拉大
山。下山。走平川。至強谷黑帳房。

強谷至阿拉寺尖。勒龍宿。

強谷之西。名雅蛟藏布河。不渡河。繞北行。越山
梁。下山。至阿拉寺。又繞山。至勒龍山頂。有大寺。

勒龍至臧楮尖。達增宿。

由勒龍邊山麓。至臧楮。過臧楮河。經工
龍寺。沿山逶迤。至達增。有碉房。人戶。

達增至巴馬尖湯谷宿。

由達增繞山越小山梁至巴馬路平坦又沿山行越江納大山下山渡河至湯谷黑帳房。

湯谷至拉了尖常桑宿。

由湯谷越四小山至拉了有拉了爾寺又繞山麓至常桑黑帳房無碕房。

常桑至拉湯尖于隴札宿。

由常桑越常桑山下山渡小河至拉湯又繞山麓至于隴札黑帳房無碕房。

于隴札至熱隴尖噶喀宿。

由于隴札繞山經熱水塘至熱隴越小山沿甲水海過噶拉山至噶喀有碕房。

噶喀至浪錯尖星克宗宿。

由噶喀越拉喀大山下山至浪錯沿廓拉海岸依山根紆折而行至星克宗有碕房。

星克宗至瓊喀尖咱普宿。

由星克宗沿山繞河。越瓊略山。有拉子歧路。又越山渡河。又過咱木橋。至咱普黑帳房。無礪房。

咱普至薩堆尖。薩迦喇嘛寺宿。

由咱普越山至薩堆。又繞山麓。過小河。至薩迦胡圖克圖寺。其教有家室。寺南又有大喇嘛寺。

薩迦寺至札什倫布。計行程三日。

由薩迦寺越俄卓山。過薩迦橋。經尼姑寺。江公寺。其北有曲頂乘登山。至擦囉。有礪房。樹木。

擦囉至慶孜尖。剛堅寺宿。

由擦囉下山。過捨楮。繞山麓。行山。山有崙布寺。過小河。至慶孜。又越浪噶大山。下山。至剛堅寺。

剛堅寺至土城尖。札什倫布宿。

由剛堅寺越山麓。繞行至土城路平坦。至札什倫布。

後藏由草地。陽八井。至前藏。計行程十日。
札什倫布至生多喇嘛寺宿。

由札什倫布過轉爾橋平路。至生多喇嘛寺。寺在山頂。有礪房。樹木。

生多喇嘛寺至鹿古洞尖。密蛟納噶宿。

由生多喇嘛寺登山。至達竹渡。過河。繞山而行。至鹿古洞。其南有鹿古寺。又繞山。有尼姑寺。至密蛟納噶。

密蛟納噶至達拉寺尖。昔喀宿。

由密蛟納噶經黑帳房。山路崎嶇。至達拉寺。又依山繞行至昔喀黑帳房。有礪房。田地。

昔喀至拉熱尖。務庸縱黨宿。

由昔喀下山坡。渡吳宇橋。越日蚌大山。下山渡河。經波多寺。至拉熱。又越山梁。至務庸縱黨山頂。有官寨。

務庸縱黨至山根尖。塔木墩宿。

由務庸縱黨黑帳房。過作木橋。繞山至山根。其山則拉古。喇古山也。又越山。至塔木墩。平川黑帳房。無礪房。

塔木墩至布勒尖。碩布巴拉宿。

由塔木墩經麻爾江。過河上山。至布勒。又越碩布大山。至碩布巴拉。平川黑帳房。無礪房。

碩布巴拉至陽八井宿。

由碩布巴拉過河名碩布河至陽八井喇嘛寺在山麓有河繞其前。

陽八井至德慶宿。

由陽八井經熱水塘依山繞路過佳桑橋有曲桑寺至山岡名德慶有碉房。

德慶至浪孜宿。

由德慶繞小山至喇巴橋有初普寺至浪子有碉房樹木田地。

浪孜至甲普尖前藏宿。

浪孜至甲普有碉房樹木自甲普至洞噶爾關其南名只桑橋通莽黨赴後藏路也。

駐藏大臣工部尙書都統松筠巡邊記。

乾隆六十年乙卯夏四月巡邊自前藏起程經曲水過巴則江孜共十日行抵後藏由札什倫布走剛堅喇嘛寺彭錯嶺拉木洛洛協噶爾過定日通拉大山共行十一日至聶拉木又由達爾結嶺西轉經過伯孜草地鞏塘拉大山瓊噶爾寺南轉出宗喀共行六日至濟隴仍旋宗喀東北行十日還至拉孜。

入東山。一日至薩迦溝廟。自廟北行二日。出山。仍走剛堅寺。還至札什倫布。往復略地。隨在繪圖。知其概焉。緣札什倫布西南。左有薩迦溝內之曲多、江鞏。此二處迤北。察喇寺等地。方有糧草。隨處皆有險要。右有彭錯嶺。此地建有大廟。有樹木。有糧草。廟迤北亦

有險要。南之峭壁連崗。是爲後藏之咽喉。實天然要隘也。乃辛亥年廓爾喀以步卒千數人。自聶拉木走

薩迦。直抵札什倫布。彼時果有現在之漢番官兵。劃分兩路。一赴曲多。江鞏以堵其前。一赴彭錯嶺偵探。由拉孜以截其後。則廓爾喀深入無援。可以不戰自潰。何至如入無人之境。任其肆意猖狂如是耶。若云兵少。其徐南鵬僅有漢兵數十名。又何以固守營官寨耶。是當初漢番兵不知有曲多、江鞏、彭錯嶺等處險要。可守可戰。以致胸中無主。茫然失措耳。至協噶爾。定日。左首絨轄。喀達。定結。西路之宗喀。瓊噶爾。鞏塘拉大山。皆爲天然門戶。曲水。巴則。江孜。又爲前藏之要隘。而江孜迤南之帕克哩。甘巴等處。界連臧曲大河。尤爲前後藏第一險要。所有在藏漢番官兵。及噶布倫等。均宜熟悉。因於前後藏江孜教場。泐石。咸使對圖。講求人各胸中有主。方於汛防有益。然安邊之策。莫若自治爲上。非獨濟隴。聶拉木。番民。應派廉潔營官管理。所有前後藏各屬營官。第巴。如皆能教以廉潔自持。善撫百姓。則天佛庇佑。恆無他患矣。是爲記。

札什倫布由哨黨小路至前藏。計程八百四十里。

札什倫布四十里至落窺。

一百二十里至年木胡達。

八十里至沙楮卡。

七十里至白地。

五十里至曲水。

四十里至登龍岡。

前藏至布魯克巴計程一千四十里。

前藏七十里至業黨。

八十里至巴則。

七十里至浪噶孜。

七十里至列隆。有人戶土官。微草無柴。

五十里至沙瑪達。有人戶田畝。

一百里至色木多。

五十里至能木宗。

七十里至咱黨。

一百二十里至巴則。

四十里至能工巴。

三十里至拉撒招。

六十里至札什采。

一百里至白地。

一百十里至勒隆。有人戶無柴。

六十里至噶拉。有人戶、田畝、有草無柴。

五十里至遐拉。有人戶、有草無柴。

六十里至帕爾。即帕克哩、有人戶、田畝、無柴有草、係布魯克、巴噶畢、西藏三處交界。

四十里過山、至香郎。有人戶、係土牆版棚棚房、有柴草、水田、出稻穀、竹木與中華同。

七十里至仁進步。

三十里至東噶拉。二處俱屬香郎。

四十里至喇嘛隆。有人戶、寺院、餘俱不及香郎。

五十里至西木多。有人房、柴草、大寺院、內住呼圖克圖、名吉賽吉書、乃諾彥林親兄弟。

三十里至札什曲宗。有人戶、柴草、大寺院、乃諾彥林親避暑處。

謹案自藏至札什曲宗計十七站、再行二日、地名坪湯、即第巴諾彥林親住處、惟西木多、札什曲宗夏日稍涼、故至此避暑、其方產稻穀、麥、豆、黍、稷、各種瓜果蔬菜、鵝鴨、鷄、豬等物、仿於中國。

前藏由陽八井至噶爾藏骨察計程一千三十五里。

陽八井分路四十里至峽布。

七十里至駝羅海。

五十里至楮定馬奔。

四十里至桑吉馬丁。

五十里至喇定初多。

五十里至騰格爾諾爾界。大海子邊。

五十里至郎錯。又名族隆角。

六十里至過中。有太山山頂有海子。

八十里至章錯。過大山有海子。

四十五里至海子頭。

六十里至卓得爾。

五十里至邦塘。

五十里至巴業了。

七十里至凍錯。

七十里至噶爾藏骨察。

前藏至生根物角計程一千五百十里。

前藏四百十里至騰格爾諾爾。

七十里至哈隆。過大雪山。

六十里至錯隆角。

五十里至大海子。過二山。

六十里至白噶哈力水。

六十里至拉卡爾工多。

四十里至察木哈。過山。

九十里過大河、至鹽池。

四十里至西甘工布。

五十里至達甘峨所。過山。

三十里至雀雅。

二十里至奇瑪多隆。此處供換烏拉。

四十里至白納辛。

七十里至吉都烈路。

五十里至巴拉。過山。

六十里至郎喀。過二山。

三十里至卡爾哈。過山。

五十里至哈甘布。過山。

四十里至恩達哈。

六十里至星千哈岡。過山

八十里至色爾松多。過山

五十里至生格物角。過山

謹案。自藏至生根物角。計三十一站。沿途處處有烟瘴。無柴。燒糞。水草俱微。

前藏至奔卡立馬爾。計程一千五百十里。

西藏三十里至克噶拉俱。

五十里至蒙至。

四十里至义里場未。

四十里至杰蟲。

六十里至拉末。

八十里至彭多。

三十里至呼整。俗名熱正

五十里至察木桑。

四十里至巴達。

七十里至揆娘庫。

三十里至三壩。

七十里至多羅得巴。

七十里至哈拉烏蘇。

六十里至胖米麻。

八十里至阿木多。

六十里至投順納瓦。

五十里至厦木納熱麻。

五十里至圖爾郡。

七十里至熱麻拉撒。

八十里至巴恩拉木期。

八十里至白果東馬。

六十里至布呼江。

七十里至遮隆。

八十里至楚隆。

六十里至彭卡。

五十里至奔卡立馬爾。

謹案自藏至奔卡立馬爾設小卡五處曰噶爾藏骨察托克托賴立拉撒畢隆奔卡立馬日子前藏至納克產卡倫計程一千五百十里。

前藏三十里至甲普。

四十里至浪孜。

六十里至拉咱爾。

五十里至粗布。以上有人戶柴草

七十里至阿哩。過大雪山有柴草無人戶

八十里至甲仲。

七十里至泥木根舉。

六十里至族貢。

七十里至八角。以上有人戶柴草微

五十里至大雪山根。

九十里至林卡宗。

五十里至蘭卡。以上無人戶柴草。

八十里至熱黨。有人戶柴草。

六十里至甲錯。人戶有柴草微。

六十里至墊登。

四十里至魚骨柏。二處柴草微。

一百二十里至噶拉。

五十里至賀洛。

七十里至察黨粗固。

七十里至日鏡。

九十里至木慶。

八十里至柏木壩。以上人戶水草俱無。

八十里至按烈。

五十里至納克產。人戶有柴草微。

謹案前藏至納克產計二十四站沿途俱有瘴氣又自納克產分小卡四處一曰特布駝羅海距納克產十四日約程五百餘里其地甚冷瘴氣甚盛一曰拉克察距特布托羅海七日約程三百餘里其地草微無柴有瘴一曰庫克擦距納克產十三日約程五百餘里有燒柴水草俱微有瘴一曰札克欽距庫克擦八日約程四百餘里其地柴草水俱無

前藏至玉樹卡倫計程二千二百七十里。

前藏東北至噶拉壩三十里。

三十里至彭多。

三十里至墨隆堡。

三十里至節仲。

三十里至松竹宗。

三十里至勒甘多。

三十里至彭多。

三十里至俊門。

七十里至納地。

八十里至巴布龍。

三十里至桑多。

八十里至江足卡。

九十里至哈拉烏蘇。

三十里至色爾龍。

六十里至噶色爾格卡。

六十里至江古郎。

四十里至溫江松多。

八十里至多塞爾。

五十里至格雅爾卡。

五十里至湯清。

八十里至江清巴納卡。

四十里至曾項讓。

五十里至納喜塘。

九十里至春科塘。

四十里至甲里剛多。

四十里至先布松多。

六十里至東布松多。

六十里至興東。

一百里至畢洛腮。

六十里至擦桑納。

六十里至曲齒松多。

七十里至曬多坡。

一百二十里至噶順。

五十里至噶喜。

八十里至魁清。

一百里至納馬蠻地。

一百十里至江溝八納巴。

一百里至玉樹。

瀘右縣。謹案自藏至玉樹計三十八站。自玉樹分小卡四處。一曰庫爾塞。一曰白兔山。一曰齊察河。一曰

前藏至騰格爾諾爾計程四百十里。

三十里至甲普。

四十里至浪孜。

四十里至奔里。

四十里至德慶。

五十里至陽八井。

四十里至卡孜。

四十里至乾海子。

四十里至桑托羅海。

五十里至楮登立馬爾。

四十里至那根初多。

謹案。楮登立馬爾。即騰格爾諾爾。古天池也。那根初多乃天池之口。以上自噶爾藏骨察。生根物。角奔卡立馬爾。納克產。玉樹。騰格爾諾爾等處。皆設要卡分防。自準噶爾掃蕩以後。此外俱係西疆。而駐藏大臣每歲出防之役。遂罷。

西藏由木魯烏蘇至西甯。計程三千七百餘里。

拉撒四十里至郎拉。

三十里至們都。

七十里至羣科爾。

六十里至沙拉。

有水田。產荏草子。

四十五里至達隆。

四十里至夾藏壩。

過鐵索橋。

六十里至羊拉。

六十里至達木東邊。

七十里至克屯西立克。

六十里至什保諾爾。

六十里至噶欠。

六十里至哈拉烏蘇西邊。

五十里至郭隆。

五十里至楚木拉。

自們都至此。有水。草無柴。燒糞。有瘴。

七十里至綽諾果爾西邊。

六十里至蒙古西里克。

四十里至蒙咱西里克東邊。

四十里至沙克因果爾。

六十里至泡河老。

五十里至巴木漢。

六十里至索柯東邊。

五十里至伊克諾木罕烏巴什。

六十里至吉利布拉克。

四十里至因達木。

四十里至阿木達河。

四十里至哈拉河洛。

五十里至布哈賽勒。

自綽諾果爾至此俱有水草無柴燒糞有烟瘴。

五十里至多倫都爾。

西藏青海交界

六十里至呼浪河。

五十里至賽柯蚌。

八十里至清河察漢哈達。

八十里至察漢額爾吉。

以上數處俱有水草無柴燒糞有微瘴。

五十里至庫庫可達。

五十里至庫柯諾爾。

四十里至庫柯溝。

五十里至木魯烏蘇西河。

七十里至哈拉河洛。

六十里至巴罕拜彥。

三十里至烏河諾爾。

六十里至烏河那峽。

四十里至巴彥哈拉。以上數處俱有水草。無柴。燒馬糞。無烟瘴。

八十里至黨塞爾河。

四十里至哈馬爾厄勒泰。

九十里至索諾木。

七十里至畢留圖河口。

五十里至垓里布拉克。

六十里至哈侖烏蘇。

五十里至登努爾臺。

三十里至依麻圖。

七十里至木呼爾。

三十里至察漢鄂博圖。

五十里至堪布灘。

四十里至那拉薩拉圖。

五十里至喇嘛托羅海川口。

六十里至哈拉河。

四十里至且克諾爾。

七十里至黑悅爾達般。

四十里至畢留圖。

五十里至多倫諾爾。

五十里至哈侖烏素。

四十里至依麻圖川。

七十里至沙拉圖。

八十里至哈套口。

七十里至庫庫托羅海。

五十里至阿什漢水。

四十里至駱駝頸項。

即土爾根。自巴彥哈拉至此俱有水草。無柴。燒糞。微有烟瘴。

六十里至東科爾。即丹噶爾

九十里至西甯城。

謹案自藏至青海、西甯，俱有蒙古番子七十九族住牧，其生計種田、牧畜、打牲各不等，每年達賴

喇嘛、班禪額爾德尼遣堪布囊素進京，於四月間行走，此路冬月不可行也。

打箭爐由霍耳德爾格草地至察木多，共三十九站，計程一千七百七十五里。

四十里至折多山根。

四十里過折多山，至別始分路。

四十里至瓦七砦。

四十里至郎砦堡。

四十里至八桑砦。

五十里至上八義。

五十里至汛馬塘。

三十里至雀雅。

五十里過山，至喇地塘。

六十里至孜隆。

七十里至迦薩楮卡。

五十里至吉如楮卡。

三十里過小山，至章谷。

五十里下山，至江濱塘。

五十里至竹窩。

三十五里至勒恭松多。

二十里過普王隆，至廿孜。

三十里過河，至白利。

五十里至隆壩擦。

四十里至阿加拉洛。

六十里至益隆。

四十里至德爾格界。

六十里至羅登。

六十里至吉馬塘。

五十里至格葱。

六十里至楮泥拉沱。

五十里至春科西河。

四十里上山至班第楮卡。

三十里下山至巴戎。

六十里至甲界。

七十里至姜黨。

六十里至草拉。

三十里至草里工。

三十里至峽隆塔。

五十里至哈甲。

三十里至哈甲峽口。

三十里至冲撒得。

六十里過山至熱了。

四十里過山至察木多。

謹案自打箭爐草地至察木多。路遙平坦。草廣柴微。此一帶番民多住黑帳房。以牧畜爲主。有烟瘴。

察木多由類伍齊草地進藏。至墨竹工合大路。共二十九站。計程一千九百一十里。

五十里至俄羅藏分路。

四十里至康平多。

五十里至達塘。

一百里至江清松多。

八十里過四小山、至塞爾松多。

五十里至吉樂塘。

七十里至江黨橋。

六十里至汪族。

五十里至三大徧關。

七十里至噶現多。

六十里至拉里界。

七十里至沙加勒。

七十里至哈噶錯乍。

六十里至杓多。

五十里至類伍齊。

八十里至甲木喇族。

八十里至岡松多。

六十里至拉咱。

七十里至察龍松多。

七十里至拉貢洞。

八十里至結樹邊卡。

有大寺院

八十里至噶咱塘。

七十里至拉里堡。

從右手進山溝

七十里過山、至吉卡。

七十里至積華郎。

六十里至胖樹。

六十里至仲納三巴。

六十里至約同定同古。

七十里至墨竹工卡。

松潘出黃勝關由草地至合西甯進藏之庫庫賽計二十四站共程一千五百九十里。

黃勝關六十里至兩河口分路。

八十里至楚阜。

七十里至甲旺麻旺。

五十里至沙鹿堂。

六十里至巴馬。

六十里至江地克里麻。

八十里至龍頭溪。以上皆有水草無柴。

七十里由察漢拜勝分路南至圖深圖過河至吾浪莽。此河即黃河也

八十里至宗喀爾。

七十里至察漢托灰。

七十里至沙那吾舊。

六十里至齊齊哈賴。

七十里過大雪山至安定達壩。

七十里至土龍岡老。

五十里至塔奔托羅海。

六十里至丹仲營。

六十里至牒倫墩。

八十里至中牒倫墩。

八十里過大雪山至上牒倫墩。

七十里至吾浪牒倫。

二百四十里至古爾班索諾木。

自吾浪牒倫分作四站每站六十里合西甯進藏之庫庫賽地方。

兩河口分路至青海計二十二站共程一千三百五十里。

兩河口八百四十里分作十四站至巴漢海流圖。

六十里至烏蘭勒格。

七十里至巴罕圖爾根。

六十里至伊克圖爾根界。

六十里至伊克圖爾根。

七十里至察罕諾木漢。

六十里過黃河至察罕托羅海。

一百三十里至青海。

兩河口至西甯計二十五站共程一千五百五十里。

兩河口四百九十里分作八站至獨磊出庫。

六十里至佛藏。

四十里至瑣胡盧。分路

七十里過黃河至察罕拜勝。

六十里至布爾哈數。

六十里至廈納圖。

六十里至巴溪海流圖。

六十里至安遮谷圖。

六十里至烏蘭。

六十里至納木罕。

七十里至巴納布哈。

八十里過山、至莽錦。

七十里過山、至郎岸。俱有水草

八十里至歸德。

六十里過黃河、進溝。至郭密。

八十里過大山、至康城溝。

五十里進關門、至申。

六十里至西甯府城。

兩河口至舊洮州計十四站、共程九百三十里。

兩河口七十里至雜牛洞。

八十里過狼架嶺、雪山、至柏香林。

五十里至大草場。

四十里至答建寺。

五十里至下包坐。

六十里至潘州。

八十里至龍溪頭。

六十里至獨磊蟲庫。

六十里向北至熱黨。

六十里至獨倫。

八十里過大小二山至丹倫。

八十里至納布鍋。
八十里至舊洮州。

八十里至撓多。

兩河口至河州計十六站。共程一千三十里。

兩河口五百五十里分作九站。至熱黨。

六十里至江托。

六十里至洮河腦。

八十里至多提。

五十里至黑鏗。

八十里至舍納。

八十里至沙馬關。

七十里至河州。

附錄藏程紀略

康熙辛丑陝西涇陽
縣知縣焦應旂識。

夫藏何自昉乎。古稱西方有聖人謂佛。生其地。世居於此。是耶否耶。然則何爲以藏名。藏之爲言。藏也。無盡藏之謂也。意者以梵書三藏有經藏律藏論藏之說。若是之無盡藏也。其上著番人又稱之曰招。此不知何解。大要土語蠻音有聲無字。其無所取義無疑。獨是上古之時。不聞有佛也。漢唐間始重虛無寂滅之教。數遣使西域求佛經。迎佛骨。而佛教之興。流傳中國。迄今千百祀不改。雕形塑像。崇建禪林。釋子尼僧。飯依法戒。世俗庸衆。從而敬信之。持齋素樂。布施動曰廣積功。願登西方極樂世界。雖捨身破家。勿惜有心世道者。亦往往置而弗論。要不過存此法門。以警衆覺。愚醒迷啓悟。使之念佛從善。不大失其本心而止。未嘗身履藏地。亦未知有所謂活佛也。余宰涇之四年。西塞賊匪跳梁。侵擾哈密。天子簡將征討。乙未夏。余捧檄從軍。轉運糧儲。歷有四載。嗣因逆賊勢窮。潛行狡計。

掠及藏地。天子怒其猖獗。特命大將軍王親統六師。殄茲小醜。因逆達賴喇嘛進藏。是即活佛。余偕同事諸公。奉調押運。庚子四月。由西甯出口。走阿什漢水。日月山。柴雞口。工噶腦兒。以及多倫。達壩等處。赤日之下。雪雹時加。伏暑之中。嚴霜夜襲。天時地氣之不同。蓋與中原迥絕。越六旬。而抵索力奔。過黃河。經尾宿海。水面平闊無際。波瀾不驚。上下天光。一碧萬頃。海中石山一座。相傳山底有七孔。水從孔中迸出。生平讀山海經。覽輿圖。謂河源經出於此。竊疑爲誕。今果信其不誣也。自是而往。亞刺塔夷之地。藥草傷生。巴彥哈拉之區。瘴癘彌毒。人畜中之不一。二日。輒死。填屍道路。不可勝計。余至此。隨行僕從。十日內死者八人。此時此際。行者寒心。見者慘目。生死存亡。惟付之天命。無可如何耳。初秋。念有一日。始至木魯烏蘇。名通天河。乃金沙江之源也。時則王師屯駐河東。平逆將軍延率各都統提鎮蒙古諸部落舉兵進藏。余復奉王諭。押送牛羊隨大兵後。以濟軍糈。於八月十一日起程。十七日渡七岔河。其處乃微行小徑。無人跡往來。無番夷住址。深山窮谷。罔識道途。惟相勢審其方向。指西南以行。雖早夜奔馳。而心中茫然。不卜所之何地也。旣而得歸大路。會官兵安塘其地。憂方稍釋。計木魯烏蘇至此。僅六十七日之程。而失路遷延已半月餘矣。正欲倍道兼馳。奮力前往。不期舊站改移。中途多阻。時將軍延因前軍戰捷。慮賊截後糧路。令撤舊塘。改於山南。由是寬嚮道。達新臺。入無人之境。艱辛苦況。較日前倍甚。塔子頭上。帳冷氈寒。水草灘中。人顛馬仆。入深谷則亂石參差。爪牙爭錯也。越達般則層巒峭壁。手足伏行也。又況番夷狡悍。剽掠成風。百十爲羣。潛匿幽僻。晝則奪物。夜則劫營。余甫過哈拉烏蘇。而騾馬搶去已盡。即我同事諸公。亦鮮有不受其累者。如此凶頑。是又不待教而誅者也。仲冬朔日。方抵西藏。至則我師告捷。賊逆敗走。達賴喇嘛已入座矣。非聖天子文德武功不著無外。烏能如是。迨觀藏內形勝。山水環秀。土田沃衍。樹木濃蔭。民居稠密。且風和日暖。嚴冬之際。冰雪不凝。洵塞域之別有天地也。平川中擁一石山。較諸峯獨小。上建寺院。爲活佛所居。層樓翠閣。幾數百重。金光絢麗。美不勝述。問所由來。僉曰。活佛之生。代有其人。本係原身轉世脫胎。無過番民之家。但不一其地。始生時。即能言前世事。衣鉢所傳。一一不迷人。驗其真。爭相頂禮。迎入前藏。升座。徒衆千萬。番民日朝如市。非特近地爲然。遠近西海。青海各國。蒙古諸王部落。皆以來見。所貢皮幣。犬馬。珠玉。奇產異物。不一而足。嗟夫。世之膺大位。享大名。身都富貴者。福澤非不厚也。然而名利場中。事物經心。攘攘勞勞。迄無甯息。茲觀達賴喇嘛。居然赤子。無知本來面目。一

塵不染。其宮室居處如是。服食器用如是。人心悅服無不如是。雖富貴之極。無所用之。然則所謂活佛者。蓋現在受福之人也。佛云乎。設余寓藏八日。公事甫竣。方得登堂一見。見畢即行。未獲遊覽娛暢。心目殊爲恨事。值大兵凱旋。隨之東歸。是時表敵金盡。驃馬不能置。惟購牛數頭。僅載帳房衣被。輕騎以從。他物悉屏棄。僕從步隨。踰墨竹以長征。向江達而就道。穿林入澤。履險蹈危。或步石級。或緣木棧。閱二十餘日。望拉哩之山。高聳插天。自山下起行。盡日乃及山肩。天晚不能過。其地皆亂石險窄。平不滿丈。且烟瘴甚大。無片柴寸草。雖勺水難覓。乃坐臥一夕。人馬俱凍餒。次日。陟其巔。則堅冰滑雪。萬仞崇岡。如銀光一片。俯首下視。神昏心悸。毛骨悚然。令人欲死。不得已。乃鋪氈坐雪上。腰繫以繩。僕從前拖後曳。盤旋而下。行李什物。憑空而擲。牛馬則縛足下墜。傷斃者大半。是誠有生來未歷之境。未嘗之苦也。夫何行動正艱。口糧告絕。且番地又不產米。惟日食青稞以充飢腹。如此者半月。當除夕佳辰。元旦令節。求粒米沾口不可得。困頓至此。其何以堪。厥後行至察木多。川督年羹堯念進藏官兵勞苦已甚。恐流離異域。特委永甯道屯糧接濟。因得日支米二升。麪二升。並借庫銀二百兩。以資盤費。涸轍之困。得以復甦。茲豈非天幸耶。爰是更覓番驛。稍載行囊。整轡以往。歷工阿朗麻之地。芻草空虛。過湯曠丹達木之村。人民殷富。坡高而險。紫微陰霾。查拉松多。可畏也。雪連四岡。寒風徹骨。宗洛三巴。其最焉。邊巴俗尙寬柔。阿足人心狡詐。碩板多之山崇嶺峻。行來扶杖牽衣。洛隆宗之怪石巉巖。到處左盤右折。昌都多勝概。形連二水環龍。占對有奇觀。勢若千軍駐馬。曰阿布喇。曰黎樹。村村盜藪。曰夾壩溝。曰江卡。處處賊窩。凡屬行役征夫。罔不驚心喪膽。至如漢人寺房舍。無殊內地。核桃園風景。頗似中華。時方二月初。日正上旬之內。紅杏發而芬芳。綠柳垂而青翠。田園禾黍。郁郁青青。鳥語花香。風薰日暖。爲憶出口以來。殊方絕域。馳驅萬里。舉目淒涼。幾一年矣。今見及此。能不令人心目俱爽耶。繼此則古都龍。即金沙江過渡處。有大船四隻。千餘人馬。片時即渡。塞地河道頗多。或係木橋。或係皮筏。舟楫往來。此其僅見者。其兩岸爭妍村落。依山如畫。土產蒲萄最廣。蠻人以此造酒。飲之亦能醉人。再行七十里。至巴塘。氣候溫暖。地闊人稠。花木繁茂。可觀。且集市之所。內地漢人亦寓此貿易。余至此人馬困乏。歇息三日。然後起行。奔又木山高百里。越二日而始登。大所塘路通一綫。值三春而未暖。諸物競售。冷水灣附近玻璃。四面皆川。乾海子潛藏寇盜。惟茲數日之內。無非雪路行程。策駑前征。裏塘告屆。其寺院之華麗喇嘛之衆多。諸貨之集聚。較巴塘稍勝。所不及。

者地道寒冷無嘉田花木之美耳。次日宿河下及咱麻拉洞東行俄洛坡雪地六十里深三尺餘至剪子灣而下及麻蓋中漸下抵雅龍江蓋約百餘里云江水碧清而溜兩岸巖石甚險難以舟渡有大船數隻橫其中掩大板作浮橋車馬往來殆若坦途過此江以東由八角樓臥龍石以至那門遮多雖屬番民逼近內地知畏王法爲化林營所轄商民經過者即一二人可行可止永無夾壩之患矣三月初四日進打箭爐爲蜀西極邊皆番地乃藏路咽喉土官明正司統屬其先叛服不常康熙三十八年調兵剿平之宜以恩威彰以信義莫不傾心向化今設兵戍守其地番漢咸集交相貿易稱鬧市焉。余於此馬疲力倦乃覓夫乘小竹輿自頭道水越冷竹關抵瀘定橋高十餘丈長數百步兩岸建亭閣用大鐵繩九條懸亘飛渡其上覆以木板若天塹然人馬須少行徐徐而過多即動搖若遇風則斷不可行矣。繼此則化林坪飛越嶺再進而牛市坡羊圈門山勢陡惡石路艱難莫可殫述過黎雅之墟歷印笮之境俗稱武侯擒獲文君當壚其舊地也念一日入成都省會之區沃野千里人民輻湊景物豐美文采風流埒於中州獨是錦江雖麗浣箋無存揚雄相如之故宅僅載志乘西望漢陵昭烈帝之遺徽有不禁慨然嘆息者又如新都之龍門漢州之房湖高人逸士所觴詠皆足動人感愴由德陽至落鳳坡龐士元之墓祠宛在經蘇州及梓潼縣文昌君之廟貌巍然劍關石壁峭聳棧道木架凌空聞曰馬鳴見於昭化驛名籌筆著於廣元千佛巖與飛霞洞同山朝天關並神仙驛接壤行是路者南棧固艱而北棧尤險甯羌過金牛之峽嘆五丁開道特勇而愚褻沔踰雞頭之關羨子房學仙養真自適陳倉古渡碣存於留壩靈鳳飛來窠見於南星黃牛山勢從龍寶雞川原平衍岐山爲周室發祥之舊扶風乃漢朝京輔之遺自是而達醴泉適涇陽可且夕至也計余自丙申二月從軍至辛丑五月回署六載於外雖然王事靡盬勞瘁弗辭而以衰弱微軀頻年奔走且夕無休宿露披霜合飢忍凍崎嶇歷盡皮骨僅存所幸以生還無恙者皆上蒼默佑所致也嗚呼余年五十有七矣毛髮蒼蒼精神多憊回憶少時居處家庭愧未能窮山極水以窺天下名勝繼而上公車登仕籍游覽荆襄韓魏間以及燕趙秦晉諸大境於水見江淮河漢非不大且深也於山見終南恆華非不高且遠也然猶是中國以內名山勝蹟游人之所寓目仙客之所景從不惜身至其地親見其實乃若遐荒絕塞舟車不至誰探星宿之源封然無聞孰陟崑崙之頂如所爲藏如所謂佛則亦虛誕險遠之說固不必其至之不必其見之也不必至而竟至之不必見而竟見之可不謂僥倖因不

揣固陋於回藏之暇。授筆以紀其略。匪敢矜功市異。亦以誌此番閱歷。此番辛苦。出之生平意外者。觸目驚心。以示安不忘危。逸不忘勞之意云爾。